

AMAWULIRO AMASA NG' OLUUKA OWEYAGAWANDIIKIRE **Enyanjula**

Ekitabo, *AMawuliro aMasa ng'oLuuka oweyagawandiikire*, kimo oku bitabo ebina ebiri omu Ndagaano eMpyaka ebisonzola oku bwomi bwa Yesu Kurisito. Buli kitabo ekimo kwebyo bakyeta bati, "Mawuliro ag'aMazima," amakulu gaakyo "mawuliro amasa." AMawuliro aMasa ago bagawandiikire ng'oYesu amalire okufa, era abagawandiikire babbaire Matayo, n'oMaako, n'oLuuka, n'oYokaana.

OLuuka iye tiyawandiikire ku byafaayo bya bwomi bwa Yesu byonkani, neye yawandiikire n'oku bintu abeegi ba Yesu ebibakolere ng'oYesu amalire okufa n'okuzuukira, era ebyo yabiwandiikire mu kitabo ky'eBikole by'abatume.

Mpaawo muntu amaite ekiseera ekituuce ekibawandikiiremu amawuliro ganu, ooba ekifo ekibagawandikiiremu, neye abakugu omu by'eBbaibbuli abakira obungi baikirirya bati bayinza okubba bagawandiikire mu myanka gy'e 70 oluzwanyuma lw'okubyala oYesu.

Omuntu eyawandiikire niye oLuuka, oyo eyabbaire omusawo w'ekizungu. Enger egiyawandiikiremu n'olutumu oluyakoleserye omukugawandiika biraga biti yabbaire musaiza musomi. OLuuka yatakire okuwandiika ng'asonzola nakusani obwomi oYesu

obuyabbairemu, era ng'atumula engeri ebintu egibyabbairewo, kaisi byezye okugasa n'abantu abandi omu kubisoma (1:1-3). Iye oLuuka tiyabbairi Muyudaaya (Bakolosaayi 4:10-14) era yawandiikire omu ngeri abantu aBatali Bayudaaya egibeezya okutegeera. Ekyo kyeraga nakusani omu ngeri egyasonzolamu obulombolombo bwa Bayudaaya (1:8).

AMawuliro aMasa ng'oLuuka oweyagawandiikire gafaanana ino n'ago agali omu kitabo kya Matayo n'omu kya Maako, olwakubba ebitabo ebyo byonabyona bisonzola ebintu ebifaanana era n'engeri egibisonzolamu efaanana. Omu bitabo ebisatu ebyo, oLuuka niye akira okusonzola ebikwata oku kubyala oYokaana omubatizi. Era oLuuka akalaatira oku kusoniya (3:3; 11:4; 17:3-4; 23:34; 24:47), era n'okusaba (3:21; 5:16; 6:12; 11:1-12; 22:32).

Engeri egibyecaanamu

1. Enyanjula 1:1-4.
2. Okubyala oYesu era n'engeri egibamutegekeremu omu buweererya 1:5-4:13.
3. Omulimo oYesu oguyakolere, okukirira nakimo ebyamagero ebiyakolere n'ebintu ebiyayegeserye 4:14-21:38.
4. Engeri oYesu egiyafiremu, n'engeri egibamuliikiremu, n'engeri egiyazukiiremu 22-24.

Enyanjula y'omuwandiiki

¹ Ow'ekitiisya eino oTeefirowo, abantu bangi beewaireyo okulangaasira nakusani n'okuwandiika ebintu oYesu ebiyakolere mwiswe abantu ng'ali oku kyallo. ² Bawandiikire bintu ebyo, badi

ababiboneireku nakimo okuzwa oku ntandiika yaabyo ebibatukobeire, era ni bakola omulimo ogw'okusalaania ekibono kya Kibbumba. ³ Zena owemmalire okunoonererya nakusani byonabyona oYesu ebiyakolere okuzwa oku ntandiika yaabyo, mmboine nti kisa okubikuwandiikira nga mbicaanire kusani ng'owebyabire bibbaawo. ⁴ Kinu nkikolere, kaisi omanyire nakimo amazima g'ebibono abantu abamo ebibakwege-serye.

Okubyala oYokaana oMubatizi bakulanga

⁵ Omu biseera okabaka oKerode oweyabbaire nga niye afuga oBuyudaaya, wabbairewo okabona ogubeetanga bati Zakaliya, ow'omu kibbula kya bakabona ekibeetanga eky'Abbiya. OZakaliya yabbaire n'omukaliwe nga bamweta Erizabbeesi, nga bonabona b'omu lulyo lwa kabona Alooni eyasookeire nakimo omu Bayudaaya. ⁶ OZakaliya n'omukaliwe babbaire batuukirirye omu maiso ga Kibbumba, nga babulaku ekyokubanenya omu by'aMateeka era n'ebiragiyo bya Musengwa oYesu byonabyona. ⁷ Neye babbaire badambaku omwana olwakubba Erizabbeesi yabbaire mugumba, tete bonabona ni babba nga bakairiire ino.

⁸ Lumo, oZakaliya yabbaire akola omulimogwe ogw'obwakabona omu maiso ga Kibbumba, ng'ekibbulakye ekyabakabona ekiyabbairemu niikyo ekiri omu kiiwu. ⁹ Ng'enkola ya bakabona oweyabbaire bamulondere na kalulu okwingira omu kifo ekyeru, aduunyirye obubbaani. ¹⁰ Omu kiseera ky'okuduunyirya obub-

baani, abantu bonabona ababbaire bakumbaine, babbaire nza nga basaba oKibbumba.

¹¹ Awo omalaika wa Musengwa ng'ayemereire oku lubba lw'engalo endiiro olw'ekyoto ky'obubbaani n'abonekera oZakaliya.

¹² OZakaliya oweyamuboine ni yeerinduka, entiisya n'emukwata. ¹³ Omalaika n'amukoba ati, "Zakaliya tiwaatya, olwakubba oKibbumba awuliire okwegairirakwo; omukaliwo Erizabbeesi yalikubyalira omwana mwisuka, n'omwerula bati, Yokaana. ¹⁴ Walisiima n'osangaala ino, era n'abantu abandi bangi balyesunga olw'okumubyalakwe, ¹⁵ olwakubba yalibba mukulu omu maiso ga Musengwa oKibbumba. Tiyalikombaku mwenge

gw'emizabbibbu, newankubbaire ekiteemeerya ekindi kyonakyona. Balimwizulya oMwoyo oMweru ng'akaali n'okuzwa omu kida kya maaye. ¹⁶ Yaliirya aBaisirairi bangi eeri oMusengwa oKibbumba waabwe okuzwa omu kibbikibbi. ¹⁷ Balimuwa omwoyo

n'obwezye ng'Eriya ebiyabbaire nabyo, era niye eyalyesooka oMulonde wa Kibbumba omu maiso n'ayaba ng'alaabba eeri abantu okwiriyayo emyoyo gya baiteeye b'abaana eeri abaana baabwe. Era yaliirya abantu abajeemera oKibbumba omu nzira y'abantu abasa, n'ategeka abantu okukuumirira oMusengwa."

¹⁸ Awo oZakaliya n'abuulya omalaika ati, "Ekyo nze mpezya ntya okukikakasa? Nze neekaiririire, n'omukali wange yena mukaire

ino.”

¹⁹ OMalaika n’amwiramumu ati, “Ninze oGabudyeri, ayemerera buliijo omu maiso ga Kibbumba nga mmuweererya, era niye antumire okutumula na iwe, n’okukukobera amawuliro ganu amasa. ²⁰ Aale atyanu ng’owobuusuusire ebinkukobeire, ebyalibbaawo ng’ekiseera kyabyo kituukire, oyaba kweigala omunwa, obbe nga toyeyza kutumula, paka oku lunaku ebyo olubyalibbeerawo.”

²¹ Omu kiseera ekyo, abantu babbaire bakuumiriire oZakaliya, era nga beewunya ekimulwisirye eino omu Yeekaalu. ²² Oweyawulukire nandi n’ayezya okutumula nabo, ni bamanyica bati wabbairewo ekinene ekyaboine omu Yeekaalu. Olw’obutezya kutumula, n’abakoberanga ebintu mu kugerya-bugeri, era n’asigala ng’omunwa gwebbuunire.

²³ Awo enakugye egy’okuweererya ng’okabona omu Yeekaalu owegyawoireku, n’azwa e Yerusaalemi n’akanga e wuwe.

²⁴ Owewabitirewo ekiseera, Erizabeesi omukaliwe n’asuna ekida, era n’amala emyeri mitaanu nga tabbutuka omu bantu, ng’akoba ati, ²⁵ “OMusengwa oKibbumba niye anjezyesyerye okusuna ekida, n’ankwatira ekisa omu kiseera kinu, n’antoolaku okuswala okw’obugumba okwembaire nakwo omu bantu.”

Okubyala oYesu bakulanga

²⁶ Erizabbeesi yabbaire yankamala emyeri mukaaga ng’ali kida, oKibbumba n’atuma omalaika oGabudyeri omu kibuga ky’e Naazaleesi eky’omu kitundu ky’e Galiraaya, ²⁷ eeri omwala omuguna, eriinalye bati Malyamu. Omwala oyo yabbaire aikiriirye okufumbirwa omusaiza ogubeeta oYusufu, omwizukulu wa kabaka oDawudi. ²⁸ OMalaika oweyatuukire egiri omwala oyo, n’amukoba ati, “Nkusugiirye ino, era nkumanyikisya nti oli n’enkabi mpitiriri. Era oMusengwa ali na iwe!”

²⁹ OMalyamu ni yeeraliikirira ino olw’ebibono ebyo, era ni yeebuulya omu mwoyogwe ekibitegeeza. ³⁰ Neye omalaika n’amukoba ati, “Malyamu tiwaatya, olwakubba oKibbumba akuwaire enkabi. ³¹ Oyaba okubba ekida, obyale omwana mwisuka, era bamwerule eriina bati Yesu. ³² Yalibba wa bwezye, era balimweta Mwana wa Kibbumba oNambulaku aMwagaagana. OMusengwa oKibbumba yalimuwa okubba kabaka ng’ozeizawe oDawudi. ³³ Yalifuga abaizukulu ba Yaakobbo emirembe gyonagyona, era obwakabakabwe tibwakuwaawo.”

³⁴ OMalyamu n’abuulya omalaika ati, “Ekyokubba ekida kyabbaawo kitya, nga timbangaku n’omusaiza?”

³⁵ OMalaika n’amwiramumu ati, “OMwoyo omweru yalikiwaku, era amaani ga Kibbumba oNambulaku aMwagaagana ni gakumaamira. Kale omwana oguwalibyala yalibba mweru,

era balimweta Mwana wa Kibbumba.
³⁶ Era n'ekindi, omugandawo Erizabbeesi,
 newankubbaire nga bamwetanga omugumba,
 era nga atyanu mukaire, neye gunu mweri
 gwa mukaaga ng'ali kida. Era yena ayaba
 okubyala omwana mwisuka, ³⁷ olwakubba eeri
 oKibbumba mpaawo kintu ekiteezyeka."

³⁸ Awo oMalyamu n'amukoba ati,
 "Nze ndi muweererya-buweererya wa
 Musengwa oKibbumba; kale njikiriirye, kibbe
 ng'owookobere." Awo omalaika n'alekaawo
 oMalyamu ni yeeyabira.

oMalyamu acaalira Erizabbeesi

³⁹ Omu naku egyo, nga bankumala
 okumukobera ebintu ebyo, oMalyamu
 n'asetuka, n'ayaba mangu omu kibuga
 ekiri omu kyalo ekyo eky'ensozi, eky'e
 Buyudaaya. ⁴⁰ Era yaabire mu nyumba ya
 Zakaliya, n'asugirya omukaliwe Erizabbeesi.
⁴¹ Neye Erizabbeesi oweyawuliire oMalyamu
 ng'amusugirya, omwana n'asambasamba
 omu kida ky'Erizabbeesi. Era Erizabbeesi
 n'aizula oMwoyo oMweru, ⁴² n'aminkirira
 ati, "oKibbumba akuwaire iwe enkabi
 okukiraku abakali abandi bonabona, n'omwana
 oguwalibyala ali n'enkabi. ⁴³ Kale nze onu
 nsunire ntya ekitiisya kinu, dala omaaye
 wa Musengwa wange n'aiza okuncaalira?
⁴⁴ Owempuliire eigonolyo ng'onsugirya,
 omwana n'asambasamba omu kida kyange
 olw'eisangaalo eryabbaire nalyo. ⁴⁵ Oli w'enkabi

ino iwe eyaikirirye ati ebyo oMusengwa ebiyakukobere byalituukirira.”

OMalyamu awuuja oKibbumba

- ⁴⁶ Awo oMalyamu n’akoba ati,
 “Omwoyo gwange gugulumalya oMusengwa.
⁴⁷ Era omwoyo gwange gusangaalira oKib-
 bumba oMulokoli wange,
⁴⁸ olwakubba ankwatiire ekisa
 nze omuweereryawe onambulaku owaali.
 Okuzwa atyanu, abantu ab’emirembe gyonagy-
 ona banjetanga w’enkabi,
⁴⁹ olw’ebikulu onyere obwezye
 ebyankoleire.
 Eriinalye Lyeru!
⁵⁰ Era akwatira ekisa abo abamutya,
 mu buli mulembe.
⁵¹ Alagire obwezyebwe omu byewunyo ebyakola.
 Abeekudumbalya omu biseego byabwe,
 abasalaanicirye.
⁵² Ayanwire ab’obwezye oku ntebe gyabwe
 n’abaica,
 neye n’agangamula abo ab’eiwooyo.
⁵³ Abali omu kwetaaga abawaire ebintu ebisa
 bingi,
 neye abasuni n’ababbinga nga badambaku
 akantu konakona.
⁵⁴ Abbeereire omuweereryawe oIsirairi,
 ng’oweyasuubizire abazeiza baiswe.
⁵⁵ Ayewukiirye okukwatira ekisa oIbbulaimu
 n’eibyairerye emirembe gyonagyona.”

⁵⁶ OMalyamu yamalire n'Erizabbeesi emyeri ng'emisatu, kaisi n'akanga e wuwe.

Okubyala oYokaana oMubatizi

⁵⁷ Awo enaku gy'Erizabbeesi egy'okubyala ni gituuka, era n'abyala omwana mwisuka.

⁵⁸ Abaliranwabe n'abagandabe ni bawulira ng'oMusengwa owamuwaire enkabi enyingi, era ni basangaalira aamo naye.

⁵⁹ Awo omwana oweyayererye enaku omunaana, abantu ni baiza oku mukolo ogw'okukomola omwana onu. Babbaire baaba kumwerula iteeye oZakaliya. ⁶⁰ Neye omaaye w'omwana n'akoba ati, "Kadi, nze tinjikirirya eriina eeryo! Omwana bamwete bati Yokaana."

⁶¹ Kale era abaliranwabe ni bamukoba bati, "Ekyo kibba kitya, ng'omu ba lulyolwo mpaamu kadi moiza ogubeeta eriina eeryo!"

⁶² Awo ni bakolesya okugerya, ni babuulya iteeye w'omwana eriina eryataka beerule omwana.

⁶³ OZakaliya n'asaba ekipande ekyokuwandiikaku, n'awandiika ati, "Eriina ly'omwana niye oYokaana." Awo bonabona ni beewunya.

⁶⁴ Era n'amangu ago omunwa gwa Zakaliya ni gubbunulukuka, n'olulumirwe ni lusibinduka, n'atandiika n'okutumula ng'awuuja oKibbumba.

⁶⁵ Awo abantu bonabona ababbaire babaliraine ni batya. Era ebibono ebyo byonabyona ni bisaalaana omu kitundu kyonakyaona eky'e Buyudaaya eky'ensozi ekyo. ⁶⁶ Kale abantu bonabona abawuliire ebintu ebyo, ni bibaingira omu myoyo, era ni bakoba bati, "Olwo omwana

onu yalibba muntu w'engeriki?" Bakobere ekyo olwakubba baboine obwezye bwa Musengwa nga buli oku mwana oyo.

Olwembo lwa Zakaliya

⁶⁷ Awo oZakaliya oiteeye wa Yokaana, n'aizula oMwoyo oMweru, n'awa obunaabbi, ng'akoba ati:

⁶⁸ "Tuwujenge oMusengwa oKibbumba wa Isir-airi,
olwakubba acaaliire abantube era abanunwire.

⁶⁹ Atuwaire oMulokoli ow'obwezye,
azwera omu lulyo lw'omuweereryawe ok-abaka oDawudi,

⁷⁰ ng'oweyasuubizire eira ng'abita omu banaab-bibe abeeru,

⁷¹ okutulamyababalabe baiswe,
era n'okututoola omu ngalo gy'abo bonabona abatucaawa,

⁷² ng'oweyasuubizire okukwatira abazeiza baiswe ekisa,
n'okwewukirya endagaanoye enjeru,

⁷³ nga niikyo ekirayiro ekiyalayiriire oIbbulaimu ozeiza waiswe,

⁷⁴ ati yalitutoola omu ngalo gy'abalabe baiswe,
kaisi twezye okumuweererya anambula kutya,

⁷⁵ nga tuli beeru era abatuukiriire omu maisoge n'obwomi bwaiswe bwonabwona.

⁷⁶ Era na iwe omwana, balikweta naabbi wa Kibbumba oNambulaku aMwagaagana,

olwakubba walyesooka oMusengwa n'oyaba
 omu maiso, okumwewulirya enzira,
 77 n'okumanyikisya abantube ooti, yalibalokola,
 ng'abasoniya ebibbibbi byabwe,
 78 olwakubba oKibbumba waiswe aizwire ekisa.
 Era olw'ekisa ekyo yalitucaalira ng'amoleka
 kusani ooti isana eryankazwayo,
 79 n'ayakira abo abali omu bwomi
 bw'ekibbikibbi n'omu kiriirye ekyokufa
 kw'omu mwoyo,
 era n'okulunganya ebigere byaiswe omu nzira
 ey'eidembe."

80 Omwana n'ayaba ng'akula, era nga yeey-
 ongera amaani omu mwoyo, n'abbanga omu
 kitera paka oku lunaku oluyeeragisiirye eeri
 abantu b'e Isirairi.

2

Okubyala oYesu (Mat 1:19-25)

¹ Awo omu naku egyo, oKaisaali Agusito nga
 niye afuga obwakabaka bw'e Looma n'awuluca
 ekiragiroti abantu bonabona ab'omu mat-
 walege beewandiikisye, bababale. ² Okubala
 abantu okwo niikwo okwabbairye okusooka
 ng'okwiriniya niye afuga eitwale ly'e Siiriya.
³ Awo buli muntu n'ayaba okwewandiikisirya
 egibamubyala.

⁴ Kale n’oYusufu n’azwa omu kibuga e Naaza-leesi, eky’omu Galiraaya, n’ayaba omu Buyudaaya, omu kibuga e Bbeserekeemu oDawudi ekibamubyaliremu olwakubba oYusufu yabbaire mwizukulu wa Dawudi. ⁵ Yaabire n’oMalyamu okwewandiikisya, ng’oMalyamu amusuubizire okumufumbirwa era nga kimanyikanire kiti ayaba okumufumbirwa era n’omu kiseera ekyo ng’ali n’ekida kikulu. ⁶⁻⁷ Owebatuukire eeyo ni batasuna kifo omu nyumba abantu abali omu njendo egibagonamu era ni basigala mu kinyumba ebyayo omu bigona. Owebabbaire nga bali eeyo, enaku gya Malyamu egy’okubyala ni gituuka. Yabyaire omwanawe omubere, mwisuka, n’amubwika omu bugoye, kaisi n’amuteeka omwitiba ebisolo omu biriira.

Abaliisya n’abamalaika

⁸ Okumpi kumpi aawo omu kitundu ekyo, mwabbairamu abaliisya abagonanga omu kiriisiryo eeyo, nga bakuuma entaama gyabwe obwire. ⁹ Awo omalaika wa Musengwa oKibbumba n’ababonekera, n’ekitiisya kya Musengwa oKibbumba ni kimoleka okubeeruguulirirya. Ni batya ino! ¹⁰ Neye omalaika n’abakoba ati, “Timwatya olwakubba mbaleeteire amawuliro amasa, ag’eisangaalo erinene eeri abantu bonabona. ¹¹ Olwatyanu, omu kibuga egibabyala oDawudi, bababyaliiremu oMulokoli, niye oKurisito oMusengwa. ¹² Kanu niiko akamanyiciryo akembawa akemwamumanyiciryaku: Mwajirya

omwana omwibo ogubabwikire omu bugoye, nga bamuteekere omwitiba ebisolo omu biriira.”

¹³ Amangu ago, aawo awabbaire omalaika oyo, ni waizawo n’abamalaika abandi bangi ab’omwije ery’omwigulu. Ni bawuuja oKibbumba nga webemba bati,

¹⁴ “Ekitiisya kibbe eeri oKibbumba omwigulu!

Era n’oku kyalo, eidembe libbe omu bantu abo oKibbumba abaasiima!”

¹⁵ Abamalaika owebamalire okuzwa egiri abaliisya, ni bakanga omwigulu. Awo abaliisya ni bakobangana bati, “Twabe e Bbeserekeemu, tubone ekintu ekyo ekigwireyo, oMusengwa eky-atukobeire.”

¹⁶ Kale ni baabayoye mangu, era ni baajirya oMalyamu n’oYusufu, n’omwana omwibo nga bamuteekere omwitiba ebisolo omu biriira.

¹⁷ Owebamalire okubona omwana, ni basalaania ebibono ebibabbaire babakobeire oku omwana oyo. ¹⁸ Era abantu bonabona ababiwuliire ni beewunya abaliisya abo ebibabbaire bakoba. ¹⁹ Neye oMalyamu ebibono ebyo byonabyona n’abikumira oku mwoyogwe, era n’abiseegangu ino.

²⁰ Awo abaliisya ni bakanga egiri entaama gyabwe nga bawuuja era nga bagulumalya oKibbumba olw’ebyo ebibawuliire n’ebibaboine. Ekyo kityo olwakubba byonabyona byabbaire nga biri nakimo ng’omalaika oweyabbaire abakobeire.

OYesu bamutwala omu Yeekaalu

²¹ Awo omwana oweyayererye enaku omunaana igyo egy’okumukomoleraku, ni

bamwerula bati, Yesu, iryo eriina omalaika eriyayetere omwana onu ng'akaali n'okubba omu kida kya maaye.

²² Awo ekiseera owekyawoireku eky'ababyaire okubatukulya nga bamalire okubyala, ng'owekiri omu Mateeka ga Musa, oYusufu n'oMalyamu ni batwala omwana oYesu omu Yeekaalu e Yersaalemi okumuwaayo eeri oMusengwa oKibbumba. ²³ Ekyo bakikolere kutuukirirya kiwandiike ekiri omu Mateeka ga Musengwa ekikoba kiti, "Buli mwana omwisuka omubere, bamuwangayo eeri oMusengwa oKibbumba." ²⁴ Era baabire okuwaayo esadaaka, ng'eiteeka lya Musengwa oweryabbaire liragira liti; enjiwa ibiri ooba amaizima amatomato mabiri.

²⁵ Awo, wabbairewo omusaiza omukaire omu Yersaalemi eriinalye bati Simyoni. Omusaiza oyo yabbaire muntu musa, nga mutuukirirye, era ng'akwata amateeka ga Kibbumba gonag-ona. Omusaiza oyo yabbaire akuumiriire okubonaku ekiseera ky'okununula kwa Isir-airi. Era yabbaire nga muntu aizwire oMwoyo oMweru. ²⁶ OMwoyo oMweru yabbaire amumanyikisirye ati tiyalifa ng'akaali okubona oku Kurisito oMulonde wa Musengwa oKibbumba. ²⁷ Omu kiseera ekibaleeteiremu oYesu omu Yeekaalu oMwoyo oMweru n'akoba oSimyoni yena n'aiza oku Yeekaalu. Ababyaire owebatuucirye oYesu oku Yeekaalu bakole ebintu ng'aMateeka ga Musa owegakoba, ²⁸ oSimyoni

2:21 2:21 Lee 12:3; Luk 1:31
2:22-24 Lee 12:6-8

2:23 2:23 Kuz 13:2,12

2:24

n'aginga omwana omu ngalogye, n'atandiika okuwuujja oKibbumba ng'akoba ati:

²⁹ “Aale atyanu Musengwa Kibbumba, otuukirirye ekiwasuubizire.

Oleke omuweereryawo yeefeere kusani omwidembe,

³⁰ olwakubba amaiso gange gaboine oku Mulokoli

³¹ oguwategekeire abantu bonabona,

³² oti abbe ekitangaala eeri aBatali Bayudaaya, era awesye abantubo aBaisirairi ekitiisya.”

³³ Oiteeye n'omaaye w'omwana ni beewunya olw'ebibono oSimyoni ebiyatumwire oku mwana oyo. ³⁴ Awo oSimyoni n'abasabira enkabi, tete n'akoba oMalyamu, omaaye w'omwana ati, “Omwana onu bamuteekerewo, okuleetera abantu bangi omwIsirairi okujigirika, neye tete era bangi basune okulokoka. Era aiza kubba kamanyiciryo akebalyakanisya, ³⁵ era kaisi ebiseego by'omu myoyo gy'abantu bangi kwibo bibbutuke. Era na iwe ekiseera kyalituuka enima n'ekusumuta omwoyo ooti-so mpiima enjogi niyo ekusumuta.”

³⁶ Era wabbairero n'onaabbi omukali eriinalye bati Anna, omwala wa Fanuweri, ow'omu kika ky'Aseri. Anna oyo yabbairero mukali mukaire ino. Yabbairero yafumbiirweku nga mwala mutomuto, n'amala emyanka musanvu omu bufumbo oibaaye n'afa.

³⁷ Okuzwa oolwo yabbairero yankamala

emyanka 84 nga namwandu.* Omukali oyo tiyaazwanga omu Yeekaalu. Omusana n'obwire yaabbanga mu kuweererya Kibbumba n'omu kumwegairira, era ng'asiiba. ³⁸ Omu kiseera ng'oSimyoni atumula n'ababyaire ba Yesu, Anna yena n'atuukawo era ni yeebalya oKibbumba ng'atumula ebikwata oku mwana oyo egiri abo bonabona ababbairiire bakuumiriire ebyokununula kwa Yerusaalemi.

³⁹ OYusufu n'oMalyamu owebamalire okutuukirirya byonabyona ng'owebabbairi balagira omu Mateeka ga Musengwa, ni bakanga e Galiraaya omu kibuga ky'e waabwe, e Naazaleesi. ⁴⁰ Awo omwana ni yeeyongera okukula, n'abba wa maani, ng'aizwire amalabuki era n'enkabi gya Kibbumba.

OYesu asigala omu Yeekaalu

⁴¹ Kale, ababyaire ba Yesu baabanga buli mwanka e Yerusaalemi, oku Mukolo ogw'oKutambukirya. ⁴² OYesu oweyayererye emyanka eikumi na mibiri, ni baaba naye e Yerusaalemi ng'owebakolanga omu kiseera eky'oMukolo ogwo nago. ⁴³ Owebabbairi bakanga e waabwe, ng'enaku gy'oMukolo giwoireku, oYesu n'asigala omu Yerusaalemi neye ababyairebe nga tibamaite. ⁴⁴ Owebamalire okutambula olugendo lwa lunaku lubbeereri, nga baseega bati omwana ali omu kiziima ky'abantu abebabbairiire batambula

* **2:37** 2:37 Ooba, Yasigaire nga namwandu paka oweyayererye emyanka 84. **2:39** 2:39 Mat 2:23 **2:41** 2:41 Kuz 12:1-27; Ama 16:1-8

nabo neenu kadi, oolwo ni bamunoonia omu baganda baabwe n'omu mikago gyabwe. ⁴⁵ Owebakayire omwana, ni bakanga e Yerusaalemi okumunoonia. ⁴⁶ Wabitirewo enaku isatu kaisi ni bamubonera oku Yeekaalu, ng'atyaima n'abakugu omu by'aMateeka ga Musa, ng'ali kubawulisisya era ng'ababuulya ebibuulyo. ⁴⁷ Bonabona abamuwulisisirye, ni beewunya ino olw'amalabukige n'ebyo yena ebiyabairangamu.

⁴⁸ Ababyairebe owebamuboine, ni beewunya ino. Omaaye n'amukoba ati, "Mwana wange, lwaki otukolere otyo? Oiteewo na nze tubbaire tukunoonia nga tweraliikiriire ino."

⁴⁹ Neye iye n'abakoba ati, "Lwaki mubbaire munnoonia? Mubbaire timumaite muti nteekwa kubba mu nyumba ya Bhaabba?" ⁵⁰ Neye ibo nandi ni bamanyica ekyabakobere.

⁵¹ Awo n'ayaba nabo ni baserengeta okwaba e Naazaleesi, era n'abagonderanga. Neye omaaye n'akuumanga ebintu ebyo byonabyona oku mwoyogwe. ⁵² Awo oYesu ni yeeyongeranga okukula, era ni yeeyongeranga n'omu malabuki era nga mukoda eeri oKibbumba n'eeri abantu.

3

*OYokaana oMubatizi ayebulya enzira
(Mat 3:1-12; Mak 1:1-8; Yok 1:19-28)*

¹ Omu mwanka ogweikumi na mitaanu oku-mulembe gwa Kaisaali oTibberiyi oweyafugiire obwakabaka bw'e Looma, ng'oPontiyo Piraato

niiye afuga eitwale ly'e Buyudaaya, ng'oKerode niiye afuga ery'e Galiraaya, era ng'omugandawe oFiripo niiye afuga eitwale ly'e Yituleya n'e Turakonaiti; ng'oLisaniya iye afuga ery'Abbireene, ² ng'Anasi n'oKayaafa niibo abakabona abakulu omu Yerusaalemi, oYokaana omutaane wa Zakaliya ng'ali omu kitera, n'asuna obukwenda okuzwa egiri oKibbumba. ³ Kale n'atambula okumalaku ebitundu byonabyona ebiriraine omwiga oYoludaani, ng'akoba abantu okwenyenya bababatize, kaisi oKibbumba abasoniye ebikole byabwe ebibbibbi. ⁴ Ebyo byabbairewo ng'owebakiwandiikire omu kitabo ky'ebibono bya Isaaya onaabbi bati:

"Waliwo atumulira omu kitera n'eigono eryaminkirira ati:

'Mutegeke oluguudo lwa Musengwa aiza, mutereerye amanzirage.

⁵ Buli kiinamo bakiizulye;
buli lusozi nabuli kasozi babiice.
Amanzira amagedesye bagagolole,
n'agalimu ebikonko bagakwanie.

⁶ Olwo abantu bonabona baaba okubona ng'oKibbumba owabalokola.'"

⁷ Abantu bangi ino ni baabanga egiri oYokaana ababatize, neye n'abakoba ati, "Inywe abakabbikabbi ooti mpiri enfulugundu! Naani abalabwire ati eenu niiyo engeri ey'okwiruka obusungu bwa Kibbumba obwaba okwiza? ⁸ Aale atyanu mukole ebikole ebiraga biti dala mwenenyere ebibbibbi

byanywe. Era timwatandiika kuseega muti, 'Kasita iswe tuli baizukulu ba Ibbulaimu,' olwakubba mbakobera nti omu mabbaale ganu, oKibbumba ayezya okusuuciryamu oIbbulaimu abaizukulu abandi. ⁹ Mumanye muti muli ooti misaale, nga n'amambaizi agagitema bamalire okugabiikirya oku kikolo kya buli musaale. Ogwo ogutaneneka ebineneka ebisa baaba kugutema, era bagudyake omu musyo."

¹⁰ Awo abantu ni bamubuulya bati, "Aale atyanu tukole niki?" ¹¹ N'abairamu ati, "Oyo aali n'ebizwalo ebibiri aweeku ogondi adamba, era aali n'ebyokulya yena akole atyo."

¹² Awo abasooloji ba musolo bona ni baiza ababatize, era ni bamubuulya bati, "Musomesya, iswe tukole tutya?" ¹³ N'abairamu ati, "Timwasoolojanga ekinene okukiraku ekyo ekibabalagira."

¹⁴ Abaisulukale bona ni bamubuulya bati, "Kaisi iswe tukole tutya?" N'abakoba ati, "Abantu timwabanyagangaku ebyabwe, era timwabasibiriryangaku emisango eginandi babbenga. Mwererenge ku kusuna mpeera yaanywe yonkani."

¹⁵ Awo abantu bonabona ni batandiika okuseega omu myoyo gyabwe bati, "Amo ni tubbangaawo ng'oYokaana niiye oKurisito oKibbumba oguyalondere okununula abantu ogutusuubira." ¹⁶ Neye oYokaana n'abakobera bonabona ati, "Nze mbabatiza na maizi, neye waliwo ankiraku obwezye aali kwiza,

oguntasaanira naire okusibindula obusibiro bw'engaitogye ni ngitoola omu bigerebye. Iye, yalibabatiza na Mwoyo oMweru era na musyo. ¹⁷ Iye ayaba okwabulamu abantu ooti muntu owaakwata olugali n'asenyenta, empeke n'ebisusungu. Empeke igyo yaligikumbaanirya omu kideerokye, kaisi ibyo ebisusungu n'abyoca n'omusyo ogutalikira.”

¹⁸ Atyo oYokaana, n'ayegesya abantu emirundi mingi ng'akolesya ebibono ebyo, era ng'abakobera aMawuliro aMasa. ¹⁹ Era n'anenya omufugi oKerode, olw'okutwala oKerodiya omuka mugandawe, n'olw'ebibbibbi ebindi byonabyona ebiyakolanga. ²⁰ Kaisi kwebyo byonabyona, n'ayongereryaku n'eky'okwicalira oYokaana omu mabbuusu.

Okubatiza oYesu
(*Mat 3:13-17; Mak 1:9-11*)

²¹ Awo olwatuukire, abantu owebabbaire nga bali kwizanga egiri oYokaana okubabatiza, oYesu yena n'aiza ni bamubatiza. Nga bamalire okumubatiza, yabbaire ng'asaba oK-ibbumba, eigulu ni libikuka, ²² era oMwoyo oMweru, ng'afaananira nakimo ooti njiwa, n'aika n'amugwaku. Era eigono ni lizwa omwigulu nga likoba liti, “Niiwe oMwana wange omutake, era ogunsiima eino.”

Olulyo lwa Yesu
(*Mat 1:1-17*)

3:20 3:19-20 Mat 14:3-4; Mak 6:17-18 **3:22** 3:22 Nta 22:2; Zab 2:7; Isa 42:1; Mat 3:17; Mak 1:11; Luk 9:35

23 OYesu yatandiikire omulimogwe ogw'okwegesya, ng'ayerya emyanka ooti 30, abantu nga bamweta mutaane wa Yusufu. OYusufu oyo yabbaire mutaane w'Eeri,

24 Eeri nga mutaane wa Matati,
oMatati mutaane wa Leevi,
kaisi oLeevi mutaane wa Merekii,
oMerekii n'abba mutaane wa Yanai,
oYanai iye yabbaire mutaane wa Yusufu,

25 oYusufu oyo mutaane wa Matatiya,
oMatatiya mutaane w'Amosi,
Amosi n'abba mutaane wa Nakumu,
oNakumu mutaane w'Esiri,
Esiri iye mutaane wa Nangai,

26 kaisi oNangai yabbaire mutaane wa Maati,
oMaati iye yabbaire mutaane wa Matatiya,
oMatatiya n'abba mutaane wa Semeeni,
oSemeeni iye mutaane wa Yoseki,

kaisi oYoseki n'abba mutaane wa Yoda,

27 oYoda n'abba mutaane wa Yowanaani,
oYowanaani iye mutaane wa Leesa,

oLeesa n'abba mutaane wa Zerubbabbeeri,
kaisi oZerubbabbeeri yabbaire mutaane wa
Seyalutiyeeri,

oSeyalutiyeeri iye n'abba mutaane wa Neeri,

28 oNeeri oyo n'abba mutaane wa Merekii,

oMerekii iye yabbaire mutaane w'Adi,

Kaisi Adi n'abba mutaane wa Kosamu,

oKosamu iye yabbaire mutaane
w'Erimadamu,

Erimadamu oyo n'abba mutaane w'Eeri,

29 Eeri iye yabbaire mutaane wa Yoswa,

oYoswa n'abba mutaane w'Eryeza,

Eryeza iye yabbaire mutaane wa Yolimū,
kaiſi oYolimū n'abba mutaane wa Matati,
oMatati oyo yabbaire mutaane wa Leevi,
³⁰ oLeevi iye n'abba mutaane wa Simyoni,
kaiſi oSimyoni n'abba mutaane wa Yuda,
oYuda iye yabbaire mutaane wa Yusufu,
oYusufu oyo n'abba mutaane wa Yonamu,
kaiſi oYonamu n'abba mutaane w'Eryakimu,
³¹ Eryakimu iye yabbaire mutaane wa Mereya,
oMereya n'abba mutaane wa Meena,
oMeena iye yabbaire mutaane wa Matata,
kaiſi oMatata n'abba mutaane wa Nasani,
oNasani n'abba mutaane wa Dawudi,
³² kaiſi oDawudi iye yabbaire mutaane wa
Yeſe,
oYeſe iye n'abba mutaane w'Obbedi,
Obbedi iye n'abba mutaane wa Bbowaaſi,
oBbowaaſi iye yabbaire mutaane wa Seera,
oSeera n'abba mutaane wa Nasoni,
³³ kaiſi oNasoni iye yabbaire mutaane
w'Aminadaabbu,
Aminadaabbu iye n'abba mutaane w'Adimini,
Adimini iye yabbaire mutaane w'Arini,
Arini n'abba mutaane wa Kazirooni,
oKazirooni oyo n'abba mutaane wa Pereezi,
kaiſi oPereezi iye yabbaire mutaane wa Yuda,
³⁴ oYuda iye yabbaire mutaane wa Yaakobbo,
oYaakobbo n'abba mutaane wa Isaka,
oIsaka iye yabbaire mutaane wa Ibbulaimu,
oIbbulaimu n'abba mutaane wa Teera,
kaiſi oTeera iye yabbaire mutaane wa Nakoli,
³⁵ oNakoli oyo n'abba mutaane wa Serugi,
kaiſi oSerugi iye yabbaire mutaane wa Lewu,

oLewu oyo n'abba mutaane wa Peregi,
 oPeregi iye yabbaire mutaane w'Ebberi,
 Ebberi iye n'abba mutaane wa Seera,
³⁶ kaisi oSeera yabbaire mutaane wa Kainaani,
 oKainaani iye n'abba mutaane
 w'Alupakusaadi,
 Alupakusaadi iye yabbaire mutaane wa
 Seemu,
 oSeemu iye n'abba mutaane wa Nuwa,
 oNuwa iye yabbaire mutaane wa Laameeka,
³⁷ OLaameeka iye n'abba mutaane wa
 Mesuseera,
 oMesuseera iye n'abba mutaane w'Enoka,
 Enoka oyo yabbaire mutaane wa Yaledi,
 oYaledi, iye n'abba mutaane wa Makaleeri,
 oMakaleeri iye yabbaire mutaane wa
 Kainaani,
³⁸ oKainaani iye yabbaire mutaane w'Enosi,
 Enosi n'abba mutaane wa Seezi,
 oSeezi n'abba mutaane w'Adamu,
 Adamu eyabbaire omutaane wa Kibbumba.

4

Okukema oYesu (Mat 4:1-11; Mak 1:12-13)

¹ Awo oYesu ng'aizwire oMwoyo oMweru,
 n'azwayo omu Mwiga oYoludaani, oMwoyo
 oMweru n'amutwala omu kitera, ² n'amalayo
 enaku 40 ng'oSitaani amukema. Omu naku
 egyo gyonagyona mpaawo kantu akeyaliireku,
 era owegyawoireku, awo enzala n'emuluma.

³ Kale oSitaani n'amukoba ati, "Ng'ooli Mwana wa Kibbumba, aale olagire eibbaale linu lisuuke kyokulya."

⁴ OYesu n'amwiramumu ati, "Bakiwandiikire bati, 'Omuntu tabba mwomi omu bwizulye ng'alya kyokulya kyonkani.' "

⁵ Awo oSitaani n'alungamya oYesu okuniina awantu awagingice eino, era omu kaseera-buseera n'amulagisyaku obwakabaka obw'amawanga gonagona obw'oku kyalo.

⁶ N'amukoba ati, "Nakuwa obwezye okufuga amawanga ago gonagona era nkuwe n'ebisa byonabyona ebigalimu, olwakubba byonabyona ebyo babimpaire, era oguntaka yenayena gumbigabira. ⁷ Aale atyanu iwe singa oikirirya okunkomera amazwi n'onsinza, byonabyona byaba okubba bibyo."

⁸ OYesu n'amwiramumu ati, "Bakiwandiikire bati, 'Osinzenge Musengwa oKibbumbawo, era guwaweereryanga yenkani.' "

⁹ Awo oSitaani n'alungamya oYesu okwaba e Yerusaalemi, n'amuniinisa oku kisooto ky'eYeekaalu, kaisi n'amukoba ati, "Ng'ooli Mwana wa Kibbumba, ozwere aanu, ojuuke ogwe ansi, ¹⁰ olwakubba bakiwandiikire bati, 'OKibbumba yalagiranga abamalaikabe okukukuuma nandi n'obbaaku kabbikabbi konakona.' ¹¹ Era ati, 'Balikubbaka omu ngalo gyabwe, kaisi nandi ni weekontola ekigerekyo okwibbaale.' "

¹² OYesu n'airamu ati, "Bakiwandiikire bati, 'Tokemanga oMusengwa oKibbumbawo.' "

¹³ OSitaani ng'amalire okukema oYesu omu ngeri enyingi eino egyo, n'amulekaku paka ekiseera ekindi.

*OYesu atandiika okwegesya omu Galiraaya
(Mat 4:12-17; Mak 1:14-15)*

¹⁴ Awo oYesu n'akanga omwitwale ly'e Galiraaya ng'ali n'amaani ga Mwoyo oMweru. Era amawuliro agamukwataku ni gasaalaana omu kitundu ekyo kyonakyoona. ¹⁵ Yaabire ng'ayegesya omu makumbaaniro ag'omu kitundu ekyo, era abantu bonabona ni bamuwu-
uja.

*OYesu ng'ali e Naazaleesi
(Mat 13:53-58; Mak 6:1-6)*

¹⁶ OYesu oweyakangireyo omu kabuga k'e Naazaleesi egiyakuliire era oku Saabbaato, n'ayaba omwikumbaaniro, ng'oweyabbaire enkolaye. Awo ni bataka niye abbe asome era n'asetuka okusoma eBiwandiike. ¹⁷ Bamukwatisirye ekitabo kya naabbi Isaaya. Oweyakibiikwire, n'atuuka egibawandiikire bati:

¹⁸ "OMwoyo wa Kibbumba andiku,
 olwakubba oKibbumba yannondere
 okulaabba aMawuliro aMasa eeri abadoobi.
Antumire okukobera abasibe ati beezya okuzwa
 omu busibe,
 n'aboofu bona ati baiza kwiramu ni babona.
Era antumire okukobera abebagadya ati beezya
 okusuna eidembe,

19 n'okulangirira ekiseera kya Musengwa ekyokukwatiramu abantu ekisa."

20 OYesu oweyamalire okusoma awo, n'abwikaku ekitabo, n'akiirirya omuweererya ow'omu Yeekaalu, era ni yeetyamira. Abantu bonabona omwikumbaaniro ni bamukaliryaku amaiso. 21 Awo n'atandiika okubakoba ati, "Olwatyano ekyo eKiwandiike ekimuwuliire, kituukirire."

22 Bonabona ni bamusiima ino, era ni beewunya olw'ebibono ebisa ebiyatumwire, ni bakoba bati, "Onu tiniye omutaane wa Yusufu?"

23 OYesu n'abakoba ati, "Mmaite nti mwaba okunkoba bibono ebyolugero olukoba luti, 'Omu-gangi, weeramy'e.' Era n'okunkoba muti, 'Ebyewunyo ebiwakoleire e Kaperenawumu, ebitwawuliire, obikolereku n'aanu omu kibuga ky'e waanywe.' "

24 Era n'abakoba ati, "Mbakobera amazima nti mpaawo naabbi ogubasiima omu kitundu ky'e waabwe. 25 Era mbakakasa nti omu mirembe gy'Eriya wabbairewo abanamwandu bangi omwIsirairi. Omu biseera ebyo, en-saaca n'ekubba era oikendi nandi n'atoonya okumala emyanka misatu n'emyeri mukaaga, enzala nebba mpitiriri omu kyalo kyonakyona. 26 Neye Eriya tibamutumire eeri kadi moiza kwibo, wazira bamutumire wa namwandu omu kyalo ky'e Zerifaasi omu omwitwale ly'e Sidoni.

27 Era omu mirembe gy'Erisa onaabbi, wabbairero abagenge* bangi omwIsirairi, neye tiwabbairero kadi moiza kwibo ogubalamirye, wazira oNamani yenkani ow'omu kyalo ky'e Siiriya."

28 Abantu bonabona ababbairero omwikumbaaniro owebawuliire ebyo, ni banyiiga, 29 ni basetuka, ni bamwindikiaga era ni bamubuluka e nza w'ekibuga, ni bamutwala oku mugo gw'akasozi oku bombekere ekibuga kyabwe kaisi beezye okumudyaka ansi eedi. 30 Neye oYesu n'abeeteeresya kaisi n'ababitamu akati ni yeeyabira.

*OYesu abbinga omuzimu oku muntu
(Mak 1:21-28)*

31 Awo oYesu n'ayaba omu kibuga e Kaperenawumu, ekiri omu kitundu ky'e Galiraaya. Era oku Saabbaato n'ayaba omwikumbaaniro okwegesya abantu. 32 Abantu ni beewunya ino engeri egyayegesya olwakubba yayegeserye n'obwezye.

33 Omwikumbaaniro oomwo mwabbairero omuntu eyabbairero omuzimu, n'aceera ng'akoba ati, 34 "Otubbaire niki iwe Yesu ow'e Naazaleesi? Oizire kutujigirica? Nkumaite. Niiwe oMweru oyo azwa egiri oKibbumba."

35 Neye oYesu n'agukaawuukira ati, "Osirike mangu, n'omuntu onu omuzweku." Omuzimu ni gukubbirawo omuntu oyo omu bantu awo

* 4:27 4:27 Omu Luyonaani, Ebigenge, Kyabbairero tikitegeeza bigenge byonkani neye n'endwaire gy'okwidiba gyonagyona.

4:27 4:27 2Ba 5:1-14 4:32 4:32 Mat 7:28-29

kaisi ni gumuzwaku nga mpaawo kabbikabbi konakona akegumukolere.

³⁶ Era bonabona ababbairero ni bawuninkirira, ni beebuulyangana bati, “Ekibonokye ky’engeriki? Obona emizimu agiragira-bulagiri na bwezye ni gizwa oku bantu!” ³⁷ Olwo amawuliro agakwata oku Yesu ni gasaalaana wonawona omu kitundu ekyo.

OYesu alamyā abalwaire abangi

(Mat 8:14-17; Mak 1:29-34)

³⁸ Awo oYesu n’azwa omwikumbaaniro, n’ayaba omu nyumba ya Simooni omoiza oku beegibe. Omu kiseera ekyo omaaye wa muka Simooni yabbairero ng’omusuuja gumuluma ino. Kale ab’omu kisito ekyo ni beegairira oYesu amulamye. ³⁹ OYesu n’ayaba n’akotama egiri omulwaire, n’akaawuukira omusuuja era omusuuja ni gulamirawo. Amangu ago omukali oyo eyabbaire omulwaire n’asetukirawo, era n’atandiika n’okubainula.

⁴⁰ Eisana nga ligwire, abantu bonabona ababbairero n’abalwaire ab’endwaire egya buli ngeri, ni babaleeta egiri oYesu, n’akwata ku buli mulwaire n’amulamya. ⁴¹ Era emizimu gyonagyonona ni gizwa oku bantu bangi, ni gyaba nga giwolooga giti, “Iwe niiwe oMwana wa Kibbumba!” Neye oYesu n’agikaawuukira, nandi n’agiganya okutumula, olwakubba gyabbaire gumumaite giti niiye oKurisito oKibbumba oguyasukireku amafuta.

OYesu alaabba omu Buyudaaya

(Mak 1:35-39)

⁴² Obwire owebwaceire, oYesu n'ayaba omu kifo ekinambulamu bantu. Abantu bangi ni bamunoonia paka owebamuboine, era ni bagezyaku okumugaana okubazwaku.

⁴³ Neye iye n'abakoba ati, "Nteekwa okulaabba aMawuliro aMasa agakwata oku bwakabaka bwa Kibbumba n'omu bibuga ebindi byona olwakubba bantumire lw'ensonga eyo."

⁴⁴ Awo n'ayaba ng'alaabba omu makumbaaniro ag'omu Buyudaaya.

5

OYesu ayeta abeegi abasooka

(Mat 4:18-22; Mak 1:16-20)

¹ Lumo, oYesu oweyabbaire ng'ayemereire oku mbale mbale kw'enyanza oGenesareeti,* abantu bangi ni baiza nga basindikangana, beeye okutuuka egiyabbaire bawulire ekibono kya Kibbumba. ² OYesu n'abona amaato mabiri nga gali aawo oku mbale mbale omu maizi, ng'abavubi bagazwiremu era nga baanika obutimba bwabwe. ³ Awo n'aniina omu limo oku maato ago nga niiryo eryabbaire erya Simooni, n'amusaba aliigereryekuuyo butyayi buti omu nyanza okuzwa oku mugo gw'enyanza. Awo oYesu ng'atyaimo omu lyato linu, n'ayegesya abantu abo ababbaire awo.

⁴ Oweyamaliriirye okutumula, n'akoba oSimooni ati, "Oyongereyo eryato omu lwabi, era mutege obutimba bwanywe mukwate enyanyi."

* **5:1** 5:1 Ooba, Ey'e Galiraaya. **5:1** 5:1 Mat 13:1-2; Mak 3:9-10; 4:1

⁵ OSimooni n'amukoba ati, "Musengwa, eki-ire kyonakyona twakalabaine neye ni tutak-watisyayo kantu konakona. Neye olwakubba niuwe okobere, kale oleke tutege obutimba."

⁶ Awo owebategere obutimba, ni bakwatisya enyanyi mpitiriri ino, era obutimba bwabwe ni bubba ooti bwatiikamu. ⁷ Ni basimiryaku abanaabwe ababbaire omu lyato erindi, baize bababbeereku. Era abanaabwe ni baiza, ni baizulya amaato gonagona amabiri enyanyi, n'amaato ni gatandiika okweinika.

⁸ OSimooni ogubeetanga bati Peetero oweyaboine ekyo, n'akoma amazwi abigere bya Yesu, n'akoba ati, "Ondeke Musengwa olwakubba nze njizwire bibbibbi!"

⁹ OPeetero yakobere atyo olwakubba iye n'abainaye bonabona abeyabbaire nabo, babbaire ng'entiisya ebakwaite olw'obungi bw'enyanyi egibakwaite. ¹⁰ Era oYaakobbo n'oYokaana, abataane ba Zebedaayo, ababbaire n'oSimooni bona ni batya ino. Awo oYesu n'akoba oSimooni ati, "Tiwaatya, okuzwa atyanu, oyaba kunnooneryanga bantu ng'obasuuca beegi bange."

¹¹ Owebairirye amaato gaabwe oku mugo gw'enyanza, ebyo ni babizwaku, ni baaba n'oYesu.

*OYesu alamyā omugenge
(Mat 8:1-4; Mak 1:40-45)*

¹² Lwabbaire lumo, oYesu ng'ali omu kimo oku bibuga by'e Galiraaya, ni waizawo omusaiza

ng'omubiri gwonagwona gwizwire bigenge. Oweyaboine oYesu, n'akotama oku mazwige, n'amwegairira ati, "Musengwa, mmaite nti owoobba ng'otakire oyezya okundamya ni nnongooka."

¹³ OYesu n'agolola engalo n'amukwataku, n'amukoba ati, "Ntaka, era olame." Amangu ago ebigenge ni bimuwaku. ¹⁴ OYesu n'amukoba ati, "Ekyo tokikoberaku omuntu kadi moiza, wazira oyabe weeyanjule e wa kabona, era ng'oMusa oweyalagiire, oweeyo n'ekyokuwaayo kaisi bakakase bati olamire."

¹⁵ Neye amawuliro agakwata oku Yesu ni geyongera-bweyongeri kusaalaana, era ekyazwiremu abantu bangi ino ni bakumbaananga okumuwalisisya, era n'okubalamya endwaire gyabwe. ¹⁶ Wazira emirundi egimo oYesu yazwangawo, n'ayaba omu bifo ebinambulamu bantu, n'asaba oKibbumba.

*OYesu alamy omulwaire eyasanyalaire
(Mat 9:1-8; Mak 2:1-12)*

¹⁷ Lumo, oYesu oweyabbaire ng'ayegesya, aBafalisaayo n'abakugu omu by'aMateeka ga Musa bona babbairewo nga batyaime awo. Babbaire bazwire omu byalo byonabyona eby'e Galiraaya n'eby'e Buyudaaya era n'omu kibuga e Yerusaalemi. Amaani ga Kibbumba gabbaire n'oYesu, ni gamwezyesyanga okulamya n'abalwaire. ¹⁸ Awo ni waizawo abasaiza abaleetere omusaiza asanyalaire, nga

bamugingiire oku mukeeka, ni bagezyaku okumwingirya bamuteeke egiri oYesu. ¹⁹ Olw'ekiziima ky'abantu, ni bakayaku egibamubitya okumwingirya neye ni baniina e ngulu oku kisooto ky'enyumba, ni babiikulaku ekitundu, ni bamubitya omwibbanga eeryo ng'ali oku mukeeka, ni bamwica omu bantu akati paka giri Yesu. ²⁰ OYesu oweyaboine okwikirirya kwabwe, n'akoba asanyalaire ati, "Mwana wange, nkusonyire ebikolebyo ebibbibibi."

²¹ Awo abakugu omu by'aMateeka ga Musa n'aBafalisaayo ni batandiika okwebuulyangana bati, "Onu niye naani atumula omu ngeri ezumirira oKibbumba? Naani ali n'obwezye okusoniya ebikole ebibbibibi okutoolaku oKibbumba?"

²² OYesu oweyamanycirye ebiseego byabwe, n'ababuulya ati, "Lwaki mwebuulya omu myoyo gyanywe? ²³ Ekikiraku owangu niikyo ekiriina, kukoba nti 'Nkusonyire ebikolebyo ebibbibibi,' ooba nti, 'Osetuke era otambule?' ²⁴ Aale atyanu oleke mbalage nti oMwana wa Muntu ali n'obwezye okusoniya ebikole ebibbibibi oku kyalokunu." Era awo n'akoba omusaiza eyabaire asanyalaire ati, "Osetuke, oginge omukeekagwo, okange e ika."

²⁵ Amangu ago omusaiza n'ayemerera, bonabona nga babona, n'aginga omukeeka ogubamuleeteireku, n'akanga e wuwe ng'awuuja oKibbumba. ²⁶ Bonabona ababoine ekyo beewunyire, ni bawuuja oKibbumba, era

entiisya n'ebakwata, ni bakoba bati, "Olwatyanu tuboine ebyewunyo!"

OYesu ayeta oLeevi

(Mat 9:9-13; Mak 2:13-17)

²⁷ Ebyo owebyawoire, oYesu n'azwa omu kifo ekyo, era oweyabbaire ng'atambula n'abona omusolooji wa musolo ogubeeta oLeevi, ng'atyaimo omu yaafeesi ya musolo. OYesu n'amukoba ati, "Oize otambulenge na nze."

²⁸ OLeevi yena n'asetukiramu, n'abizwaku era n'ayaba naye.

²⁹ Era oLeevi n'asumbira oYesu embaga enene omu kisitokye. Abasolooji ba musolo bangi ino era n'abantu abandi abakola ebibbibibi ni batyama okulya aamo n'oYesu n'abeegibe.

³⁰ ABafalisaayo n'abakugu omu by'aMateeka ga Musa ab'omu kibbula kyabwe ni beezuluguma nga bakoba abeegi ba Yesu bati, "Lwaki muliira aamo era ni munywera aamo n'abasolooji ba musolo n'abakola ebibbibibi?"

³¹ OYesu n'abairamu ati, "Aboomi tibeetaaga omusawo, wazira abalwaire. ³² Abatuukirirye tiniibo abenaizire okweta beenenye, wazira abakola ebibbibibi."

OYesu bamubuulya oku kusiiba

(Mat 9:14-17; Mak 2:18-22)

³³ Awo abantu abamo ni bakoba oYesu bati, "Abeegi ba Yokaana batira okusiiba era n'okusaba oKibbumba, n'abeegi b'aBafalisaayo bona niye owebakola, neye ababo tibasiiba era beeriira buli lunaku."

³⁴ OYesu n’abairamu ati, “Mwezya okukoba abageni abeete oku mbaga y’obugole okusiiba, ng’omugole omusaiza akaali ali nabo? ³⁵ Neye ekiseera kyalituuka ni babatoolaku omugole oyo, kaisi oolwo ni basiiba omu biseera ebyo.”

³⁶ Era n’abagerera olugero ati, “Omuntu tasala ekiraaka oku kizwalo ekiyaaka n’akikubira omu kizwalo ekikaire. Singa akola atyo, ekizwalo ekiyaaka akiteekamu ekituli, tete n’ekizwalo ekikaire nandi ni kiwoomeramu ekiraaka ekiyaaka. ³⁷ Era omwenge ogw’emizabbibbu omuyo tibagusuka omu nsawo ey’eidiba erikaire. Singa ekyo bakikola, gunyiira ensawo era n’ofirwa omwenge ogwo n’ensawo yaaku. ³⁸ Wazira omwenge ogw’emizabbibbu omuyo, bagusuka mu nsawo yaagwo ey’eidiba eriyaaka. ³⁹ N’ekindi, omuntu analiriire okunywa omwenge gw’emizabbibbu omuwolu, tataka okunywa omuyo, olwakubba akoba ati, ‘Omuwolu niigwo ogukiraku okuwooma.’ ”

6

OMusengwa w’eSaabbaato (*Mat 12:1-8; Mak 2:23-28*)

¹ Awo olwatuukire oku Saabbaato, oYesu oweyabbaire ng’abita omu kasinde akabbaire omu musiri gw’engaano, abeegibe ni bawululaku ebigala by’engaano, kaisi ni ba giirirya omu bigalabaayo byabwe, era ni balya empeke gyamu. ² ABafalisaayo abamo ni bababuulya

bati, “Lwaki abeegibo bakolere omulimo, ekintu aMateeka ga Musa ekigagaana oku Saabbaato?”

³ Awo oYesu n’abairamu ati, “Inywe timu-somangaku omu Biwandiike kwekyo okabaka oDawudi n’abeyabbaire nabo ekibakolere enzala oweyabalumire? ⁴ ODawudi yaingiire omu nyumba ya Kibbumba, n’atoola era n’alyaku emigaati egibabbaire bawongere eeri oKibbumba, era n’awaaku n’abeyabbaire nabo, aate ng’aMateeka ga Musa gabbaire tigaikirirya abantu abandi okulyaku emigaati egyo, oku-toolaku abakabona bonkani.”

⁵ Awo oYesu n’akoba aBafalisaayo ati, “OMwana wa Muntu ali n’obwezye okusalawo abantu ekibasaaniire okukola oku Saabbaato.”

OYesu alamyā omuntu oku Saabbaato

(Mat 12:9-14; Mak 3:1-6)

⁶ Awo oku Saabbaato olundi, oYesu n’ayaba omwikumbaaniro okwegesya. Omwikumbaaniro oomwo mwabbairamu omuntu ow’engalo endiire eyanyolere.

⁷ Abakugu omu by’aMateeka ga Musa n’aBafalisaayo ni bamwekalikica babone ooba nga yalamya omuntu oyo oku Saabbaato kaisi basunire okwo eky’okumuwaabira. ⁸ OYesu iye yamanyicirye ebiseego byabwe, neye era n’akoba omuntu nago ow’engalo eyanyolere ati, “Osetuke oyemerere abantu bonabona egibeezya okukubonera.” Era omusaiza onu n’asetuka n’ayemerera. ⁹ Awo oYesu n’abakoba ati, “Ndi n’ekibuulyo ekimbabuulya. Niki amateeka ekigaikirirya okukola oku Saabbaato? Kukola

busa ooba bubbibubbi? Kulamyia bwomi, ooba kubujigirica?”

¹⁰ Awo n’abeeruguulyamu bonabona amaiso, kaisi n’akoba omuntu oyo ati, “Waama iswe ogolole engaloyo.” Era n’agigolola, era n’eramirawo! ¹¹ Neye abalabe ba Yesu ni baizula obusungu, era ni beebuulyangana ekibakola oYesu.

OYesu alonda abatume eikumi na babiri
(Mat 10:1-4; Mak 3:13-19)

¹² Lwabbaire lumo omunaku egyo, oYesu n’ayaba oku lusozi okusaba oKibbumba, era n’amala ekiire kyonakyoona ng’asaba. ¹³ Obwire owebwaceire, yayetere abeegibe. Omu beegi abo n’alondamu eikumi na babiri, era n’abeeta batume, nga niibo banu: ¹⁴ OSimooni, oguyawaire erya Peetero, n’Andereya omuganda wa Peetero nago, n’oYaakobbo, n’oYokaana, n’oFiripo, n’oBbantulumaayo, ¹⁵ n’oMatayo, n’oTomasi, n’oYaakobbo omutaane w’Alufaayo, n’oSimooni ogubeetanga oMulwaniriri wa kwefuga kw’eigwangalye, ¹⁶ n’oYuda omutaane wa Yaakobbo, n’oYuda oIsikalyoti, eyamuliiremu olukwe.

Okwegesya n’okulamyia abalwaire
(Mat 4:23-25)

¹⁷ Awo oYesu n’aserengeta n’abatume abo, kaisi n’ayaba n’ayemerera omu kifo ekitereeri, era omu kifo ekyo wabbaire wakumbaaniirewo abeegibe bangi aamo n’ekiziima ky’abantu abandi. Abantu abo babbaire bazwire omu kyalo ky’e Buyudaaya mwonamwona n’omu kibuga

e Yerusaalemi, era n'omu kitundu eky'oku mbale mbale kw'enyanza, ekirimu ebibuga oTiro n'oSidoni. ¹⁸ Abantu abo bonabona babbaire baizire okuwulisisya oYesu era n'okubalamya endwaire gyabwe. Era abo ababbaire bakaanya emizimu, oYesu n'abalamya. ¹⁹ Buli muntu yagezyeryeku okumukwataku olwakubba obwezye wamuzwangamu era ni bubalamyanga bonabona.

²⁰ Awo oYesu n'aira oku beegibe, kaisi n'abakoba ati:

“Muli b'enkabi inywe abadoobi, olwakubba obwakabaka bwa Kibbumba bwanywe. ²¹ Muli b'enkabi inywe enzala abeeruma atyanu, olwakubba balibaikutya.

“Muli b'enkabi inywe abali omu maliga atyanu, olwakubba mwalisangaala.

²² “Muli b'enkabi singa abantu owebabacaawanga, era owebabagudyanga, era owebabazumanga, era owebabeetanga okubba abakola ebibbibbi, nga babalanga oMwana wa Muntu.

²³ “Musangaalenge nga bababitirye batyo, era mujuukejuukenge olw'eisangaalo, olwakubba oKibbumba yalibawa empeera ey'amaani omwigulu. Ibo bababitya batyo, era ng'abazeiza baabwe owebabitirye abanaabbi.

²⁴ “Wobe! Ala inywe abasuni, nga mwalaba! Ekyo kityo olwakubba inywe mumalire okusuna eisangaalo eryanywe.

25 “Wobe! Ala inywe omwikutire, nga mwalaba! Ekyo kityo olwakubba inywe enzala yalibaluma.

“Wobe! Ala inywe abaseka atyanu, nga mwalaba! Ekyo kityo olwakubba inywe enima yalibakwata era mwalikunga.

26 “Wobe! Ala inywe nga mwalaba, singa abantu owebabawujanga! Ekyo kityo olwakubba n’abazeiza b’abantu abo ibo batyo niye owebawujanga abanaabbi ab’obubbeyi.”

Okutaka abalabe
(Mat 5:38-48; 7:12a)

27 “Neye inywe abampulisisya mbakoba nti mutakenge abalabe baanywe, era abo ababacaawa mubakolerege ebintu ebisa.

28 Musabirenge enkabi abo ababalaama. N’abo ababazuma mubasabirenge enkabi egiri oKibbumba. 29 Omuntu owakukubbanga okwitama, omucusiranga n’erindi lidi lyona n’akubba. Era omuntu owakutoolangaku ekizibaawokyo, omulekeranga n’esaatiyo yona n’atwala.

30 Buli abbaaku n’eky’akusaba omuwanga, era owebakutoolangaku ebibyoy, tosabanga okubikwirirya. 31 Mukolerege abantu ebintu ebyo nywena ebimutaka abandi babakolere.

32 “Singa owemutaka baabo ababataka bonkani, mubba mukolere niki awo ekibasiimisya? N’ababbibabbi bona bataka baabo bonkani ababataka! 33 Era singa owemukolera ebisa bantu abo bonkani ababakolera ebisa, mubba mukolere niki

awo ekibasiimisya? Mbona nti n’ababbibabbi bona bakola batyo! ³⁴ Era singa owemukooa baabo bonkani abemusuubira okubasasula, mubba mukolere niki awo ekibasiimisya? N’ababbibabbi bona bakoopa babbibabbi banaabwe, nga babasuubira okubasasula mu bwizulye ekibabekoopereku. ³⁵ Neye inywe mutakenge abalabe baanywe, era mubakolerege ebisa. Mukoopenge nga timufiireyo ooba tibabasasule. Olwo kaisi empeera yaanywe ebbe nene, era mubbe baana ba Kibbumba oNambulaku aMwagaagana, olwakubba iye w’ekisa eeri abatasiima n’ababbibabbi. ³⁶ Muli n’okubba b’ekisa ng’oItewaanywe aali omwigulu.”

Okusalira abandi emisango
(Mat 7:1-5)

³⁷ “Timusaliranga abantu emisango, kaisi nywena mulame oKibbumba okubasalira. Timusaliranga abantu emisango okubasinga, kaisi nywena oKibbumba tiyabasingisya. Singa owemwasoniyanga abantu, nywena oKibbumba yabasoniyanga. ³⁸ Owemwagabanga, nywena mwalisuna. Ebimwalisuna balibapimira omu kipimo ekituuce ekibasiinyire, kaisi ni bakitengeetyamu, era ni kiizulira nakimo n’omutwe. Kale ekipimo ekimukolesya okupimira abantu, era niikyo ekibalikolesya okubapimira nywena.”

³⁹ Awo oYesu n’abagerera olugero lunu ati, “Omwofu takubbembera omwofu omwinaye. Singa amwekubbembera, bonabona bagwa omu

kiina. ⁴⁰ Ogubeegesya takiraku amwegesya, wazira buli ogubeegesya owaamala okwegga nakusani, abba ooti yoodi amwegeserye.

⁴¹ “Era lwaki ofaayo oku kasubi akali oku liiso lya mugandawo, kaisi nandi n’ofaayo oku gusubi oguli oku liisolyo? ⁴² Oyezya otya okukoba omugandawo oti, ‘Muganda wange, oleke nku-tooleku akasubi oku liisolyo,’ kaisi nga iwe onyere tofaayo oku gusubi oguli oku liiso eriryo? Iwe omunanfunsi, osooke kutoola gusubi oguli oku liiso eriryo, kaisi oyezye okubona nakusani okutoola akasubi akali oku liiso lya mugandawo.

Omusaale n’ebineneka byagwo

(Mat 7:16-20; 12:33-35)

⁴³ “Omusaale omusa tigeneneka ebineneka ebibbibbi, n’omusaale omubbimubbi tigeneneka ebineneka ebisa. ⁴⁴ Buli musaale bagutegeerera ku bineneka byagwo. Ebineneka by’omutiini tibabinokola oku namuswata, n’ebineneka by’emizabbibbu tibabinokola oku mukamirya. ⁴⁵ Omuntu omusa, atoola ku bisa ebiri omu mwoyogwe okukola ebisa, n’omuntu akola ebikole ebibbibbi, atoola ku bibbibbi ebiri omu mwoyogwe, okukola ebikole ebibbibbi. Ebintu ebibba omu mwoyo gwa muntu, omunwagwe niibyo ebigutumula.

Abombeki ababiri

(Mat 7:24-27)

⁴⁶ “Lwaki munjeta muti, ‘Musengwa, Musengwa,’ kaisi ni mutakola ebimbakoba? ⁴⁷ Oleke

6:39 6:39 Mat 15:14

6:40 6:40 Mat 10:24-25; Yok 13:16; 15:20

6:44 6:44 Mat 12:33

6:45 6:45 Mat 12:34

mbalage omuntu ng'owaafaanana, iye oyo buli aiza egyendi, kaisi n'awulisisya ebibono byange, era n'abikoleraku. ⁴⁸ Omuntu oyo afaanana ooti yoodi eyayombekere enyumba ng'akuuliire nakimo omusingi mwabiriri, era ni gwabira nakimo ansi paka kwibbaale. Kaisi ogwikendi ogunene owegwatoonyere, n'amaizi gaizula nabuli wantu, era n'omukula ni gubandya okuteeba enyumba eyo, neye ni gutezya kuginyeenya, olwakubba bagyombekere kusani. ⁴⁹ Wazira oodi awulira ebibono byange nandi n'abikoleraku, ali ooti muntu eyayombekere enyumba okwitakali ery'oku ngulu nga takwire kadi musingi. Kaisi oikendi oweyatoonyere, n'alandirya omukula okugiteeba, kale awo n'egwa era n'eweera okwitakali."

7

Okwikirirya kw'omwisulukale oMulooma (Mat 8:5-13)

¹ OYesu oweyamalire okwegesya abantu ababbairero, n'ayaba omu kibuga e Kaperenawumu. ² Wabbairero oMulooma omukulu w'ekibinja ky'abaisulukale 100, eyabbaire n'omugalamawe oguyabbaire ataka eino. Omugalama oyo yabbaire mulwaire, ng'ali kumpi n'okufa. ³ Omukulu w'ekibinja ky'abaisulukale oweyawuliire ebikwata oku Yesu, n'amutumira abamo oku Bayudaaya abakulu, ng'amusaba aize alamy'e omugalamawe. ⁴ Bona owebatuukire egiri oYesu, ni bamwegairira ino nga bakoba bati, "Singa owewabba nga waliwo ogwoli

n'okubbeeraku, kale omusaiza oodi awoomera okumukolera eky'akusaba, ⁵ olwakubba ataka abantu b'eigwanga lyaiswe, era yatwombekeire n'erimo oku makumbaaniro gaiswe."

⁶ Awo oYesu n'ayaba nabo. Neye owebabaire nga bali kumpi okutuuka egibabbaire baaba, omukulu w'ekibinja oyo nago n'atuma abakaagwabe okukoba oYesu bati, "Musengwa, oleke n'okweteganya, olwakubba tinsaanira iwe okwingira omu nyumba yange. ⁷ Era tinsaanira kadi kwiza egyoli okukusangaana. Kale okobere ananyere awo kibono-bubono, era n'omugalama wange yalama. ⁸ Nze zena ndi muntu aali n'abasengwa bange abanfuga, era ng'owendi n'abaisulukale abentwala. Owenkoba onu nti, 'Oyabe,' era ayaba; n'ogondi nti, 'Oize,' era aiza; n'omugalama wange nti, 'Okole kinu,' era akikola."

⁹ OYesu oweyawuliire ebyo, n'amwewunya, kaisi n'aira oku kiyindi ky'abantu ekyabbair kimusengererya, era n'akikoba ati, "Mbakoba nti tinjajiryangaku omuntu ali n'okwikirirya okw'amaani ng'ookwo, waire kadi mu Baisirairi!" ¹⁰ Era abakaagwa ba mukulu wa baisulukale owebakangire omu kisito ky'omukulu oodi nago, ni baajirya ng'omugalamawe alamire.

OYesu azuukiza omutaane wa namwandu

¹¹ Awo ng'ebyo byankabbaawo, oYesu n'ayaba omu kibuga ekibeeta e Naini n'abeegibe aamo n'ekiyindi ky'abantu abandi.

¹² Oweyabbair ng'ali kumpi okutuuka oku muzigo gw'ekibuga, ni wazwerayo abantu nga bagingire omulambo gw'omwisuka n'abakungi

nga bali kusenjaku. Omwisuka oyo yabbaire mwanamoiza w'omukali onamwandu. ¹³ Awo oMusengwa oYesu oweyaboine onamwandu oyo, n'amukwatira ekisa, era n'amukoba ati, "Tiwakunga."

¹⁴ Olwo n'aigerera era n'akwata oku mu-keeka okubabbaire bagingiireku omulambo. Awo ababbaire bagugingire ni beemerera, kaisi oYesu n'akoba ati, "Mwisuka iwe, nkulagira nti, osetuke." ¹⁵ Omwisuka iye oyo eyabbaire afiire n'asetuka n'atyama, era n'atandiika n'okutumula, awo oYesu n'amukanjirya omaaye.

¹⁶ Abantu bonabona ababbairewo, entiisya n'ebakwata era ni bawuuja oKibbumba nga bakoba bati, "Onaabbi omukulu atubbutuki-iremu, era oKibbumba aizire okulokola abantu." ¹⁷ Awo amawuliro ago agakwata oku Yesu ni gasaalaana omu Buyudaaya mwonamwona n'omu kyalo ekiriraine awo.

OYesu n'oYokaana oMubatizi
(Mat 11:2-19)

¹⁸ Awo abeegi ba Yokaana oMubatizi ni bamukobera ebyo byonabyona ebikwata oku Yesu. OYokaana niiye okwetaku ababiri baaku, ¹⁹ kaisi n'abatuma egiri oMusengwa oYesu bamubuulya bati, "Niiwe oKibbumba oguyasuubizire okutuma okwiza okununula abantu, ooba tukuumirire gondi?"

²⁰ Abasaiza abo owebatuukire egiri oYesu, ni bamukoba bati, "OYokaana oMubatizi atutumire egyoli ng'abuulya mbu ati, 'Niiwe oKibbumba oguyasuubizire okutuma okwiza okununula abantu, ooba tukuumirire gondi?' "

²¹ N'oku lunaku oolwo lwona, oYesu n'alamyabantu bangi endwaire n'okubabbingaku emizimu, era n'okwiryawo amaiso ga boofu bangi okubona. ²² Awo oYesu n'airamu abakwenda ba Yokaana ati, "Mukange era mukobere oYokaana ebimuboine n'ebimuwuliire. Ababaire boofu babona; ababaire abaleme, batambula; abagenge balama, ababaire abamasiipe bawulira; abafu bazuukira, n'abadoobi bona basuna enkabi gy'okuwulira aMawuliro aMasa. ²³ Ali n'enkabi omuntu oyo atambuusu-abuusamu."

²⁴ Abakwenda ba Yokaana owebazwirewo, oYesu n'atandiika okubuulya ekiziima ky'abantu ebikwata oku Yokaana ati, "Owemwabire egiri oYokaana omu kitera, mwasuubiire kubona muntu afaanana atya? Mwamwajiirye ng'omuntu omugondi ooti lugada olutengeeta nabuli ompunga owaafuwa? ²⁵ Ooba nga tikiikyo, mwasuubiire kubona muntu afaanana atya? Muntu azwaire ebizwalo ebyebbeeyi? Kadi tiyabaire atyo, olwakubba abazwala ebizwalo ebyebbeeyi era ababba omu bwomi obw'okwetalawusa babba mu bisito bya bakabaka. ²⁶ Aale kale mwabire okubona oYokaana olwakubba yabaire naabbi? Ekinanyerenyeere nabakobera n'okubakobera nti yabaire akiraku okubba naabbi. ²⁷ OYokaana oyo, niye eBiwandiike ogubitumulaku biti:

" 'Aale obone, ntuma omukwenda wange akwekubbembere, okukwewulirya enzira egy-

oyaba.’ ²⁸ Mbakoba nti kasookeede abantu babba oku kyalo kunu, mpaawo muntu akira oYokaana ekitiisya. Neye Iye oKibbumba abala oyo amusemberya omu bwomibwe, waire nga niye abantu ogubanyooma omu bwakabaka bwa Kibbumba, okubba akira oYokaana oyo ekitiisya ekyalimu.”

²⁹ Abantu bonabona ng’ogaitireku n’abasooloji ba musolo owebawulisisirye ebibono ebyo, ni bakakasa amazima ga Kibbumba olwakubba oYokaana yabbaire ababatizire. ³⁰ Neye aBafalisaayo n’abakugu omu by’aMateeka ga Musa ibo babbaire bamalire okugaana entegeka ya Kibbumba egibali, olwakubba babbaire bagaine oYokaana okubabatiza.

³¹ OYesu n’ayongera okukoba ababbaire bamuwulisisya ati, “Abantu ab’omulembe gunu n’abagerya kuuki? Bafaanana naaki?

³² Bafaanana ooti baana abatobato, abazeenya omuzeenyo omu kisaawe abantu okubabona. Batyo nga beezulugumira abanaabwe bati ‘Twabafuwiire emirere omu wembo obusa, neye nandi mubina; kale ni twemba enyembo gy’enima neye nandi mukunga.’ ³³ Ekyo kityo olwakubba oYokaana oMubatizi yabbaire talya waire kunywa nviinyo, mwakobere muti, ‘Aliku omuzimu!’ ³⁴ Tete zena oMwana wa Muntu ndya ebyokulya era nnywa enviinyo era munkoba muti, ‘Omuntu oyo wa gukobbo, era muteemeere, kaisi mukaagwa wa basooloji ba musolo n’abakola ebibbibbi.’ ³⁵ Neye

abantu abo bonabona abakolera oku malabuki ga Kibbumba, bakakasa bati matuuce.”

OYesu n’omukali akola ebibbibibi

³⁶ Lumo omoiza oku Bafalisaayo yayetere oYesu e ika e wuwe oku kiinulo, kale oYesu yena n’aikirirya okwabayo, era n’aingira omu nyumba okulya. ³⁷ Omu kibuga ekyo mwab-bairemu omukali akola ebibbibibi. Kale oweya-manyicirye ati oYesu ali kulya omu nyumba y’oMufalisaayo, n’atwala ecupa erimu okalifuwa ow’akaloosa, ³⁸ n’atuuka n’ayemerera e nyuma okumpi n’ebigere bya Yesu nga waakunga, oluzwanyuma n’akoma awo amazwi. Amaliga ga mukali oyo gamagalikiire oku bigere bya Yesu, kaisi n’abisiimuula n’enziiri egy’oku mutwegwe. Era yadeebereire n’okubinuuna, n’okubisukaku okalifuwa ow’akaloosa.

³⁹ OMufalisaayo oodi eyabbaire acaazire oYesu oweyaboine omukali oyo ekiyabbaire akola, n’akoba omu mwoyogwe ati, “Singa omusaiza onu abbaire naabbi, yandimanyicirye omukali oyo amukwataku atyo ati akola ebibbibibi.”

⁴⁰ Awo oYesu n’abbutula ebiseego by’oMufalisaayo ng’amukoba ati, “Simooni, ndi n’ekinkukoba.” Kaisi iye n’akoba ati, “Musomesya, okobe.”

⁴¹ OYesu niiye okumugerera olugero lunu ati, “Wabbairewo abantu babiri, omukoopi w’empiiya ng’ababanza. Omoiza babbaire ba-mubanza edinaali 500, kaisi ogondi edinaali 50. ⁴² Owebakayire okusasula, bonabona

n’abasoniya. Aale iwe obona oti naani kwibo eyakirireku okumutaka oluzwanyuma?”

⁴³ OSimooni n’airamu ati, “Nseega nti oyo oguyasoniyire eibbanja erikira obunene.” OYesu n’amukoba ati, “Ogusalire kusani.”

⁴⁴ Awo oYesu n’alola oku mukali, kaisi n’akoba oSimooni ati, “Obona omukali onu? Owenyingiire omu nyumbayo, tompaireku amaizi g’okunaaba ebigere, neye onu adoderye ebigere byange n’amaligage, era n’abisiimuula n’okubisiimuula n’enziirigye. ⁴⁵ Iwe tongwireku omu kifubba, neye onu iye okuzwera nakimo Owenyingiire omu nyumba munu, akaali okulekeraawo okunuuna ebigere byange. ⁴⁶ Iwe tonsiigireku okalifuwa omu mutwe, neye onu iye asiigire ebigere byange okalifuwa ow’akaloosa.

⁴⁷ N’olwekyo nkukobera nti bamusonyire ebibbibbibbye ebingi, olwakubba ali n’okutaka kunene. Kaisi era ogubasoniya ebitono, yena abba n’okutaka kwona kutono.”

⁴⁸ Awo oYesu n’akoba omukali nago ati, “Nkusonyire ebibbibbibbyo.”

⁴⁹ Ababbair batyaime awo n’oYesu nga balya ni batandiika okwebuulyangana bati, “Naani onu iye ayezya n’okusonyia abantu ebibbibbi?”

⁵⁰ Awo oYesu n’akoba omukali nago ati, “Olamire olw’okwikiriryakwo, era weeyabire idembe.”

8

Olugero lw’omusigi

¹ OYesu nga yankazwa omukucaala okwo, n'atambula olugendo ng'abita omu bibuga n'omu byalo, ng'alaabba eeri abantu aMawuliro aMasa agakwata oku bwakabaka bwa Kibumba. Omu lugendo oolwo oYesu yabbaire n'abeegibe eikumi na babiri, ² era n'abakali. Neye abakali abo nago ibo oYesu yabbaire amalire okubalamyia endwaire era n'okubabbingaku emizimu, era nga niibo banu: OMalyamu ogubeetanga oMangadaleena iye oguyabbingireku emizimu omusanvu, ³ n'oYowani omuka mukwati w'ensawo wa Kerode ogubeetanga bati Kuuza, n'oSusaana era n'abakali abandi bangi. Abakali abo batoolanga oku byabwe okubbeera oYesu n'abeegibe.

⁴ Omu kiseera ekinyere ekyo ekiziima ky'abantu kinene era ng'abantu bazwa mu buli kibuga ni bakumbaanira egiri oYesu, kaisi n'abagerera olugero lunu ati, ⁵ "Wabbairewo omulimi eyaabire okusiga ensigogye. Oweyabbaire ng'asiga, egimo gyagwire ku nzira, kaisi ni bagyemyaga era enyonyi ni gigirya. ⁶ Era ensigo egindi ni gigwa okwitakali ery'okwibbaale. Neye owegyamerere, ni gikala olwakubba eitakali eeryo lyabbaire likalu. ⁷ Ensigo egindi ni gigwa mwitakali eryabbairemu amawa, kaisi ni gakulira aamo n'ensigo egyo, kale amawa ago ni gagiita. ⁸ N'egindi ni gigwa omwitakali erisa, kale ni gikula, era nabuli nsigo omoiza n'abala ensigo egindi 100." OYesu oweyamalire

okutumula ebyo, n'atumula maaminkirira ati, "Aale omuntu aliku amatwi agawulira, awulisisye era ategeere ekintumula."

⁹ Awo abeegi ba Yesu ni bamubuulya amakulu g'olugero oolwo. ¹⁰ Kale iye n'abairamu ati, "Inywe mwasunire enkabi egy'okumanya ebyama ebikwata oku bwakabaka bwa Kibbumba, neye abantu abandi ibo mbakobera mu ngero, kaisi eBiwandiike binu ebiti bituukirire:

" 'Newankubbaire babonia neye nga tibeezya kumanyica; newankubbaire bawulisisya neye nga tibategeera ebintumula.'

¹¹ "Amakulu g'olugero oolwo niigo gaanu: Ensigo, niikyo ekibono kya Kibbumba. ¹² Ensigo egyagwire oku nzira, niibo abantu abawulira ekibono kya Kibbumba, neye oSitaani n'aiza n'akitoola omu myoyo gyabwe, kaisi ni bakaya okwikirirya era n'okulokoka. ¹³ Kaisi ensigo egyagwire omwitakali ery'okwibbaale, niibo abantu abawulira ekibono kya Kibbumba era ni bakyaniriza n'eisangaalo, neye ni babba ooti bimera ebidamba emiri egyabirira nakimo ansi omwitakali. Ibo baikirirya ekibono kya Kibbumba okumala ekiseera kityayi kiti, kaisi omu kiseera ekyokubakema ni bakizwaku. ¹⁴ Igyo egyo egyagwire omwitakali eryamereremu amawa, niibo abantu abawulira ekibono kya Kibbumba, neye okweraliikirira ebintu by'e kyalo, n'okubabbeyabbeya n'ebiyobusuni n'amasanyu g'ekyalo kinu, ni byaba nga bibamalamu amaani, owebifuga emyoyo gyabwe bibakaisya okukula omu bwomi

bwabwe obw'omwoyo. ¹⁵ Neye ensigo egyo egyagwire omwitakali erisa, niibo abantu abawulira ekibono kya Kibumba n'omwoyo omusa nakimo, kaisi ni bakikuuma era ni beekalangula okukolanga ebikole ebisa."

Eitaala libba ngulu ku kikondo
(Mak 4:21-25)

¹⁶ "Omuntu takwatisya eitaala kaisi n'alifuunikaku ekiibo, ooba n'aliteeka omu mantalike, wazira aliteeka ku kikondo, kaisi abantu abaingira ni beezya okubona ekitangaala. ¹⁷ Ekyo kityo olwakubba buli kintu ekikukuulirirye balikitoolayo, era buli kyama kyalibbutuka. ¹⁸ Kale muwulisisye n'okwekalikica ebinjegesya. Mbakohera nti buli aali nabyo balimwongeraku n'ebindi, kaisi oyo abula, balimutoolaku n'akatyayi kadi akebalibba bamuwaire."

Abaganda ba Yesu n'omaaye
(Mat 12:46-50; Mak 3:31-35)

¹⁹ Awo abaganda ba Yesu n'omaaye ni baaba nga bataka okumubona, neye ni bateesya okumutuukaku olw'ekiziima ky'abantu. ²⁰ Awo omuntu n'akohera oYesu ati, "Omaawo n'abagandabo bali e nza, era bataka okukubona."

²¹ Neye iye oYesu n'airamu ati, "Omama n'abaganda bange niibo abo abawulira ekibono kya Kibumba era ni bakikoleraku."

8:16 8:16 Mat 10:26; Luk 12:2 **8:17** 8:17 Mat 10:26; Luk 12:2

8:18 8:18 Mat 25:29; Luk 19:26

OYesu asirica ogumpunga
(Mat 8:23-27; Mak 4:35-41)

²² Lwabbaire lumu, oYesu n'abeegibe ni bani-ina omu lyato, kaisi n'abakoba ati, "Tusalemu awo twabe oku lubba ludi olw'enyanza." Era ni basimbuka ni baaba. ²³ Owebabbaire baaba, oYesu endoolo ni gimutwala. Awo, ogumpunga ogw'amaani nga gulikumumu n'oikendi ni gwiza, era eryato ni libba ooti lyaizula amaizi, era ibo bonabona ababbairi omu lyato ni babba mu kabbikabbi akananyerenyeere.

²⁴ Awo abeegibe ni baigerera egiyabbairi era ni bamulamuca ni bamukoba bati, "Musengwa, Musengwa, tufa!"

Kale oYesu n'alamuka, era n'akaawuukira ogumpunga n'oikendi, n'amayengo g'oku nyanza era ni biwaaku, era enyanza n'eteeka. ²⁵ Awo n'abuulya abeegibe ati, "Lwaki mudamba okwikirirya?" Neye ibo nga batiire, era nga beewunya n'okwewunya, nga bakobangana bati, "Onu muntu w'engeriki? Alagira ogumpunga era n'amayengo byona ni bimuwulira n'okumuwlira!"

OYesu alamy omusaiza ow'emizimu
(Mat 8:28-34; Mak 5:1-20)

²⁶ Awo oYesu n'abeegibe ni batuuka oku lukalu lw'e kyalu okumpi n'ekibuga ky'aBageraasa, oku musingi kudi nga kiringiriire eitwale ly'e Gali-raaya. ²⁷ OYesu oweyabbairi nga yankatuuka oku lukalu, omusaiza eyabbairi ow'omu kibuga ekyo, era aliku emizimu, n'amusangaana. Iye omusaiza oyo yabbairi amalire ekiseera kinene nga tazwala, era nga iye tabba omu nyumba,

wazira nga iye abba mu mpuku egibali-ikangamu abafu. ²⁸ Kale oweyaboine oYesu, n'aceera ino, kaisi n'agwa oku mazwi omu maisoge, era n'akooka ati, "Onvunaanira niki iwe oYesu oMwana wa Kibbumba oNambulaku aMwagaagana? Nkwegairiire tiwangadya!" ²⁹ Yakobere atyo olwakubba oYesu yabbaire alagiire omuzimu ogwo okuzwa oku musaiza oyo. Emirundi mingi omuzimu ogwo owegwamukwatanga, newankubbaire nga bamukumanga nga musibe n'enjegere, era yagikutulangamu, kaisi omuzimu ogwo ni gumutwalanga omu bitera.

³⁰ Kale oYesu n'amubuulya ati, "Eriinalyo niwe onaani?" Omusaiza oyo nago n'amwiramumu ati, "Ninze oKiziima." Omusaiza oyo yairiremu atyo olwakubba emizimu egyamubbaireku gyabbaire mingi. ³¹ Awo emizimu egyo ni gideeberera okwegairiira oYesu okutagisindika omu Kiina eKitakoma.

³² Era egibabbaire oku musingi awo wabbairewo ekiraalo kinene eky'embizi nga girisya. Kale emizimu egyo ni gyegairira oYesu agiikirirye gingire omu mbiizi egyo, era oYesu n'agiikirirya. ³³ Awo ni gizwa oku musaiza oyo, era ni gingira omu mbiizi egyo. Ekiraalo kyonakyona ni kitantawuka okuzwa e ngulu oku musingi, ni kiyoolookera omu nyanza, era gyonagyona ni gifeera oomwo.

³⁴ Awo abaliisya baagyo owebaboine ekyo ekigwirewo, ni bavulumuka ni baaba bakobera ab'omu kibuga n'ab'omu byalo. ³⁵ Era abantu

ni baaba okubona ekyo ekigwirewo. Owebatuukirewo baajiirye era ng'omuntu nago emizimu nga gimuzwireku. Era omusaiza oyo nago, bamwajiirye atyaime okumpi n'ebigere bya Yesu, kaisi ng'azwaire, era ng'ategeera kusani, kale ekyo ni kibatiisya. ³⁶ Ibo badi ababairewo ng'emizimu gizwa oku musaiza oyo, ni balonserya abantu abandi engeri omusaiza nago egyalamiremu. ³⁷ Olwo abantu bonabona ab'omu kyalo ky'aBageraasa ni basaba oYesu abazwerewo olwakubba babbaire batiire ino. Kale oYesu yena ni yeeniinira omu lyato, era ni yeesimbukira.

³⁸ Awo omu kiseera ekinyere ekyo omusaiza oodi ogubabbingireku emizimu ni yeegairira oYesu amwikirirye ayabe naye. Neye oYesu n'amuseebula ng'amukoba ati, ³⁹ "Okange e waanywe kaisi olonserye abantu baayo ebyo byonabyona oKibumba ebyakukoleire." Kale omusaiza oyo n'atambula okumalaku ekibuga ng'akobera abantu ebintu ebyo byonabyona oYesu ebiyabbaire amukoleire.

*Omwala wa Yairo n'omukali omulwaire
(Mat 9:18-26; Mak 5:21-43)*

⁴⁰ Awo oYesu oweyakangire egiyabaire yankazwa, ekiziima ky'abantu ni kimusangaalira olwakubba ibo babbaire bamukuumiriire. ⁴¹ Awo omusaiza ogubeeta oYairo, nga niye omukulu w'eikumbaaniro, n'aiza n'akotama oku mazwige omu maiso ga Yesu, ng'amwegairira ayabeku e wuwe omu nyumbaye, ⁴² olwakubba omwalawe

ow'emyanka eikumi na mibiri, era nga mwanamoiza, yabbaire ali kumpi kufa.

Era oYesu owebabbair e baaba n'oYairo e wuwe, baabanga neenu ekiyindi ky'abantu kyeguunyira nakimo ino oku Yesu. ⁴³ Neye omu kiyindi ekyo mwabbair emu kalii eyabair e alwaire ekikulukuto ky'eisaaye okumala emyanka ikumi na mibiri,* kaisi era nga mpaawo ayezyerye okumulama. ⁴⁴ Kale omukali oyo n'aigerera e nyuma wa Yesu, kaisi n'akwata oku mugo gw'ekizwalo kya Yesu. Amangu ago ekikulukuto ky'eisaaye ekiyabbair e nakyo ni kikoma.

⁴⁵ Awo oYesu n'abuulya ati, "Naani ankwait-eku?" Bonabona ni beegaana. Kaisi oPeetero n'akoba ati, "Musengwa, abantu bangi abali kukwekusirangaku, era n'okukweguunyirangaku nakimo ino!"

⁴⁶ Neye era oYesu n'akoba ati, "Waliwo agendereire okunkwataku, olwakubba mpuliire ng'amaani agalama ganzwamu."

⁴⁷ Awo omukali oweyaboine nga tayezyerye okwebisa, n'aiza ng'atukuta, kaisi n'agwa oku mazwi omu maiso ga Yesu, oolwo n'amukobera ng'abantu bonabona bawulira ensonga egirire amukwateku, era ng'owaalamiirewo.

⁴⁸ OYesu n'amukoba ati, "Namuwala, olamire olw'okwikiriryakwo. Oyabe mwidembe."

⁴⁹ Awo oYesu oweyabbair e ng'akaali atumula, omukwenda eyazwire omu kisito ky'omukulu w'eikumbaniri, n'aiza, era n'akobera omukulu

* **8:43** 8:43 EBiwandiike ebimo ebyeira byongeraku biti, Era ng'amaliire ebintubye omu basawo.

oyo ati, “Omwalawo afiire. Kale oleke n’okuleyerya oMusomesya.” ⁵⁰ Neye oYesu iye oweyawuliire ekyabbaire kituukirewo, n’akoba omukulu w’eikumbaaniro, oYairo ati, “Tiwaatyia, neye obbe na kwikirirya, era omwalawo ayaba kubba mwomi tete.”

⁵¹ OYesu oweyatuukire e wa Yairo, n’aloberya abandi bonabona okwingira naye omu nyumba, okutoolaku oPeetero, n’oYokaana, n’oYaakobbo, era n’ababyaire b’omwana. ⁵² Ibo abantu bonabona ababbairero babbaire mu kukunga era nga bakubba nduulu olw’omwana oyo. Kaisi oYesu n’abakoba ati, “Mulekeraawo okukunga olwakubba omwana tafiire, wazira agonere ndoolo.”

⁵³ Awo bonabona ni bamusekerera, olwakubba ibo babbaire bamaite bati omwana afiire. ⁵⁴ Neye iye oYesu n’amusetula engalo, kaisi n’amweta ati, “Mwana wange, osetuke!” ⁵⁵ Awo omwana n’airiwa, era amangu ago n’ayemerera. OYesu n’alagira ati, “Mumuweeku ekyokulya alye.” ⁵⁶ Ababyaire b’omwana oyo ni beewunya. Kaisi oYesu n’abasisiitira okutakoberaku omuntu kadi moiza ekyo ekibbairewo.

9

*OYesu atuma abeegi eikumi na babiri
(Mat 10:5-15; Mak 6:7-13)*

¹ Lwabbaire lumu oYesu n’ayeta abeegibe eikumi na babiri, n’abakumbaanirya aamo egiyabbaire, kaisi n’abawa amaani n’obwezye okubbinganga emizimu gyonagyona oku bantu n’okulamyanga endwaire. ² Era n’abatuma

baabe bakobere abantu bonabona ebintu ebikwata oku bwakabaka bwa Kibbumba, era balamy'e n'abalwaire. ³ Era n'abakoba ati, "Omu lugendo oolwo, timwaba n'akantu konakona, newankubbaire mukoomero, newankubbaire ekisawo ng'eky'omuntu aali omu lugendo, newankubbaire ekyokulya, waire mpiiya, era buli muntu tiyaaba kadi n'ekizwalo kyokubiri. ⁴ Ekisito ekimwaingirangamu ni babasangaalira, munyere oomwo niimwo egimubba muzwereenge paka owemwalizwa omu kibuga ekyo. ⁵ Singa abantu owebagaananga okubasangaalira omu kibuga kyabwe, inywe nga mwezwerawo era owemwabbanga muzwawo, mwekunkumulyengeku n'enkungu egibba gibakwaite oku bigere byanywe, ng'akamanyiciryo k'obujulizi obulaga okuvunaana abantu abo." ⁶ Kale awo abeegibe ni baaba, ni batambula kyalo ku kyalo, nga balaabba eeri abantu aMawuliro aMasa era nga balamy'a n'abalwaire nabuli wantu egiatuukanga.

⁷ Awo oKerode, omufugi w'eitwale ly'e Galiraaya, n'awulira byonabyona ebyabbaire biri kubbangawo, kale ni bimusobera ino olwakubba abantu abamo bakobanga bati, "OYokaana oMubatizi azuukiire!" ⁸ Abandi ibo nga bakoba bati, "Eriya abonekere," kaisi n'abandi bati, "Omoiza oku banaabbi ab'eira azuukiire." ⁹ Neye oKerode iye n'akoba ati, "OYokaana, ninze nalagiire ni bamutemaku omutwe, tete oyo naani ogumpuliraku ebyenkana awo?" Era n'ataka oku-

9:5 9:3-5 Luk 10:4-11; Bik 13:51
6:14-15; Luk 9:7-8

9:8 9:7-8 Mat 14:1-12; Mak

mubonaku.

OYesu aliisya abantu 5,000

(Mat 14:13-21; Mak 6:30-44; Yok 6:1-14)

¹⁰ Abatume owebakangire, bakobeire oYesu byonabyona ebibabbaire bakolere. Awo oYesu n’abeegibe ni basodoka bonkani okusimba okwaba omu kibuga ekibeeta Bbesusaida. ¹¹ Neye era ekiziima ky’abantu ni kimanyica oYesu egiyabbaire ayaba era ni bamusengererya. Era yena yabasangaalire, kaisi era n’atumula nabo oku bikwata oku bwakabaka bwa Kibumba, era n’alamyanya n’okulamyanya abantu bonabona abababaire abalwaire.

¹² Akanaigolo awo, abeegi ba Yesu eikumi na babiri ni batuukirira oYesu, era ni bamukoba bati, “Oseebule abantu baabe omu byalo n’omu bifo ebindi ehiriraine aanu, egibeezya okusuna ekyokulya n’ew’okulambaala, olwakubba aanu tuli mu kifo ky’omu kitera omunambulamu kantu k’okulya.”

¹³ Neye iye oYesu n’abakoba ati, “Niinywe omubbe mubawe ekyokulya balye.” Ibo ni bamwiramu bati, “Tulikuuwo n’emigaati mitaanu gyonkani, n’enyanyi ibiri. Amo okutoolaku nga twaba ni tugulira-buguliri ekiziima ky’abantu kinu kyonakyona ekyokulya!” ¹⁴ Abasaiza ababbairwo babbaire ooti 5,000.

Neye oYesu n’akoba abeegibe ati, “Mubatyamisye mu bibbubbu nga buli kimo kirimu abantu ooti 50.” ¹⁵ Awo abeegibe ni bakola batyo, era abantu bonabona ni batyama. ¹⁶ Awo oYesu n’atoola emigaati emitaanu n’enyanyi eibiri, kaisi n’alingirira omwigulu, era ni

yeebalya oKibbumba kaisi n'abivunavunamu. Oluzwanyuma n'abikwatisya abeegibe okubiin-ula abantu. ¹⁷ Era abantu bonabona baliire ni baikuta, era abeegibe ni bakumbaania ebitundutundu ebyafiikireku, ni baizulya ebiibo ikumi na bibiri.

*OPeetero abbutula oYesu ekyali
(Mat 16:13-19; Mak 8:27-29)*

¹⁸ Lwabbairre lumu, oYesu yabbairre nga niye yenkani aali kusaba oKibbumba, era nga n'abeegibe baliwo, awo oweyamalire n'ababuulya ati, "Abantu banjeta naani?"

¹⁹ Ibo ni bairamu bati, "Abamo bakweta bati mbu Yokaana oMubatizi, n'abandi bati mbu Eriya, kaisi n'abandi bakoba bati, mbu niwe omoiza oku banaabbi ab'eira azuukiire."

²⁰ Awo oYesu n'ababuulya ati, "Kaisi inywe munjeta naani?" Iye oPeetero n'amwiramu ati, "Niiwe oKurisito nago oKibbumba oguyasukireku amafuta."

²¹ Awo oYesu n'abasisiitira ino era n'abalagira ekyo tibakikoberaku omuntu kadi moiza. ²² Era n'akoba ati, "OMwana wa Muntu bateekwa okumugadya ino, n'abantu abakulu omwigwanga n'abakabona abakulu, n'abakugu omu by'aMateeka ga Musa okumugaana. Era bali n'okumwita neye oluzwanyuma lw'enaku ibiri, oku lwokusatu yalizuukira."

²³ Awo n'akoba abantu bonabona ati, "Buli muntu ataka okubba musengereri wange, ali n'okwerabira ekyali. Era ni yeetiika buli lunaku

omusalabbagwe ogwa kugada olw'obwakabaka bwa Kibbumba, era n'ansengererya. ²⁴ Ekyo kityo olwakubba buli agezyaku okulamy obwomibwe okululwe, yalibufirwa, neye buli afirwa obwomibwe okulwange, yalibulamy. ²⁵ Era kirimu mugasoki omuntu okusuna obusuni bwonabwona obwa ku kyalo, neye kaisi ni kimuzweramu okujigirika, ooba ni yeereetera okufirwa obwomibwe? ²⁶ Singa omuntu yenayena ankwatira nze n'ebibono byange ensoni, nze zena onu oMwana wa Muntu nalimukwatira ensoni ku ludi owenaliizira omu kitiisya kyange, n'omu kitiisya kya Bbaabba, n'omu ky'abamalaika abeeru. ²⁷ Era mbakobera amazima nti abamo oku bantu abali aanu, tibalifa nga bakaali okubonaku obwakabaka bwa Kibbumba nga bukola omu bantu n'amaani."

*Okucuuka kw'emboneka ya Yesu
(Mat 17:1-8; Mak 9:2-8)*

²⁸ Owewabitirewo enaku ooti munaana ng'oYesu amalire okutumula ebyo, n'ayaba n'oPeetero, n'oYokaana, n'oYaakobbo oku lusozi okusaba oKibbumba. ²⁹ Kale oYesu oweyabbaire ng'ali kusaba, emboneka y'omu maisoge necuuka, era ebizwalobye, ni bimirikiinya ooti kumesya kwa ikendi. ³⁰ Awo, oMusa n'Eriya, ³¹ ni beeruka omu kitiisya era ni batumula naye oku ngeri egiyabbaire ayaba okufaamu omu Yersaalemi, ng'atuukirirya entegeka ya Kibbumba. ³² OPeetero n'abainaye, ibo endoolo gyabbaire gibatwaire, neye owebalamukire, ni

9:23 9:23 Mat 10:38; Luk 14:27 **9:24** 9:24 Mat 10:39; Luk 17:33; Yok 12:25

babona ekitiisya kya Yesu, n’abasaiza ababiri ababbaire beemereire naye. ³³ Abasaiza abo owebabbaire bazwawo egiri oYesu, oPeetero n’akoba oYesu ati, “Musengwa, kisa nti tuli aanu. Era oleke tulukewo obusiisira busatu, akamo kako, akandi ka Musa, n’akandi k’Eriya.”

³⁴ Neye oPeetero oweyabbaire ng’akaali atumula ebyo, ekireri ni kiiza ni kibabbuunaku bonabona ababbaire awo nga kitwaliiryemu n’oPeetero aamo n’abainaye. Abeegi ba Yesu ni batya ino ng’ekireri kibabbuunaku. ³⁵ Awo eigono ni lizwera omu kireri ekyo, nga likoba liti, “Onu niye oMwana wange, ogunerondeiremu, mumuwulisisye.” ³⁶ Eigono oweryamalire okutumula, abeegi ba Yesu baabire okwewukirya ng’oYesu asigairewo yenkani. Abeegi ba Yesu basirikire n’ekintu ekyo ekibabbaire baboine, era ni batakikoberaku omuntu ogondi yenayena okumalaku enaku egyera.

OYesu alamyā omwisuka ow’omuzimu
(*Mat 17:14-18; Mak 9:14-27*)

³⁷ Oku lunaku olwairireku, oYesu n’abeegibe abasatu ni bazwa oku lusozi, kaisi ekiziima ky’abantu ekinene ni kiiza okusangaana oYesu. ³⁸ Awo omusaiza eyabbaire omu kiziima ky’abantu ekyo n’ayeterera ati, “Musomesya, nkwegairire, okwatire omutaane wange ekisa, kaisi neenu mwanamoiza! ³⁹ Cooka omuzimu gutira okumukwata, kaisi n’aceera, era n’okumudegezerya, neenu waafuukira eifulo omu munwa. Era omuzimu ogwo tigumuwaaku

eidembe naire, gusiiba kumukubbyagirawo era n'akunukiaga kale ni gubbanga gubitya kub-bikubbi obwomibwe. ⁴⁰ Cooka nsabire abeegibo okugumubbingaku, neye ni bakaya.”

⁴¹ Kale oYesu n'airamu ati, “Abantu inywe ab'omulembe gunu ababula okwikirirya era ab'eitalo, nalimala na inywe kiseera kyenkana aina nga mbaguminkiriza?” Awo n'akoba oiteeye w'omwisuka ati, “Oleete aanu omu-taanewo.”

⁴² Kaisi era omwisuka owebabbaire nga bamutwala egiri oYesu, omuzimu nago era ni gumukubba ekigwo, era ni gumudegezerya. Neye oYesu n'agukaawuukira, era n'alamya omwisuka oyo kaisi n'akanjirya n'okumukanjirya oiteeye. ⁴³ Abantu bonabona ababbairero ni beewunya olw'okukola kw'obwezye wa Kibbumba.

Awo abantu owebabbaire bakaali beewunya byonabyona oYesu ebiyabbaire akolere awo, oYesu iye n'akoba abeegibe ati, ⁴⁴ “Mwulisisye n'okwekalikica ebibono binu ebintaka okubakobera: OMwana wa Muntu baaba okumulyamu olukwe era bamuweeyo eeri ab'obwezye.” ⁴⁵ Neye ibo kadi kumanyica ekyo ekyakobere olwakubba amakulu gaakyo gabbaire mainike, kaisi tete ni batya okugamubuulya.

Naani akira abainaye ekitiisya?

(Mat 18:1-5; Mak 9:33-37)

⁴⁶ Lwabbaire lumo abeegi ba Yesu ni baakana nga beebuulyangana bati naani akira ekitiisya mwibo. ⁴⁷ Neye oYesu n'amanyica ek-

ibaseega, kale n'ayeta omwana omutomuto era n'amukoba okwemerera awo okumpi naye. ⁴⁸ Kale n'abakoba ati, "Buli asangaalira omwana ooti yoonu okulwange, abba asangaaliire ninze. Era buli ansangaalira, abba asangaaliire Kibumba oyo eyantumire, olwakubba oyo akira okweica mwinywe nywenanywena, niye akira okubba ow'ekitiisya."

⁴⁹ Awo oYokaana n'akoba ati, "Musengwa, enyumaku awo twaboine omuntu ng'abbinga emizimu oku bantu ng'akolesya eriinalyo, neye iswe ni tugezya okumuloberya olwakubba timusengereriwo aamo na iswe." ⁵⁰ Neye oYesu n'amukoba ati, "Oyo tumumuloberyanga, olwakubba omuntu atabalwanisya, oyo yena abba munanywe."

Ab'e Samaaliya bagaana okusangaalira oYesu

⁵¹ Awo olwatuukire, enaku gya Yesu owegyabbaire nga giri kumpi okutuuka egy'okumutwala omwigulu, oYesu n'asalawo okwaba e Yerusaalemi. ⁵² Era n'atuma abakwenda beesooke okwaba omu kitundu ky'aBasamaaliya, okumutegekerayo. ⁵³ Neye abantu baayo ni bagaana okumusangaalira olwakubba yabbaire asalirewo okwaba e Yerusaalemi. ⁵⁴ Kale abeegibe, oYaakobbo n'oYokaana, owebakiwuliire, ni baaba bakoba oYesu bati, "Musengwa, otaka twete omusyo okuzwa omwigulu gubajigirice*?" ⁵⁵ Neye oYesu

9:48 9:48 Mat 10:40; Luk 10:16; Yok 13:20 * **9:54** 9:54 EBi-wandiike ebimo ebyeira byongeraku biti Ng'Eriya oweyakolere.

9:54 9:54 2Ba 1:9-16

n’agaluka n’abalolaku kaisi n’abakaawuukira.†
 56 Kale ni baaba omu kitundu ekindi.

Ekyofirwa ng’oli mwegi wa Yesu
(Mat 8:19-22)

57 Awo oYesu n’abeegibe owebabbaire nga batambula, ni wabbaawo omuntu eyakobere oYesu ati, “Natambulanga na iwe egiwayabiranga wonawona.”

58 Neye oYesu n’amukoba ati, “Amakibbwe igo gali n’ebiina egigabba, n’enyonyi gyona giri n’ebisaasiriwo, neye oMwana wa Muntu iye adambaku kadi n’ejajica olubba.”

59 Kaisi ni wabbaawo ogondi oYesu oguyakobere ati, “Otambulenge na nze.” Neye iye n’amwiramumu ati, “Musengwa, naliiza nga mmalire okuliika obbaabba.”

60 Neye oYesu n’amukoba ati, “Oleke abo abali n’obwomi obw’omwoyo obufu baliike abafu baabwe, neye iwe oyabe kulaabba eeri bantu ebikwata ku bwakabaka bwa Kibbumba.”

61 Tete era ni wabbaawo omuntu ogondi eyakobere oYesu ati, “Musengwa, njaba okubba musengereriwo, neye onganye nkange nkobereku ab’e waiswe kaisi.”

62 Neye oYesu n’amwiramumu ati, “Ng’omuntu akwata enkumbi y’ente kaisi n’alolyamika e nyuma owaatabba wamugaso, atyo n’omusengereri wange alolyamika e nyuma

† 9:55 9:55 EBiwandiike ebimo ebyeira byongeraku biti, “Timumaite oMwoyo ogumuweererya. Ekyo kityo olwakubba oMwana wa muntu tiyaizire kujigirica bwomi bwa bantu, wazira kubulokola.” 9:61 9:61 1Ba 19:20

tabba wamugaso omu bwakabaka bwa Kibbumba.”

10

OYesu atuma abeegibe 72

¹ Ebyo owebyawoire, oMusengwa oYesu n'alonda abeegi abandi 72,* kaisi n'abatuma babiri babiri ibo beesooke mu buli kibuga n'omu buli kifo iye egiyabbaire yatira okwabamu. ² Era n'abakoba ati, “Ebyokukungula bingi, neye abatambi niibo abatono. Kale musabe onyere akola oku byokukungula, ayongere okusindika abatambi abandi omu musirigwe. ³ Aale atyanu mwabe, neye mwekuume olwakubba mbatuma nga muli ooti ntaama entonto akati omu misege, ibyo ebisolo ebya kabenje. ⁴ Timwaba n'omugoba ogubateekamu empriya, newankubbaire ekisawo ng'eky'omuntu aali omu lugendo, newankubbaire kadi peeya y'engaito eyokubiri. Era timugayaliranga omu nzira nga musugirya bantu. ⁵ Buli nyumba egimwaingirangamu, mwekerenge kukoba muti, 'Eidembe libbe n'abantu ab'omu nyumba eenu.' ⁶ Singa yalibbaamu omuntu awoomera okusuna eidembe, iryo eeryo erimumutakirya lyalisigala naye. Era singa timwalibbaamu omuntu alisaanira, eidembe eeryo lyalibairira. ⁷ Omu nyumba eyo nago, niimwo egimubba muzwerenge amantasengukasenguka. Mulyenge era

* **10:1** 10:1 72. EBiwandiike ebimo ebyeira bikoba biti, 70.
10:2 10:2 Mat 9:37-38 **10:3** 10:3 Mat 10:16

munywenge ebibabawanga oomwo olwakubba omutambi awoomera empeeraye.”

⁸ “Owemwaingiranga omu kibuga ni babasangaalira, mulyenge ebyokulya ebibabainulanga. ⁹ Era mulamyenge n’abalwaire abali omu kibuga ekyo nago, n’okukoba abantu baamu bonabona muti, ‘Obwakabaka bwa Kibumba bubaigerereire.’ ¹⁰ Neye owemwaingiranga omu kibuga ni batabasangaalira, mwemereranga omu nguudo gyaco ni mukoba muti, ¹¹ ‘N’enkungu egy’omu kibuga kyanywe egibbaire gitukwaite oku bigere giinu tugyekunkumulyaku okulagisya nga muliku omusango. Era mumanye kinu muti obwakabaka bwa Kibumba bwigereire.’ ¹² Mbakobera nti oku lunaku olw’okusaliraku emisango, abantu b’omu kibuga ky’e Sodoma balibasalira ekibonerezo ekiri gwai gwai okukiraku ekyo ekibaliwa abantu abo abagaananga okubasangaalira.

¹³ “Wobe! Ala inywe abantu b’omu kibuga ky’e Kolaziini n’eky’e Bbesusaida nga mulabire! Kiri kityo olwakubba ebyewunyo ebibakolere mwinywe singa babbaire babikolere mu kibuga ky’e Tiiro n’eky’omu Sidoni, abantu baayo nga beenenyere era ni bazwala n’ebikotiya, n’okwepuuda eikoke okulagisya bati beenenyere. ¹⁴ Neye oku lunaku olw’okusaliraku emisango, abantu b’omu Tiiro n’omu Sidoni balisuna ekibonerezo ekiri gwai gwai oku kyanywe.

10:7 10:7 1Ko 9:14; 1Te 5:18 **10:11** 10:10-11 Bik 13:51
10:11 10:4-11 Mat 10:7-14; Mak 6:7-11; Luk 9:3-5 **10:12** 10:12
 Nta 19:24-28; Mat 10:15; 11:24 **10:13** 10:13 Isa 23:1-18; Zek
 26:1-28:26; Yow 3:4-8; Amo 1:9-10; Zak 9:2-4

¹⁵ Kaisi oolwo inywe abantu b’e Kaperenawumu, niinywe abebaligulumalya okutuuka omwigulu? Ala kadi, era oKibbumba ayaba kubasindika mu geyeena.”

¹⁶ Awo n’akoba abeegibe ati, “Abo ibo abawulisisyanga ebimwegesya, baabbanga bawulisisirye ninze. Era abo ibo ababatalanga, baabbanga batalire ninze. Kaisi abo ibo abantalanga, baabbanga batalire Kibbumba oyo iye eyantumire.”

¹⁷ Awo abeegi ba Yesu badi 72 ni bakanga egiri oYesu n’eisangaalo era ni bakoba bati, “Musengwa, omu liinalyo, n’emizimu gyona gyatubuliranga!”

¹⁸ Neye Iye oYesu n’abakoba ati, “Naboine oSitaani ng’agwa okuzwa omwigulu n’okumesya ooti kumesya kwa ikendi. ¹⁹ Era kagira mbawaire obwezye okuwangula amaani g’obulabe bwa buli kika, era waire ewaabbangawo okwema oku mpiri n’oku biwuuka ebyasaagwa, era mpaawo akabbikabbi akabatuukangaku. ²⁰ Neye timwajaagaana lw’emizimu kubawulira kyonkani, wazira mujaagaane olwakubba amaliina gaanywe mawandiikisye omwigulu.”

²¹ Awo omu kiseera ekinyere ekyo, oMwoyo oMweru n’aizulya oYesu eisangaalo, era oYesu n’akoba ati, “Nkuwuuja, Bbaabba, iwe oMusengwa afuga eigulu n’oku kyalo, olwakubba amazima ganu wagabisire abalabuki n’abategeera, kaisi n’ogamanyikisya bantu ababula ekibamaite

ooti baana abatobato. Niikyo ekyo Bbaabba olwakubba ikyo ekyo kwabbairaire kutakakwo.

²² “OBbaabba yampaire obwezye oku bintu byonabyona. Era nze ng’oMwana mpaawo ammaite okutoolaku oBbaabba. Era mpaawo amaite oBbaabba okutoolaku nze oMwana, n’omuntu oyo iye ogumbannondere nti amanye oBbaabba.”

²³ Awo oYesu n’aira oku beegibe nga basigaire bonkani, kaisi n’akoba ati, “Muli b’enkabi okubona binu ebimubona!” ²⁴ Ekyo kityo olwakubba mbakobera nti abanaabbi bangi n’abakabaka beegombere okubona ebimubona, ni batabibona, n’okuwulira ebimuwulira ni batabiwulira!”

Olugero lw’oMusamaaliya eyalagire ekisa

²⁵ Kale awo, omukugu omu by’aMateeka ga Musa n’asetuka omu lukumbaana okugezesya oYesu n’ekibuulyo ati, “Musomesya, niki ekinakola okusuna obwomi obutawaawo?”

²⁶ Awo oYesu n’amwiramumu ati, “Amateeka ga Musa gakoba gatya? Ogasoma otya?” ²⁷ Iye omusaiza n’airamu ati, “Otakenge oMusengwa oKibbumbawo n’omwoyogwo gwonagwona, n’obwomibwo bwonabwona, n’amaanigo gonagona, n’ebiseegoby byonabyona. Era otakenge omuntu omwinawo, ng’oweweetaka iwe onyere.” ²⁸ Iye oYesu n’amukoba ati, “Oiriremu kusani. Okolenge otyo, era walisuna obwomi obutawaawo.” ²⁹ Neye omukugu omu

10:22 10:22 Yok 3:35; 10:15 **10:27** 10:27 Lee 19:18; Ama 6:5

10:28 10:25-28 Mat 22:35-40; Mak 12:28-34 **10:28** 10:28 Lee 18:5

by'aMateeka ga Musa olw'okutaka okulaga ati ekyabwirye kibbaire kyamakulu, era tete n'abuulya oYesu ati, "Omuntu omunange oyo, niye aliina?"

³⁰ OYesu leero n'airamu mulugero ati, "Wabbairewo omusaiza eyabbaire azwa e Yerusaalemi, ng'aserengeta okwaba e Yeriko, kaisi n'agwa omu batemo. Kale ni bamukubba, ni bamwambulya, era ni bamutoolaku n'ebintu ebindi ebiyabbaire nabyo, kaisi ni bamulekaawo oku luguudo ng'abulaku katono kati okufa.

³¹ Kale ni wabbaawo okabona, era yena eyabbaire abita omu nzira enanyere eyo, neye oweyamuboine yakikimitire ku mbale kumwebitiraku.

³² Era n'oMuleevi yena yakolere kinyere ekyo atyo olwakubba yena oweyatuukire omu kifo ekyo n'amubona, era yena yakikimitire ku mbale kumwebitiraku.

³³ Neye iye oMusamaaliya oweyabbaire oku lugendolwe, era n'atuuka omukubbe oyo egiyabbaire kaisi n'amubona, yamukwatiire ekisa.

³⁴ Kale awo n'amwigereraku, n'amusuka obulezi omu biso, era n'abisibaku ebiwero. Oluzwanyuma n'amuteeka oku mpundawe iye oMusamaaliya oguyabbaire atambuliraku, era n'amutwala omu nyumba y'abantu abali omu njendo egibapangisyanga ni yeeyongera okumujanjabya.

³⁵ Oku lunaku olwairireku, n'atoola edinaali ibiri, n'agiwa onyere enyumba ya bageni eyo, era n'amukoba ati, 'Omujanjabe. Empiia gyonagyona egiwalikolesya nga

gibitawo mu ginu, nalikusasula amaira.’

³⁶ “Naani kwabo abasatu, ogwoseega oti ni-
iye yabbaire omwinaye w’oodi eyagwire omu
batemo?” ³⁷ Omukugu omu bya Mateeka ga
Musa n’airamu ati, “Oodi eyamukwatiire ekisa.”
Kale awo oYesu yena n’amukoba ati, “Wena aale
atyanu oyabe okolenge otyo.”

OYesu acaalira oMaliza n’oMalyamu

³⁸ Awo oYesu n’abeegibe owebabbairu omu
lugendo, nga baaba e Yerusaalemi, oYesu
n’atuuka omu kitundu omwabbairu omukali
eriinalye bati Maliza, kale n’amucaaza omu
nyumbaye. ³⁹ OMaliza yabbaire n’omugandawe
ogubeetanga bati Malyamu. OMaliamu oyo
iye n’atyamira nakimo kumpi n’ebigere bya
Musengwa, nga waawulisisya ekibonokye.
⁴⁰ Neye oMaliza iye yabbaire mu mizingitano
gy’okutegeka kyokulya. Kale oMaliza
oluzwanyuma n’ayaba n’abuulya oYesu ati,
“Musengwa, iwe tofaayo ng’omuganda wange
andekeire emirimo zenkani? Aale kaade
omukobeku aize ambeereku.” ⁴¹ OMusengwa
oYesu n’amwiramumu ati, “Maliza, Maliza,
weeraliikiriire era oli kutegana n’ebintu bingi
ebitagasa, ⁴² neye kaisi ng’ekyetaagisya einu
kiri kimo kyonkani. OMaliamu iye kiikyo
eky’alonderewo nga nago niikyo ekikiraku
obusa era ekibatalimutoolaku kadi.”

11

*OYesu ayegesya abeegibe okusaba
(Mat 6:9-13; 7:7-11)*

¹ Lumo oYesu yabbaire awantu ng'asaba oK-ibbumba. Oweyamalire, omoiza oku beegibe n'amukoba ati, "Musengwa, wena otwegesye okusaba, ng'oYokaana oweyayegeserye abeegibe." ² Awo oYesu n'abakoba ati, "Owemubbanga musaba, mukobenge muti:

'Itewaiswe, eriinalyo baliwe ekitiisya, obwak-abakabwo bwize.*

³ Otuwe buli lunaku ekyokulya ekitwetaaga.

⁴ Era otusoniye ebibbibbi byaiswe,
olwakubba swena tusoniya buli atukola ebitulunya.

Era tiwatuleka okugwa omu bikemo.' "†

⁵ Awo n'abakoba ati, "Singa omoiza kwinywe abba n'omukaagwawe, kaisi n'oyaba egyali omu kiire akati n'omukoba oti, 'Munange, onkoopeku obusye, ⁶ olwakubba omukaagwa wange azwa okungwaku awo ng'ali omu lugendolwe, neenu mbula ekinamwinula.' ⁷ Awo kaisi oodi omukaagwawo, n'airamu ati, 'Munange mbulanago agakakaduka olwakubba nze mmalire okweigala, era nze n'abaana bange twegoneire. Kale timpezya kusetuka okukubbeera naire.'

⁸ Mbakobera nti newankubbaire ng'abbaire tiyasetuke okumuwa ekintu, neye aira n'asetuka n'amuwa kyonakyona ekyataka tirwakubba nti

* **11:2** 11:2 EBiwandiike ebindi byongeraku biti, Ebyotaka babikole oku kyalo ng'owebabikola omwigulu. † **11:4** 11:4 EBiwandiike ebimo byongeraku biti, Neye otununule okuzwa eeri omubbimubbi.

mukaagwawe neye lw'okumwegairira n'eiganyi. ⁹ Kale mbakoba nti musabenge, era mwalisuna; munoonienge, era mwalibona; mukonkonenge oku lwigi, era balibaigulirawo, ¹⁰ olwakubba buli asaba asuna, era oyo anoonia abona, n'oyo akonkona oku lwigi bamwigulirawo.

¹¹ “Era naani kwinywe oiteeye w'omwana, awa omwanawe ompiri omukifo kya nyanyi ogwabba amusabire,‡ ¹² ooba amuwa ekiwuuka kidi ekyasaagwa nga iye omwana amusabire igi? ¹³ Aale obanga inywe abakola ebibbibbi mumaite okuwa abaana baanywe ebirabo ebisa, kaisi oItewaanywe ow'omwigulu tiyalikirawo ino okuwa abo abamusaba oMwoyo oMweru?”

OYesu n'oBberuzebbuli
(Mat 12:22-30; Mak 3:20-27)

¹⁴ Lwabbaire lumo oYesu n'abbinga oku muntu omuzimu gwa bububbu. Awo owegwamuzwireku, n'atandiika okutumula era abantu ababbairawo ni beewunya. ¹⁵ Neye abamo kwibo ni bakoba bati, “Abbinga emizimu ng'akolesya bwezye bwa Bberuzebbuli omukulu waagyo.” ¹⁶ N'abandi ni bamusaba neye nga bamukema, bati abawe akamanyiciryo akalaga kati obwezyebwe buzwa giri Kibbumba.

¹⁷ Neye iye oYesu oweyamanyicirye ebiseego byabwe, n'abakoba ati, “Abantu ab'obwakabaka obumo owebeesalamu obwakabaka bwabwe obwo bujigirika. Era n'owekibba kisito kyona

‡ **11:11** 11:11 EBiwandiike ebimo bikoba biti, Eibbaale omukifo ky'ekyokulya. **11:15** 11:15 Mat 9:34; 10:25 **11:16** 11:16 Mat 12:38; 16:1; Mak 8:11

owekyesalamu kisansukana. ¹⁸ Inywe mukoba muti mbinga emizimu oku bantu nga nkoleserye bwezye bwa Bberuzebbuli, neye singa oSitaani yena yeerwanisya, obwakabakabwe bubbaawo butya? ¹⁹ Aale obanga nze mbinga emizimu nga nkolesya bwezye bwa Bberuzebbuli, kaisi abasengereri baanywe ibo babba bagibbinga nga bakolesya bwezye bwani? Kagira ibo balibasalira inywe omusango olwakubba ibo bamaite bati bagibbinga lwa bwezye bwa Kibbumba. ²⁰ Neye owekibba kiti mbinga emizimu oku bantu nga nkolesya bwezye bwa Kibbumba, aale obwakabaka bwa Kibbumba bubba atyanu bubabbutukiiremu.

²¹ “Omuntu ow’amaani, aali n’ebyokulwanisya, owaakuuma enyumbaye, ebintubye bibba nakusani. ²² Neye amukira amaani obwamulumba era n’amuyinga, atwala ebyokulwanisya by’omuntu oyo ebyabbaire yeesiga, era n’agaba n’ebintu ebyamunyagireku.

²³ “Kale iye oyo atabba oku luuda lwange, abba mulabe wange, era iye atambeera okusooloja, asalaanica.”

²⁴ OYesu yeeyongeire okubeegesya ati, “Omuzimu oweguzwa oku muntu, gulaaduukira omu bitera, nga gunoonia egigwawuumulira. Neye owegukayaku, awo gukoba guti, ‘Neekangira egi-naabbanga.’ ²⁵ Kale owegukanga gwaja omuntu oyo ng’ateereire kusani era ng’ali ooti nyumba enjeye era entegeke kusani, ²⁶ atyanu awo gwaba ni gusyoma emizimu egindi musanvu egigukiraku obubbibubbi, ni gingira ni gibba

omu muntu oyo. Kale ekyo kizweraku embeera y'omuntu oyo ey'oluzwanyuma okubba mbiibbi okukiraku eedi eyasookere."

²⁷ Awo oYesu oweyabbaire ng'akaali atumula ebyo, omukali eyabbaire omu kiziima ky'abantu ekyabbaire awo, n'akooka ng'akoba oYesu ati, "Omukali eyakubyaire, era n'amabeere ageway-onkere nga by'enkabi!" ²⁸ Neye iye oYesu n'airamu ati, "Tete-so abali eino n'enkabi niibo abo abawulira ekibono kya Kibbumba era ni bakikoleraku."

Abantu basaba oYesu akamanyiciryo

(Mat 12:38-42)

²⁹ Kale awo omu kiseera ekyo, abantu bangi ni beeyongera okwaba okukumbaanira awo oYesu egiyabbaire, kaisi era n'akoba ati, "Abantu b'omulembe gunu abakola ebibbibbi, ibo basaba kamanyiciryo, neye mpaawo akenabawa okutoolaku ako aka naabbi Yona. ³⁰ Aale ng'oYona oweyabbaire ng'akamanyiciryo eeri abantu b'e Nineeve, atyo n'oMwana wa Muntu waayaba okubba eeri abantu b'omulembe gunu.

³¹ Okabaka omukali ow'omu kyalo ekiriraine e maserengeta wa Isirairi, yalisetuka ng'abantu b'omulembe gunu babasalira omusango, era n'abalumiriza omusango okubasinga olwakubba yazwire yala ino n'aiza okuwulisisya ebibono ebyamalabuki ebya kabaka oSulemaani. Neye obone oyo akira oSulemaani ekitiisya ali aanu. ³² Abantu b'e Nineeve balisetuka ng'abantu b'omulembe gunu oKibbumba

abasalira omusango, era ni babalumiriza omusango okubasinga olwakubba ibo beenenyere ng'oYona alaabbire egibali ekibono kya Kibumba, neye obone oyo akira oYona ali aanu."

*Ekimolekera omubiri
(Mat 5:15; 6:22-23)*

³³ OYesu yeeyongeire n'akoba ati, "Mpaawo muntu akwatisya eitaala kaisi n'aliteeka ooba n'alifuunikaku ekiibo, wazira aliteeka ku kikondo kaisi abantu abaingira ni beezya okubona ekitangaala. ³⁴ Era eriisolyo niiryo eitaala ly'obwomibwo. Kale singa eriisolyo oweribba lyomi, omubirigwo gwonagwona gwizula ekitangaala. Neye oweritabba lyomi, omubirigwo gwonagwona gwizula ndikiirya. ³⁵ Kale atyanu weekalikice okubona ooba ng'ekitangaala ekikulimu, ikyo tete tindikiirya. ³⁶ N'olwekyo singa omubirigwo gwonagwona gwizula ekitangaala ky'ekibono kya Kibumba anambula kansonda konakona akalimu endikiirya, awo gwalibonecerya nakimo ooti itaala erikumolekera n'ekitangaala."

*OYesu azumirira aBafalisaayo n'abakugu omu by'aMateeka
(Mat 23:1-36; Mak 12:38-40)*

³⁷ Awo oYesu oweyamaliriirye okwegesya kwebyo, ni wabbaawo oMufalisaayo eyamusabire okwabaku e wuwe okulya. Kale oYesu n'ayaba era n'aingira okulya oku menza. ³⁸ Neye oMufalisaayo oodi amucaazire

ni yeewunya okubona ng'oYesu tasookere kunaabaku mungalo ng'akaali okulya.

³⁹ Awo oMusengwa Yesu n'amukoba ati, "Inywe aBafalisaayo muli ooti bantu abafaayo kunaabyaku ebikopo n'amatiba ku ngulu kwonkani neye ng'omu ntooma mugagi. Kale nywena omu myoyo gyanywe mwizwire buluvu n'ebiseego ebibbibibi. ⁴⁰ Basirusiru inywe! Oyo iye nago eyabbumbire eby'oku ngulu, tiyabbumbire n'eby'omu ntooma byona? ⁴¹ Kale aale mugabire abadoobi ebintu ebyo ebimwasunire olw'obuluvu, kaisi oolwo ebintu byonabyona byezye okubabbeera birongoole.

⁴² "Wobe! Ala inywe aBafalisaayo, nga mwalaba! Ekyo kityo olwakubba mwekalikica ino era n'okuwa ni muwa n'ekimo eky'eikumi n'oku birime ebisembayo obutyai ebimukolesya okuwoomesya ebyokulya, kaisi ni mulagajalira nakimo obwenkanya n'okutaka oKibbumba. Waire nga muli n'okuwa ekimo ky'eikumi neye timuli n'okuleka okukola ebintu ebikulu ebindi bidi ebimulagaliire.

⁴³ "Wobe! Ala inywe aBafalisaayo, nga mwalaba! Era ekyo kityo olwakubba mutira kutaka bifo bidi ebikiraku ekitiisya omu makumbaaniro, era n'okubasugirya omu butale.

⁴⁴ "Wobe! Ala inywe nga mwalaba! Era ekyo kityo olwakubba muli ooti magombe agataboneka, ibo abantu agebatambuliraku nga tibamaite ekivundi ekibali kutambulirangaku."

⁴⁵ Awo omoiza oku bakugu omu by'aMateeka ga Musa n'amwiramumu ati, "Musomesya, owootumula otyo, obba swena otuzumiiremu."

⁴⁶ OYesu n'amwiramumu ati, "Wobe! Ala na inywe nywena abakugu omu by'aMateeka, nga mwalaba! Era ekyo kityo olwakubba mutiika abantu amateeka amakakaali agatakwatika, kaisi inywe nandi kadi kugegeenyaku okubabbeeraku okugakuuma.

⁴⁷ "Wobe! Ala nga inywe mwalaba! Ekyo kityo olwakubba mutandaza amagombe g'abanaabbi abazeiza baanywe abebaitire aate nga timugondera abanaabbi abo nago ebibeegeserye.

⁴⁸ Era omu ngeri eyo ni mubba nga muli kulaga muti musiiima ekyo abazeiza baanywe ekibakolere ekyokwita abanaabbi, kaisi inywe ni mukisiima n'okutandaza magombe g'abanaabbi abo nago.

⁴⁹ N'olwekyo oKibbumba omu malabukige akoba ati, 'Nalibatumira abanaabbi n'abatume era baliitaku abamo, kaisi abandi ni babayiigaania.'

⁵⁰ Kale kagira inywe abantu b'omulembe gunu niinywe oKibbumba abaayaba okuvunaana olw'okufa kw'abanaabbi bonabona abantu abebaitire kasookeede babbumba ekyalo, ⁵¹ okuzwera okw'Abberi, okutuuka oku Zakaliya iye ogubaitiire akati w'ekyoto n'ekifo ekyeru omu Yeekaalu. Niikyokyo ekyo ekimbakobera nti omusango ogwo baligubavunaana niinywe ab'omulembe gunu.

⁵² "Wobe! Ala nga mwalaba inywe abakugu omu by'aMateeka! Ekyo kityo olwakubba

mukaisirye abantu okumanya amazima ga Kib-bumba. Mufaanana ooti bantu abali kugotyangu-gawo ekifunguwo ekiigulawo, kaisi nga ny-wena abananyere timwingira, era nga mukaisya abandi bona okwingira.”

⁵³ Awo oYesu n’azwa omu kifo ekyo n’ayaba. Kaisi awo aBafalisaayo n’abakugu omu by’aMateeka ni batandiika okumwakanisyanga ino n’okumukiiya era n’okumusonsekanga ebibuulyo by’okumo kumo bati atumule oku bintu ebindi bingi, ⁵⁴ nga bamutega okumukwatisya omu bibonobyee kaisi beezye okumuvunaana.

12

Ebibono byokulabula n’okwiriyamu amaani (Mat 10:26-27)

¹ Omu kiseera ekinyere ekyo, abantu nkumi n’enkumi nga babbiirire egiri oYesu era ni batuuka n’okwemanganaku, oYesu n’atandiika okukoba abeegibe ati, “Mwekuume ekizumbulukuca ky’enjegesya y’aBafalisaayo, ibwo nago obunanfunsi. ² Buli kintu ekikukuulirirye balikitoolayo, era buli kintu ekiri omu kyama kyalimanyikana. ³ Byonabyona ebibatumulira omu ndikiirya, biwulikikana omusana, era n’ekyama ekimuweweetereranganira nga mweigaliriirye omu bisenge, omuntu yalikikookera ngulu.

⁴ “Mbakobera inywe bakaagwa bange nti timutyanga abo abaita mubiri gwonkani, neye ng’oluzwanyuma tibeezya kwongereryaku

ekindi. ⁵ Wazira oleke mbalagisye ogumuli n'okutya: Mutyenge Kibbumba iye aali n'obwezye, n'okukudyaka omu geyeena ng'amalire okwita omubirigwo. Kale oyo niye ogumubba mutyenge!

⁶ "Obunyonyi obutaanu bwa layisi ino, neye mpaawo kadi kamo oKibbumba akeyeerabiraku. ⁷ Kale timwatyanga, olwakubba inywe muli b'ebbeeyi okukiraku obunyonyi obwo. Era oKibbumba amaite n'obungi bw'enziiri gya ku buli mutwe gwa muntu. ⁸ Era mbakoba nti buliambutula omu maiso g'abantu, oMwana wa Muntu yena yalimubbutula omu maiso g'abamalaika ba Kibbumba. ⁹ Kaisi oyo iye aneegaanira omu maiso g'abantu, zena nalimwegaanira omu maiso g'abamalaika ba Kibbumba. ¹⁰ Era buli atumula okubbikubbi oku Mwana wa Muntu, beezya okumusoniya; neye oyo iye azuma oMwoyo oMweru, tibalimusoniya.

¹¹ "Owebabatwalanga okubawozesya omu makumbaaniro, ooba omu maiso g'abalamuzi ooba ag'abafugi, timweraliikiriranga ekyokutumula omukwewozyaku, ¹² olwakubba n'ananyere awo nga muli omukwewozyaku, iye oMwoyo oMweru yalibakobera ebimuwomeire okutumula."

Olugero lw'omusuni omusirusiru

¹³ Awo ni wabbaawo omuntu okuzwa omu kiziima ky'abantu n'akoba oYesu ati, "Mu-

somesya, onkobereku omuganda wange angabulireku ebyange oku by'obusika bwaiswe.”

¹⁴ OYesu n'amwiramumu ati, “Munange, naani eyanteekerewo okubba omugayi ooba okubba omuntu akola oku byakubagabula ebyobusika byanywe?” ¹⁵ Awo n'akoba ababbairerewo ati, “Mwekuume okutayayaanira ebintu okwa buli ngeri olwakubba obwomi bw'omuntu tibubbaawo lw'ensunaye ey'ebintu waire n'obwabba nabyo ebingi bitya.”

¹⁶ Kale awo n'abagerera olugero olukoba luti, “Wabbairerewo omuntu omusuni eyabalirye kusani ebibala okwitakalirye. ¹⁷ Kale ni yeebuulya omu mwoyogwe ati, ‘Niki ekinakola? Ndambaku eginabisa amakungula gange gonagona.’

¹⁸ “Awo n'akoba ati, ‘Kinu niikyo ekinjaba okukola. Njaba okuvunawo ebideero byange, kaisi nnyombeke gadi agakiraku obunene. Era oomwo niimwo omu nabisa ebirime byonabyona eby'empoke, n'ebintu byange ebindi. ¹⁹ Olwo awo kaisi nalikoba omu mwoyo gwange nti, mbisire ebintu bingi ebisa ebyaba okummalisyaku emyanka mingi. Kale ndi n'okuwuumula, n'okulya, n'okwenywera era nga wensangaala.’

²⁰ “Neye oKibbumba n'amukoba ati ‘Musirusiru iwe! Omu kiire kinu oyaba kufa, oolwo ebyotegekere byabba byani?’ ²¹ Kale niye omuntu owaabba atyo iye eyebisira ebyobusuni, aate nga timusuni omu maiso ga Kibbumba.”

Okwesiga oKibbumba
(Mat 6:25-34)

²² Awo oYesu n'akoba abeegibe ati, “Kale kagira mbakoba nti timweraliikiriranga omu bwomi bwanywe olw'ekyokulya, newankubbaire olw'ekyokuzwala. ²³ Ekyo kityo olwakubba obwomi ibwo bw'ebbeeyi okukiraku ekyokulya, era n'omubiri gwona gw'ebbeeyi okukiraku ebyokuzwala. ²⁴ Aale mubone enyonyi. Igyo tigusiga, waire kukungula tigikungula, era tigibba kadi n'ekibiso waire kideero, neye oKibbumba agiwa ekyokulya. Olwo inywe timuli bamugaso ino okukiraku enyonyi? ²⁵ Era naani kwinywe oweyeeraliikirira, ayezya okwongeraku waire ekiseera ekityai kiti oku kuwangaalakwe? ²⁶ Aale obanga timwezya kukolaku waire ekintu ekityai ng'ekyo, kale lwaki mweraliikirira ebindi ebisi-gaireyo?

²⁷ “Aale kaade mubonere oku ngeri ebimuli egibikulamu. Cooka ibyo tibikola waire kwetungira bizwalo, neye mbakobera nti n'ewankubbaire okabaka oSulemaani omu kitiisyakye kyonakyona, tiyazwaireku okuboneka kusani okutuukiryaku ng'ebimuli owebibba. ²⁸ Neye obanga oKibbumba azwalisya kusani atyo ebimuli ibyo ebibbaawo atyanu eizo ni babyoca, tiyalikirawo ino okubazwalisya inywe abaliku n'okwikirirya okutono? ²⁹ Era inywe timwemaliranga mu kunoonia kimwalya, ooba kimwanywa, era timweraliikiriranga olw'ebintu ebityo. ³⁰ Ekyo kityo olwakubba ibyo ebyo byonabyona abantu abataikirirya omu Kibbumba niibyo ebibemaliramu, neye

inywe iye oltewaanywe amaite ati ebyo mubyetaaga. ³¹ Wazira mwemalirenge mu kunoonia bwakabaka bwa Kibbumba, kaisi musune byonabyona ebyo ebimwetaaga.

³² “Kale timwatya, nga inywe ekibbula ekityai kya beegi bange, olwakubba oltewaanywe yasiimire era n’abaikirirya inywe okufugira aamo naye omwigulu. ³³ Aale mutunde ebintu byanywe, kaisi empiiya egizwamu mugabire abadoobi. Omu ngeri eyo mwabba mwekoleire emigoba omwigulu igyo egitanyiirika, era nga mwekoleire n’obusuni obutawaawo eedi omwigulu, iyo omwibbi egyatatuuka, era enambula kadi biwuuka ebyezya okububebenya. ³⁴ Ekyo kityo olwakubba obusunibwo egibubba, n’omwoyogwo gwona niyo egigubba.”

Abaweererya abeetegekeire omusengwa waabwe

³⁵ “Mubbe bantu abeetegeki okuweererya, nga mwefungiziire nakimo era n’amataala gaanywe nga gaaka. ³⁶ Kale nga muli ooti bantu abaku-umiriire omusengwa waabwe okwira okuzwa oku mbaga ey’obugole, kaisi beezye okumwigulirawo amangu ago nga yankakonkona. ³⁷ Ikyo kyalibba kisa eeri abaweererya abo ibo omusengwa waabwe oweyaliizira kaisi n’abaajirya nga babonia. Mbakobera amazima nti yalyetegeka ng’omwinuli owaabba, n’abatyamisya okubainula, era n’asigala awo ng’omusimaami

okubaweererya. ³⁸ Kyalibba kisa singa omusengwa waabwe aiza waire mukiire akati ooba kib-bambya, n'abaajirya nga babonia, abaweererya abo yalibasiima. ³⁹ Era mumanye kinu muti singa onyere enyumba amanya esaawa omwibbi egiyaiziramu, taleka enyumbaye ni bagivuna era ni bagingiramu. ⁴⁰ Kale nywena mubbenge beetegeki olwakubba oMwana wa Muntu yalizira omu kiseera ekimutamusuubiriramu.”

⁴¹ Kale awo oPeetero n'amubuulya ati, “Musengwa, olugero oolwo lwaiswe swenkani ooba lwa bantu bonabona?”

⁴² OMusengwa n'airamu ati, “Ndi kutumula ku muntu omwesigwa era iye oyo eyegendereza, iye omusengwawe ogwateekawo okulabirira abaweererya abainaye, n'okubawa omugabo gwabwe ogw'ebyokulya omu kiseera eki-tuuce. ⁴³ Kyalibba kisa eeri omuweererya oyo, iye omusengwawe oweyaliira kaisi n'amwajirya ng'akola ekyo ekiyamulagiire. ⁴⁴ Mbakobera amazima nti ebintu byonabyona ebya musengwawe oyo balibikwatisya omuweererya oyo okubirabirira. ⁴⁵ Neye singa omuweererya oyo akoba omu mwoyogwe ati, 'Omusengwa wange yaalwawo okwira,' n'atandiika okukubba abaweererya abainaye, era n'okulya n'okunywa, n'okuteemeera. ⁴⁶ Kale omusengwa w'omuweererya oyo abba yaliirira oku lunaku olwatamukuumiriireku, n'omu saawa egyatamaite. Awo omusengwa w'omuweererya oyo yalimubonereza ino era n'amutwalirya mu bantu abataikirirya.

⁴⁷ “Kaisi iye omuweererya amaite omusengwawe ekyataka, neye nandi ni yeetegeka ooba nandi nakola ng’omusengwawe owaataka, balimuwa ekibonerezo kikakaali. ⁴⁸ Wazira oyo iye etiyamaite, kaisi n’akola ekiwoomera okumukubbisya, balimuwa ekibonerezo ekiri gwai gwai. Era buli ogubawaire ebingi, balimusubiriramu bingi; n’oyo ogubabisisirye ebingi, balimubuulya ebikiraku ebibamubisisirye.”

OYesu ayawukanisya
(*Mat 10:34-36*)

⁴⁹ Awo oYesu ni yeeyongera okubalabula ati, “N’aizire kukuma musyo ku kyallo era ndi kusairirya nti singa atyanu gwakire! ⁵⁰ Neye njaba okweinika omu kugada ng’owebainika omuntu nga bamubatiza, era neraliikirira ino paka owekwaliwa. ⁵¹ Inywe museega muti n’aizire kuleeta idembe oku kyallo? Mbakobera nti tiniikyo owekiri, wazira n’aizire kuleetawo kwawukana. ⁵² Era okuzwa atyanu, abataanu omu nyumba emoiza baligabukanamu, abasatu ni baakanisya ababiri, na babiri ni baakanisya abasatu. ⁵³ Banu baligabukanamu: Oiteeye n’omutaane; omutaane n’oiteeye; omaaye n’omwalawe; omwala n’omaaye; odaani n’omulyawe; omulya n’odaaniwe.”

Okutegeera ebiseera
(*Mat 16:2-3*)

⁵⁴ Awo oYesu n’aira oku kiziima ky’abantu n’akikoba ati, “Owemubonanga ekireri nga

kizwa ebugwaisana, amangu ago mukobanga muti, 'Oikendi yatoonya.' Era ikyo ni kibba kityo. ⁵⁵ Era ompunga okuzwa e maserengeta owaafuwa, nga mukoba muti, 'Eisana lyaba okwoca ino.' Era niiye owekibba. ⁵⁶ Inywe abananfunsi! Mwezya okumanyica amakulu g'emboneka y'ekyalo n'ey'angulu, neye lwaki timwezya okumanyica amakulu g'ekyo ekiri kubbangawo omu kiseera kinu?"

Okusyania n'oyo akubanza

(Mat 5:25-26)

⁵⁷ Awo oYesu n'ababuulya ati, "Lwaki inywe abananyere timwesalirawo ekituuce? ⁵⁸ Owoobba ng'oyaba e w'omulamuzi n'omuntu akuwaabiire, weefude okusyania naye nga mukaali muli mu nzira, kaisi aleke okukutuuca e w'omulamuzi, era n'omulamuzi okukukwatisya omwisulukale, n'omwisulukale n'akuteeka omu mabbuus. ⁵⁹ Ekyo kityo olwakubba nkukobera nti ewalituuka oomwo, tiwalizwamu paka owewalisasula empiiya gyonagyona egy'omugaito."

13

Mwenenye obanga bbe mujigirike

¹ Awo omu kiseera ekyo, ni wabbaawo abakobeire oYesu oku Bagaliraaya badi ababaire nga bawayo esadaaka kaisi omufugi oPiraato n'abaita, kale eisaaye lyabwe ni litabanganira aamo n'eeryo ery'esadaaka gyawe. ² Kale oYesu n'ababuulya ati, "Inywe museega muti aBagaliraaya abo bagadire batyo, olwakubba

babbaire bakola ebibbibbi okukiraku ab'e Galiraaya abandi bonabona? ³ Mbakakasa nti tiniikyo obwekiri! Era inywe nywena mwalijigirika nywenanywena singa timwenenye. ⁴ Ooba badi eikumi na munaana ab'e Sirowaamu, okalina abeyagwireku era ni bafa, museega muti ibo babbaire bakola ebibbibbi ino okukiraku abantu abandi bonabona ababbaire omu Yerusaalemi? ⁵ Kadi, tiniikyo obwekiri, era tete njiramu okubakobera nti; okutoolaku nga mwenenyere, inywe nywena mwalijigirika nywenanywena."

⁶ Awo oYesu n'abagerera olugero lunu ati, "Wabbairero omusaiza eyabbaire n'omusaale omutiini, oguyabbaire akomere omu musirigwe ogw'emizabbibbu. Kale n'aizanga okugunooniaku ebineneka, kaisi nga tayajiryaku kadi kimo. ⁷ Oluzwanyuma yakobere omulabiriri w'omusirigwe ati, 'Aale obone, atyanu emyanka misatu nga njiza okunooniaku ebineneka oku mutiini gunu, era nga timbyajiryaku, kale ogutemewo. Aale kale gubenyenyera niki eitakali egitwankubbaire nga tukomawo ekintu ekindi?' ⁸ Neye iye omulabiriri w'omusiri ogwo n'amwiramumu ati, 'Musengwa, ogulekeku n'omwanka gunu gwona, nsooke ngutemerere n'okuguteekaku okavundikirya kaisi. ⁹ Singa gwalibbaaku ebineneka omwanka ogwiza, kyalibba kisa; neye owegwaligaana okuneneka, leero waligutemawo-butemi.' "

OYesu alamyala omukali oku Saabbaato

¹⁰ Lwabbairero lumu oku Saabbaato oYesu ng'ayegesya omu limo oku makumbaaniro, ¹¹ era oomwo mwabbairero omukali iye omuzimu

ogugwabbairye gwalemairye. Gwabbairye gumugodobairye omugongo okumala emyanka ikumi na munaana, era nga tayezya okwemerera nga muterembereri kadi katyayi kati. ¹² Awo oYesu oweyamuboine, n’amweta okwaba egiyabbairye kaisi n’amukoba ati, “Mukali iwe, olamire obulwairebwo.” ¹³ Awo oluzwanyuma n’amukwataku, era amangu ago omugongo gw’omukali oyo ni gugolokoka, era n’awuuja n’oKibbumba.

¹⁴ Neye omukulu w’eikumbaaniro n’anyiiga olwakubba oYesu alamirye oku Saabbaato, era n’akoba ekiziima ky’abantu ati, “Enaku giri mukaaga egibateekwa okukoleraku emirimo. Kale mwizenge mu naku egyo okubalamya, neye tiku Saabbaato.”

¹⁵ Neye iye oMusengwa oYesu n’amwiramu ati, “Inywe abananfunsi! Nabuli moiza tateera ontewe, ooba ompundawe okuzwa omu kifo aadi egyaliira n’amutwala okunywa amaizi oku Saabbaato? ¹⁶ Neye aale omukali onu, iye omwizukulu wa Ibbulaimu, oSitaani ogwabbairye asibire okumala emyanka eikumi na munaana, abbairye tasaaniire okumutoola omu busibe obwo waire nga ku Saabbaato?”

¹⁷ Awo oYesu oweyatumwire atyo, abalabebe ensoni ni gibakwata, kaisi ekiziima ky’abantu kyonakyona ni kisangaala olw’ebintu ebyewunyisya ebiyabbairye akolere awo.

*Olugero lwa kansigo aka kalidaali
(Mat 13:31-32; Mak 4:30-32)*

18 Awo oYesu n'abagerera olugero olundi ati, "Obwakabaka bwa Kibbumba bufaanana ooti niki, era nabugerageranirya kuuki?"

19 Bufaananaku ooti kansigo aka kalidaali, iko omuntu ekiyatwaire n'akakoma omu musirigwe, kaisi ni kamera, ni kazwamu ekimera kya syodo ekinene ooti musaale, era enyonyi ni giruka ebisaasiriro n'okusiibanga omu masaga gaakyo."

20 Awo oYesu era tete n'akoba ati, "Obwakabaka bwa Kibbumba nabugerageranirya kuuki?"

21 Bufaananaku ooti bukazumbulukuca obutono buti, ibwo omukali obuyakoleserye okusumba emigaati. Waire wona yakandire obusye bungi, obukazumbulukuca kwasalaaniire omu gutole gwonagwona."

Omulyango omudiini

(Mat 7:13-14,21-23)

22 Kale oYesu n'asalaagalya omu bibuga n'omu byalo ng'ayegesya, atyo nga weyeeyongera okutambula okwaba e Yerusaalemi. 23 Awo ni wabbaawo omuntu eyamubwirye ati, "Musengwa, abantu batono bati abalokoka?"

Kale oYesu n'abairamu ati, 24 "Mwefude-kwefuda okwingira omu mulyango ogwo omudiini, olwakubba mbakobera nti bangi baligezyaku okugwingiramu, neye era tibalyezya.

25 Kasita onyere enyumba oweyalibba amalire okwigalawo olwigi, mwalyemerera e nza, ni mutandiika okukonkona oku lwigi n'okwegairira nga mukoba muti, 'Musengwa, otwigulirewo olwigi!' Neye iye yalibairamu ati, 'Inywe timbamaite era timmaite kadi n'egimuzwera.' 26 Olwo mwalitandiika okukoba

muti, ‘Wayegesyanga omu bitundu by’e waiswe era twalyanga n’okunywanga na iwe.’ ²⁷ Kaisi iye yaliiramu ng’akoba ati, ‘Nkobere nti timbamaite era timmaite kadi egimuzwera. Era muzwe egyendi nywenanywena inywe abakola ebibbibbi.’

²⁸ “Kale awo walibbaawo okukunga n’okunjiya amaino olw’obulumi bwokubaleka, nga mulengera oIbbulaimu n’oIsaka n’oYaakobbo, n’abanaabbi bonabona omu bwakabaka bwa Kibbumba, neye inywe nga babamumire e nza bwabwo. ²⁹ Era abantu balizwa e njuyi n’e njuyi era ni batyama oku mbaga omu bwakabaka bwa Kibbumba. ³⁰ Kale weekalikice kinu ekiti, waliwo ibo abantu abebamaite ng’abakidoobi neye abalibba abakulu omu bwakabaka bwa Kibbumba, kaisi tete badi ibo abebamaite ng’abakulu omu mbona yaabwe, tete nga iye oKibbumba ababona ng’abakidoobi.”

OYesu akunga olwa Yerusaalemi
(*Mat 23:37-39*)

³¹ Omu kiseera ekinyere ekyo, aBafalisaayo abamo ni baiza ni bakoba oYesu bati, “Ozwe aanu oyabe omu kifo ekindi olwakubba oKerode ataka okukwita.”

³² Neye iye oYesu n’abairamu ati, “Mwabe mukobe onawulima oyo aali ooti kibbwe muti, ‘Njaba okweyongera nga mbinga emizimu oku bantu, era nga ndamya n’abalwaire atyanu

n'eizo, kaisi owenalifa, oluzwanyuma lw'enaku ibiri, oku lwokusatu ntuukirirye ekigendererwa.' ³³ Kaisi era ooba kyabba niki njaba okweyongera n'olugendo lwange atyanu n'eizo na ludi olwakubba tiwabbangakuuwo onaabbi ogubabbaire baitiire awantu awandi okutoolaku omu Yersaalemi."

³⁴ Awo oYesu ni yeeyongera okukoba ati, "Inywe abantu b'e Yersaalemi, inywe omwita abanaabbi, era ni mwita n'abantu oKibbumba ababatumira nga mubakubba n'amabbaale! Emirundi mimeka egintakire okusolooja abaanabo ooti nkoko owaamaamira obumiyobwe omu biyayabye, neye nga timwikirirya? ³⁵ Aale atyanu mwaba okubona ng'ekibuga kyanywe kisigaliire awo ooti kinameje. Era mbakobera nti timwalimbonaku tete paka owemwalikoba muti, 'W'enkabi oyo iye aiza omu liina lya Musengwa oKibbumba.' "

14

OYesu alamyā omuntu oku Saabbaato

¹ Lwabbairre lumu oku Saabbaato, oYesu n'ayaba omu nyumba y'omoiza oku beekubbemberi b'aBafalisaayo okulya. Neye abantu abamo babbairre bali kumwekalikicanga okusuna onanzwa wa kumuvunaana. ² Ekyo kyabbairre kityo olwakubba omwa Mufalisaayo oomwo mwabbairremu omuntu eyabbairre abbimbisaine ebigere n'amangalo. ³ Awo oYesu n'abuulya abakugu omu by'aMateeka ga Musa

n'aBafalisaayo ati, "Bakiikirirya omu mateeka okulamyā abantu oku Saabbaato, ooba bbe?"

⁴ Neye owebagaine okumwiramū, awo oYesu n'akwata oku mulwaire nago era n'amulamyā, kaisi n'amuseebula.

⁵ Awo oluzwanyuma n'ababuulya ati, "Singa omutaanewo ooba okisolowo owaagwa omu kiruba oku Saabbaato, toyalamuka mangu-mangu okumutoolamu?" ⁶ Era n'ekyo kyona tibamwiriremu.

Empisa oku mukolo

⁷ Kale oYesu oweyaboine ananyere awo ng'abageni abeete beesaanizire ebifo eby'abantu ab'ekitiisya oku menza, n'abagerera olugero ati, ⁸ "Omuntu owakwetanga oku mbaga ey'obugole, totyamanga mu kifo eky'abantu ab'ekitiisya, amo nobba ooti oli awo ni wabbaawo ogondi ogubeetere akukiraku ekitiisya. ⁹ Singa kibba kityo, iye oodi eyabeetere mwembi, yaliiza n'akukoba ati, 'Ozwerewo onu omu kifo ekyo,' oolwo walyaba okutyama omu kifo ekisembayo okubba eky'ekitiisya ng'oswaire. ¹⁰ Neye owebakwetanga oku mukolo, oyabanga n'otyama mu kifo ky'abantu b'eidaala ly'ansi omu kitiisya, kaisi oodi abacaazire owaiza n'akukoba ati, 'Munange, iwe osembereku yaadi awasaku,' oolwo kaisi n'osuna ekitiisya omu maiso g'abageni abainawo. ¹¹ Ekyo kityo olwakubba buli eyegulumalya, balimwica; neye iye oyo eyewombeeka, balimugulumalya."

¹² Kaisi n'akoba n'oodi eyabbaire amucaazire ati, "Owoosumbanga ekyamusana ooba ekyeigolo, toyetanga bakaagwabo ooba bagandabo, ooba b'ekikaakyo, ooba baliranwabo abasuni olwakubba bona balikweta, omu ngeri eyo ni bakusasula. ¹³ Neye owoosumbanga embaga, oyetanga badoobi, abanialuuki, abaleme, n'aboofu, ¹⁴ era waire nga tibeezya kukusasula neye iye oKibbumba yalikusasula omukuzuukira kwabatuukirirye."

Olugero lw'embaga ey'amaani
(Mat 22:1-10)

¹⁵ Awo omoiza oku babbaire balya oku menza n'oYesu oweyawuliire ebyo, n'akoba oYesu ati, "Nga w'enkabi iye oyo eyalirya oku mbaga omu bwakabaka bwa Kibbumba!"

¹⁶ Neye oYesu n'amwiramumu mu lugero ati, "Wabbairero omuntu eyategekere embaga ey'amaani, kaisi n'ayeta abantu bangi. ¹⁷ Era omu saawa enanyerenyeere ey'embaga, n'atuma omugalamawe okukoba abagenibe abeete ati, 'Mwize olwakubba ebintu byonabyona atyanu bitegeke.'

¹⁸ "Neye bonabona nga bali ooti balaa-gaanire, ni batandiika kwewozyaku. Eyasookere yakobere ati, 'Nankugula ekigona, era nteekwa okwaba okukirambuula, kale nkwegairiire onsoniye.'

¹⁹ "Kaisi iye ogondi n'akoba ati, 'Nankag-ula ente endaawo egirima ikumi, era njaba kugigezesya. Kale nkwegairiire onsoniye.'

²⁰ “Era n’ogondi iye n’akoba ati, ‘Nkaali ndi mugole, n’olwekyo timpezya kwiza.’

²¹ “Awo omugalama n’akanga, era n’akobera omusengwawe ebyo ebibakobere. Omusengwawe n’anyiiga, era n’alagira tete omugalamawe ati, ‘Oyabe mangu, osalaagalye omu nguudo n’omu bisinde by’ekibuga, era ondeetere aanu ibo abadoobi n’abanieluuki n’aboofu n’abaleme.’

²² “Awo omugalama oyo oweyamalire ekyo kaisi n’aiza egiri omusengwawe okumukoba ati, ‘Musengwa mmalire, neye era wakaali waliwo ekifo.’

²³ “Kale omusengwa n’akoba omugalamawe ati, ‘Oyabe, osalaagalye omu nguudo n’omu bisinde, okobe abantu baize kaisi enyumba yange eizule.’ ²⁴ Awo oYesu n’akoba ati, ‘Mbakobera nti oku bantu badi abenabbairere njetere omu kusooka, mpaawo eyaliryaku kadi akatyayi kati oku mbaga yange.’ ”

*Okwefiriza kw’omwegi wa Kurisito
(Mat 10:37-38)*

²⁵ Olundi oYesu yabbaire atambula n’ekiyindi ky’abantu kaisi n’abakoba ati, ²⁶ “Singa omuntu aiza egyendi, kaisi n’ataka oiteeye ooba omaaye, ooba omukaliwe, ooba abaanabe, ooba abagandabe, ooba aboonyokobe, mazima waire obwomibwe obunyere okukiraku ng’owantaka, tayezya okubba mwegi wange. ²⁷ Kale buli etiyeeetiika omusalabbagwe gw’okugada olw’obwakabaka

bwa Kibbumba era n'ansengererya, tayezya okubba mwegi wange.

²⁸ “Aale singa omoiza kwinywe abba ataka okwombeka okalina, tasooka kutyama n'abalirira ebyetaagisya okwezya okubona ooba ng'ali n'empiiya egimumala? ²⁹ Ekyo kityo olwakubba singa ayezya kumala musingi gwonkani empiiya ni gimuwaaku, abantu balimusekerera, ³⁰ nga bakoba bati, ‘Onu yatandiikire okwombeka kaisi n'akaya okumaliirirya!’

³¹ “Ooba singa okabaka abba yatira okwaba okulwanisya okabaka ogondi omu lutalo, tasooka kutyama n'aseega nga iye ali n'amaje g'abaisulukale 10,000 ooba ng'ayezya okuyinga oodi amulwanisya n'abaisulukale 20,000? ³² Aale owaabba nga tayezya, atuma abakwenda ng'oodi akaali ali yala, n'amusaba ekyataka basyanie. ³³ Kale, n'omu ngeri enanyere eyo omuntu yenayena ansengererya atekwa okusooka okuseega oku ky'okwefiriza byonabyona ebyalinabyo, kaisi n'abba mwegi wange.”

³⁴ Awo oYesu era n'akoba ati, “Omuunyu omugaanike gwa mugaso omu byokulya, neye singa gusuuka mujaalaali, bagwiryamu batya ensa? ³⁵ Gubba tigukaali gugasa kadi waire mwitakali, waire egibabbiirya okavundikirya, kale bagudyaka-budyaki eedi. Aale omuntu aliku amatwi agawulira, awulisisye era ategeere ekintumula.”

15

Olugero lwa ntaama eyabbaire agotere (Mat 18:12-14)

¹ Lumo abasoolooji ba musolo n’abakola ebikole ebibbibibbi bangi ino babbaire bali kwekumbaaniryanga egiri oYesu okuwulisisya ebiyayegesyanga. ² Neye aBafalisaayo n’abakugu omu by’aMateeka ga Musa ni beezuluguma nga bakoba bati, “Omusaiza onu iye asangaalira abakola ebibbibibbi era alya nabo.”

³ Kale awo oYesu n’abagerera olugero lunu ati, ⁴ “Singa omoiza kwinywe abba n’entaama 100, kaisi omoiza n’amugotaku, taleka 99 omu kiriisiryo kaisi n’ayaba okunoonia oodi agotere paka owamubona? ⁵ Era owamubona, amug-ingira oku mabega n’eisangaalo ⁶ era n’akanga e ika. Kale owaatuuka eeyo, ayetaku abakaagwabe aamo n’abaliranwabe, kaisi n’abakoba ati, ‘Munsangaalireku olwakubba n’aboine ontaama wange eyabbaire angotereku.’ ⁷ Kale mbakobera nti, ng’oyo aboine ontaamawe owaasangaala, n’omwigulu yona wabbaayo okusangaalira ino akola ebibbibibbi omoiza eyeenenya, okukiraku abatuukiriryeye 99 abateetaagisyaye okwenenya.”

Olugero lwa ndusu eyabbaire agotere

⁸ Awo oYesu n’abongera olugero olundi ati, “Ooba singa omukali abba n’amandusu* ikumi ag’efeeza, kaisi ekimo ni kimugotaku,

15:1 15:1 Luk 5:29-30
bakoba bati, Durakima.

* **15:8** 15:8 ndusu omu Luyonaani
Era emoiza yaabanga mpeera ya
lunaku lulamba.

takwatisya eitaala, n'ayeya enyumba, n'anoonia n'okwekeenya paka owakibona?
⁹ Era owakibona, ayetaku abakaagwabe aamo n'abaliranwabe, kaisi n'abakoba ati, 'Munsangaalireku, olwakubba n'aboine ekindusu kyange ekyabbaire kingotereku.'
¹⁰ Kale mbakobera nti ng'oyo aboine ekindusukye owaasangaala, n'eedi yona wabbaayo okusangaala kw'abamalaika ba Kibumba, olw'oyo akola ebibbibbi omoiza eyeenenya."

Olugero lwa mwana eyabbaire agotere

¹¹ Awo oYesu tete n'abagerera olugero olundi ati, "Wabbairero omusaiza eyabbaire n'abataanebe babiri. ¹² Kaisi omutaane omuto-muto waaku n'akoba oiteeye ati, 'Bbaabba, ompe omugabo ogwange oku bintubyo.' Kale awo n'abagabuliramu bonabona ebintubye.

¹³ "Enaku tigyabitirewo enyingi, omutaane nago n'akumbaania ebyobusunibye byonabyona, era ni yeeyabira omu kyalo ekyeyala, eeyo iye egiyabiduwuudiire byonabyona omu kwejalabya omu bwomi bw'ekidankaani. ¹⁴ Awo oweyamalire okusalaanica ebinyabbaire nabyo, enzala enene n'egwa omu kyalo nago ekyo kyonakyona, kaisi awo n'atandiika okubba omu kudamba. ¹⁵ Kale n'ayaba n'asenga e w'omoiza oku batyami b'omu kyalo ekyo, iye oyo n'amusindika mu kirisiryokye kumulisiryanga mbiizi. ¹⁶ Cooka eeyo yeegombanga n'okulya oku byata embiizi egigyalyanga, neye nga tibabimukombya.

17 “Awo oweyeekubbiremu ekiseego, n’akoba omu mwoyogwe ati, ‘Abapakasi ba bbaabba bameka abalya ebyokulya era ni balekawo, kaisi nze nga nfeera aanu n’enzala! 18 Nakanga egiri obbaabba, mmukobe nti bbaabba, nabebenyere egyoli n’eeri oKibbumba. 19 Kale tinkaali mpomera okubba mwanawo era ontwale ng’omoiza oku bapakasibo.’ 20 Kale era n’asetuka, n’akanga egiri oiteeye. Neye oweyabbaire ng’akaali ali yala, oiteeye n’amulengera, ekisa ni kimukwata, n’airuka egiri omutaane, n’amugwa omu kifubba olw’eisangaalo erinene. 21 Awo omutaane nago n’amukoba ati, ‘Bbaabba, nabebenyere egyoli n’eeri oKibbumba. Kale tinkaali mpomera okubba mwanawo!’†

22 “Neye iye oiteeye n’akoba abagalamabe ati, ‘Mwanguweku! Muleete ebizwalo ebikiraku obusa mumuzwalisye. Era mumuzwalisye n’empeta oku ngalo n’engaito omu bigere. 23 Era muleete onte okitobba omusava mwite, tulye neenu nga tujaagaana 24 olwakubba omwana wange onu yabbaire afiire, neye airiwire; yabbaire agotere, neye abonekere.’ Kale awo ni batandiika okujaagaana.

25 “Bakolanga ebyo batyo, ng’omutaanewe omukulu ali mu musiri akola mirimo. Oweyabbaire akanga e ika, era nga yatira okutuuka, n’awulira olukero lwa bantu okwemba era n’ekibina. 26 Kale n’ayetaku omoiza oku bagalama okumubuulya ekyabbaire kiriwo.

† 15:21 15:21 EBiwandiike ebimo ebyeira byongeraku biti, Onsuce moiza oku bapakasibo.

²⁷ Omugalama n'amwiramumu ati, 'Omugandawo airire, era oiteewo amwitiire onte okitobba omusava olwakubba airire kusani nga mwomi.'

²⁸ "Neye iye omugandawe omukulu n'anyiiga era n'agaana okutuuka e ika. Kale oiteeye n'akimanyica era n'amusenja awo egiyabbaire okumwegairira atuuke e ika. ²⁹ Neye iye n'airamu oiteeye ati, 'Aale obone, emyanka mingi egimmalire nga nkukolera, era tinkutenguwangaku naire. Cooka tompangaku waire kabbuli zena ni njaagaanaku na bakaagwa bange. ³⁰ Neye omutaanewo oodi iye, eyaliire ebintubyo ng'ali na bamalaaya, owairire omwitiire onte okitobba omusava!'

³¹ "Awo oiteeye n'amukoba ati, 'Mwana wange, iwe nenca oli aanu na nze, era ebyange byonabyona bibyo. ³² Neye tubbaire nga tuteekwa okujaagaana n'okusangaala olwakubba omugandawo oodi iye yabbaire afiire, neye atyanu airiwire; iye yabbaire agotere, neye atyanu abonekere.' "

16

Olugero lwa mulabiriri omulyaki

¹ Olundi oYesu yagereire abeegibe olugero ati, "Wabbairewo omusaiza omusuni eyabbaire n'omulabiriri w'ebuyobusunibye ogubabbaire bakoba bati mbu adubuuda ebintu bya musuni. ² Kale omusuni oyo n'ayeta omulabiririwe n'amukoba ati, 'Ebyo ebinkuwuliireku biri bitya? Onsonzolare ebikwata oku

byokulabirirakwo olwakubba toyezya okusigala ng'omulabiriri w'ebintu byange.'

³ "Awo omulabiriri ni yeebuulya omu mwoyogwe ati, 'Ayanu niki ekinakola? Omusengwa wange ali kuntoolaku omulimo. Mbulamu kadi amaani agalima, kaisi ng'ensoni ginkwata okusabirirya. ⁴ Ayanu mmaite ekinakola, kaisi abantu beezye okunsangaalira omu bisito byabwe owebabba nga bambingire oku mulimo.'

⁵ "Kale n'ayeta buli eyabbaire n'eibbanja lya musengwawe. Awo n'abuulya eyasookere ati, 'Omusengwa wange akubanza niki?' ⁶ Iye n'airamu ati, 'Ambanza amafuta g'emizaituuni ebidoomoolo* 200.' Omulabiriri n'amukoba ati, 'Aale okwate endagaanoyo yeenu kaisi otyame mangu era ocuuse bibbe ebidoomoolo 100.'

⁷ "Awo n'abuulya eyairireku ati, 'Kaisi iwe akubanza niki?' iye oyo n'airamu ati, 'Ambanza engaano ensawo 100.' Oyo yena n'amukoba ati, 'Aale wena okwate endagaano eiyo yeenu, era iwe ocuuse gibbe ensawo 80.'

⁸ "Awo omusengwawe n'asiima omulabiririwe oyo omulyaki olw'ekikole ekyamalabuki ekyo ekyokwetegekera. Kiri kiti, abantu abataikirirya omu Kibbumba ibo balabukirabuki omu nkolagana yaabwe okukiraku ibo abantu abamwikiririryamu. ⁹ Kale mbakobera nti mukolesyenge obusuni bw'oku kyalo okwesalira emikago, kaisi oolwo obusuni obwo owebwalibba nga tibukaali bugasa,

* **16:6** 16:6 Omu Luyonaani bati, Bbatuusi. Ebbatuusi yaab-bangamu elita kumpi 40.

oKibbumba yalibasangaalira omwigulu omu kifo ky'emirembe n'emirembe.

¹⁰ “Omuntu oyo iye omwesigwa omu kityayi, abba ayezya okubba mwesigwa n'omu kinene; era n'oyo iye atabba omwesigwa omu kityai, era abba timwesigwa n'omu kinene. ¹¹ Aale owe-mubba timuli beesigwa omu busuni obw'oku kyalo, naani eyalibesiga omu busuni budi obunanyerenyeere obw'omwigulu? ¹² Era owemubbanga nenca timuli beesigwa omu bya bandi, naani eyalibawa ebyanywe okubwanywe?”

¹³ “Mpaawo muweererya ayezya okuweererya abasengwa ababiri. Kiri kiti ali n'okulaga okutaka kunene eeri omoiza okukiraku eeri ogondi; ooba yalyesibira oku moiza, n'atala ogondi. Kale tikyezyeka okubba n'oKibbumba aamo n'empiiya bombi nga basengwabo.”

¹⁴ Awo aBafalisaayo ababbairewo owebawuli-ire ebyo, ni basekerera oYesu olwakubba ibo babbaire bayayaanira eino empiiya. ¹⁵ Neye iye n'abakoba ati, “Inywe abananyere mwetu-uca okubba abasa omu maiso g'abantu, neye iye oKibbumba amaite emyoyo gyanywe. Ikyo ekintu abantu ekibasisija bati kikulu ino, tete iye oKibbumba akitwala ng'ekyomuliko omu maisoge.”

*Omugaso gwa Mateeka ga Musa
(Mat 11:12-13; 5:13-32; Mak 10:11-12)*

¹⁶ Awo oYesu ni yeeyongera okubeegesya ati, “AMateeka ga Musa n’eBiwandiike bya ba-naabbi niiby o ebyabbaire omu kukola paka oYokaana oMubatizi oweyaizire. Neye okuzwa oolwo, aMawuliro aMasa ag’obwakabaka bwa Kibumba niigo agebali kulaabba egimuli, era buli muntu ayazy a n’amaani okubwingiramu. ¹⁷ Neye kyanguku eigulu n’ekyalo okuwaawo, okukiraku akasale akatyayi eino okugotaku oku kanyukuta akamo oku Mateeka ga Musa.

¹⁸ “Ekikoba kiti, singa omuntu abbinga omukaliwe, kaisi n’aleeta omukali ogondi, abba abbengere ogw’obulendi. Era n’omusaiza atwala omukali oyo ogubabbingire abba abbengere ogw’obulendi.”

Omusaiza omusuni n’oLazaalo

¹⁹ Awo oYesu n’abagerera olugero ati, “Wabbairewo omusaiza omusuni, eyazwalanga ebizwalo ebitukuliikiriri ebisa ebyebbeeyi eino, era ng’asiiba mu bwomi obusa buli lunaku. ²⁰ Neye oku geeti ya musuni oyo babikiryangawo omudoobi omusabiriri, eriinalye bati Lazaalo oyo iye eyabbaire aizwire amabbwa ²¹ eyegombanga okulya obukunkumukira obwagwanga okuzwa oku menza y’omusaiza omusuni oyo. Kaisi era tete embwa gyona gyaizanga ni gimukomberera omu mabbwage.

²² “Kale ekiseera kyatuukire, omudoobi oyo n’afa, era abamalaika ni batwala omwigugwe

egiri oIbbulaimu. Oluzwanyuma omusuni yena yafire era ni bamuliika. ²³ Awo ng'ali omu Kiina eKitakoma omu bulumi obungi, n'alola omwigulu n'alengerera eyala oIbbulaimu nga bali aamo n'oLazaalo. ²⁴ Kale n'amweterera ati, 'Bbaabba oIbbulaimu, onkwatire ekisa otume oLazaalo atimye empembi y'olunwerwe omu maizi, kaisi aize ampolyewolyeku olulumi lwange olwakubba ndi omu bulumi bungi omu musyo gunu.'

²⁵ "Neye oIbbulaimu n'amwiramumu ati, 'Mwana wange, oyewukirye oti owewabbaire ng'okaali oli mwomi oku kyalo wasunire ebisa ebibyo, ng'oLazaalo iye ali mu kugada. Kale atyanu oLazaalo yena aanu ali mwisangaalo, wena ng'oli omu bulumi obunene. ²⁶ Kaisi waire wona tikiikyo, waliwo olukonko lw'amaani akatiwo na iswe eenu, olw'okukaisya abo ibo abataka okuzwa eenu okwiza egyoli eeyo, era n'abataka okuzwa eeyo okwiza egituli.'

²⁷ "Awo omusaiza omusuni n'amukoba ati, 'Kale aale nkwegairire bbaabba, otume oLazaalo eeri abantu b'e ika, ²⁸ olwakubba ndiyo n'abaganda bange bataanu. Oleke ayabe abalabule tibeebitya ng'owenakolanga kaisi kibabbeere bona okutaiza eenu omu bulumi obunene bunu.'

²⁹ "Neye iye oIbbulaimu n'amwiramumu ati, 'Bali n'amateeka ga Musa n'ebiwandiike bya banaabbi, bawulisisye ebyo.'

³⁰ "Kaisi tete omusaiza omusuni n'amukoba ati, 'Bbaabba oIbbulaimu, kadi, neye singa omuntu okuzwa omu bafu ayaba egibali, beenya.'

31 “Neye oIbbulaimu n’amukoba ati, ‘Oobanga tibawulira ebya Musa n’abanaabbi ebibikoba, era batyo tibaikirirye newankubbaire wabbaawo omuntu azuukira.’ ”

17

Ekibbikibbi

(*Mat 18:6-7,21-22; Mak 9:42*)

¹ Lwabbairu lumu oYesu n’akoba abeegibe ati, “Ebintu ebigira abantu ni bakola ekibbikibbi tityakayenge okubbaawo, neye, wobe! Nga yalaba oyo iye abireeta!” ² Ekikiraku, omuntu oyo kumusiba ibbaale erizito omu mamiro, ni bamudyaka omu nyanza, okukiraku owaazweraku omoiza oku batobato abo abanjikiririyamu okukola ekibbikibbi. ³ Kale mwekuume.

“Singa omugandawo owakukola ekibbikibbi, omulabule era oweyeenenya, omusoniye. ⁴ Singa owakukola ekibbikibbi emirundi musanvu omu lunaku, kaisi buli mulundi ng’aiza egyoli okweenya, omusoniye.”

Okwikirirya

⁵ Awo abatume ni bakoba oMusengwa oYesu bati, “Otwongereku okwikirirya.”

⁶ Iye n’abairamu ati, “Singa mubba n’okwikirirya okutyai ooti kansigo aka kalidaali, mubba mwezya okukoba omusaale omunene ng’omusikamooli gunu muti, ‘Weiye oyabe weekome omu nyanza,’ era ni gubawulira.”

Omulimo gwa mugalama

⁷ Awo oYesu tete n'abakoba ati, "Singa omoiza kwinywe abba n'omugalamawe amulimira ooba amuliisiry a entaama, omuntu oyo ayezya okukoba omugalamawe eyankainuka ati, 'Aale atyanu oize otyame olye?' ⁸ Taira kumukoba-bukobi ati, 'Ontegekere ekyokulya, kaisi weetegeke okubbaawo ng'omusimaami okumpeererya nga ndya, oluzwanyuma kaisi wena olye?' ⁹ Ayezya okwebalya omugalama oyo olwakubba akolere ebibamukobere? ¹⁰ Kale nywena, owemubbanga mumalire okukola ebyo byonabyona ebibabakobere okukola, mukobanga muti, 'Iswe tuli bagalama, titusaanira okutusiima, olwakubba tukolere biibyo ebitubbaire tuli n'okukola.' "

OYesu alamy a abagenge eikumi

¹¹ Olwatuukire, oYesu oweyabbaire ng'ayaba e Yerusaalemi, n'abita akati oku nsalo y'aitwale ly'e Samaaliya n'ery'e Galiraaya. ¹² Kale oweyabbaire ng'aingira omu kimo oku bitundu byayo, abagenge ikumi ni baiza okumusangaana. Era ni beemerera yalaku naye ¹³ kaisi ni bamukoba maaminkirira bati, "Yesu oMusengwa, otukwatire ekisa!"

¹⁴ Awo oweyababoine, n'abakoba ati, "Aale mwabe mweyanjule eeri abakabona." Kale owebabbaire baaba, ni balama.

¹⁵ Neye omoiza kwibo, iye oweyaboine ng'alamire, n'akanga egiri oYesu ng'awuuja oKibbumba n'eigono ery'amaani. ¹⁶ Oweyatuukire n'akotamy a omutwe ansi ng'akomere amazwi

okumpi n'ebigere bya Yesu, ng'amwebalya. Era omusaiza oyo nago yabbaire Musamaaliya.

¹⁷ Awo oYesu n'abuulya ati, "Abalamire tibabaire ikumi? Kaisi omwenda bali yaina?"

¹⁸ Mpaawo ogondi airire okuwuujja oKibbumba okutoolaku onu atali Muyudaaya?" ¹⁹ Awo oYesu n'amukoba ati, "Osetuke weeyabire; ok-wikiriryakwo kukulamirye."

Obufugi bwa Kibbumba

(Mat 24:23-28,37-41; Mak 13:15-16)

²⁰ Lumo, aBafalisaayo babwirye oYesu bati, "Obwakabaka bwa Kibbumba bwalibbaawo di?" Iye n'abairamu ati, "Obwakabaka bwa Kibbumba nga bwiza tibuboneka. ²¹ Era abantu tibalikoba bati, 'Buli yaanu,' ooba bati, 'Buli yaadi,' olwakubba obwakabaka bwa Kibbumba buli mu myoyo gyanywe."

²² Awo n'akoba abeegibe ati, "Ekiseera kyalituuka ni mwegomba okubonaku oMwana wa Muntu waire lunaku lumo, neye nga tikyezyeka.

²³ Kale walibbaawo abalibakoba bati, 'Ngodi yaadi!' Ooba bati, 'Ngonu yaanu!' Neye inywe timwabangayo, era timubasengereryanga.

²⁴ Ekyo kityo olwakubba, oMwana wa Muntu oweyalibba aira, yalibba ooti kumesya kwa ikendi okumolekera oku lubba olumo olw'angulu omwibbanga, era ni kuboneca paka oku lubba ludi olundi. ²⁵ Neye atekwa kaisi okusooka okukaanya ebintu bingi era n'abantu b'omulembe gunu okumwegaana.

²⁶ "Era kityo nakimo ng'owekeyabbaire oku mulembe gwa Nuwa, era niiye owekyalibba

n'omu kwira kw'oMwana wa Muntu. ²⁷ Amataba nga gakaali okubbaawo abantu babbaire nga balya, era nga banywa, era nga bafumbirwa paka oku lunaku oNuwa oluyaingiriire omu lyato. Neye oluzwanyuma amataba gaizire era ni gajigirica abantu bonabona.

²⁸ "Era kyabbaire kityo n'oku mulembe gwa Luuti. Abantu babbaire nga balya era nga banywa, nga bagula era nga batunda, nga balima era nga bombeka. ²⁹ Neye oku lunaku oLuuti oluyazwereire omu kibuga ky'e Sodom, omusyo n'obuganga bwa mabbaale byagwire okuzwa omwigulu, ni bijigirica abantu bonabona omu kibuga ekyo.

³⁰ "Era kyalibbeera nakimo kityo oku lunaku oMwana wa Muntu oluyaliiriraku. ³¹ Oku lunaku oolwo, omuntu eyalibba e ngulu oku nyumbaye, kaisi ng'ebintubye biri munda, tamalanga ekiseera okwingira okubitolamu. Era n'omu ngeri enanyere eyo, eyalibba omu musiri yena atyo, tamalanga ekiseera okukanga e ika okusyoma ekintu kyonakyona. ³² Aale mwewukirye ekyatuukire oku muka Luuti! ³³ Kale buli agezyaku okulamya obwomibwe okululwe, yalibufirwa, neye buli afirwa obwomibwe okulwange, yalibulamya. ³⁴ Mbakobera nti omu kiire nago ekyo, abalibba ababiri oku kitaliri ekimo, omoiza balimutwala, kaisi iye ogondi ni bamuleka. ³⁵ Abakali ababiri abalibba aamo

17:26 17:26 Nta 6:5-8 **17:29** 17:28-29 Nta 18:20-19:25 **17:31**
 17:31 Mat 24:17-18; Mak 13:15-16 **17:32** 17:32 Nta 19:26
17:33 17:33 Mat 10:39; 16:25; Mak 8:35; Luk 9:24; Yok 12:25

nga basya, omoiza balimutwala, kaisi iye ogondi ni bamuleka. [³⁶ Babiri abalibba omu musiri, omoiza balimutwala, kaisi iye ogondi ni bamuleka].”*

³⁷ Awo abeegibe ni bamubuulya bati, “Musengwa, ebyo byalibba yaina?” N’abairamu ati, “Iwo awo awabba eisaaye, niiwo ensega egyegikumbaanira.”

18

Olugero lwa namwandu oweiganyi

¹ Awo oYesu n’agerera abeegibe olugero okubeegesya ati bateekwa okusaba oKibbumba buliijo anambula okudemba. ² N’akoba ati, “Wabbairewo omulamuzi omu kibuga ekimo, eyabbaire nga iye tatya oKibbumba waire kuwa bantu kitiisya. ³ Era ni wabbaawo onamwandu omu kibuga ekyo, eyasooseranga e w’omulamuzi nago, nga amudeeba mukwegairira ati, ‘Nkusaba osale omusango gunu gulingirire oyo ogumpozya naye.’

⁴ “Kale omulamuzi n’amala ekiseera ng’akaali againe. Neye oluzwanyuma n’akoba omu mwoyogwe ati, ‘Newankubbaire nga tintya oKibbumba, era waire kadi kuwa bantu kitiisya, ⁵ neye olw’okubbanga onamwandu oyo ayabire ng’andeyerya, njaba okubona nti nsala omusango mmutaase, kaisi akomye okusoosera okwiza okundeyeryanga.’ ”

* **17:36** 17:36 EBiwandiike ebimo ebyeira bibulamu olunyiriri lunu.

⁶ Awo oMusengwa n’akoba ati, “Aale mubone omulamuzi oyo akola ebibbibbi ekyatumula. ⁷ Neye iye oKibbumba tiyalisala omusango ng’ataasa abeyalonderemu ibo abo abamusaba omusana n’obwire? Yalirwawo ino okubairamu? ⁸ Aale mbakobera nti yalisala omusango mangu okubataasa. Wazira oMwana wa Muntu oweyali-irira, yalyajirya nga wakaali walikuuwo omuntu atyo omu kwikirirya?”

Olugero lw’oMufalisaayo n’omusooloji wa musolo

⁹ Awo oYesu tete n’abagerera olugero lunu ng’alabula abo ibo ababaire beemaite bati ibo batuuce era nga babityamu buli muntu amaiso, ng’akoba ati, ¹⁰ “Wabbairewo abasaiza babiri abaabire omu Yeekaalu okusaba. Omoiza yabaire Mufalisaayo, kaisi ogondi musooloji wa musolo. ¹¹ Awo oMufalisaayo n’ayemerera kaisi n’asaba omu mwoyogwe ati, ‘Oo! Kibbumba, nkwebalya olwakubba tindi ng’abantu abandi ibo abaluvu, ooba abalaazamaanya, ooba abal-endi. Era tindi kadi ng’omusooloji wa musolo onu. ¹² Nze nsiiba emirundi mibiri omu saab-biiti, era ntoola ekimo ky’eikumi oku by’ensuna byange byonabyona.’

¹³ “Neye iye omusooloji wa musolo yayemereire yalaku n’abantu, era tiyasiiriryeku kadi maisoge okulola omwigulu, wazira yeekondamiire kaisi n’akoba ati, ‘Oo! Kibbumba, onkwatire ekisa nze akola ebibbibbi!’ ”

¹⁴ Awo oYesu n’abakoba ati, “Mbakobera nti oodi iye ow’oluzwanyuma yakangire e

ika ng'oKibbumba amusonyire okukiraku oodi ogondi. Ekyo kityo olwakubba buli eyegulumalya balimwica, neye iye oyo eyewombeeka balimugulumalya.”

*OYesu awa abaana abatobato enkabi
(Mat 19:13-15; Mak 10:13-16)*

¹⁵ Awo abantu ni baleeta abaana abatobato bona egiri oYesu abakwateku, neye abeegibe owebaboine ekyo, ni babaloberya nga babakaawuukira. ¹⁶ Neye oYesu n'ayeta abaana abo nago, kaisi n'akoba abeegibe ati, “Muleke abaana abatobato baize egyendi era timwabaloberya, olwakubba abali ooti baabo niibo ababba omu bwakabaka bwa Kibbumba. ¹⁷ Mbakobera amazima nti buli muntu ataikirirya okwesiga oKibbumba ng'omwana omutomuto oweyesiga ababyairebe, tiwakungira omu bwakabaka bwa Kibbumba.”

*OYesu n'omusaiza omusuni
(Mat 19:16-30; Mak 10:17-31)*

¹⁸ Lumo wabbairewo omufugi eyabwirye oYesu ati, “Musomesya omusa, niki ekinteekwa okukola okusuna obwomi obutawaawo?”

¹⁹ OYesu n'amwiramumu ati, “Lwaki onjeta omusa? Mpaawo muntu omusa okutoolaku oKibbumba yenkani. ²⁰ Omaite ebiragi bya Kibbumba ebikoba biti, Tiwayendanga, tiwaitanga omuntu, tiwaibbanga, tiwasibirirya oku muntu, oiteewo n'omaawo obawenge ekitiisya.”

²¹ Iye omufugi n'amwiramumu ati, “Ebyo byonabyona nabituukiriirye kuzwera nakimo mu

butobuto paka atyanu.” ²² OYesu oweyawuliire ekyo, n’amukoba ati, “Ekintu kimo ekyokaali okukola. Otunde ebibyo byonabyona, era empiya egyazwamu ogigabire abadoobi, kaisi oize otambulenge na nze, awo walisuna obusuni omwigulu.”

²³ Neye omufugi oyo oweyawuliire ebyo, n’ayungubala ino olwakubba yabbaire musuni kibitiriri ino. ²⁴ Kale awo oYesu oweyamuboine nga muyungubali, n’akoba abeegibe ati, “Nga kigosi omusuni okwingira omu bwakabaka bwa Kibbumba! ²⁵ Ekinanyerenyeere kiri kiti, kyan-guku okisolo omunene ooti ngamira okubita omu kawundu k’empisyo, okukiraku omusuni okwingira omu bwakabaka bwa Kibbumba.”

²⁶ Kale abawuliire ebyo ni babuulya oYesu bati, “Olwo naani ayezya okulokoka?”

²⁷ Neye iye n’abairamu ati, “Abantu ekibatezya ikyo oKibbumba iye akyezya.”

²⁸ Awo oPeetero n’akoba oYesu ati, “Musengwa, aale obone twalekere ebisito byaiswe tutambulenge na iwe.”

²⁹ OYesu n’abakoba ati, “Mbakobera amazima nti mpaawo muntu eyalekere ekisitokye ooba omukaliwe, ooba abagandabe, ooba ababyairebe, ooba abaanabe olw’obwakabaka bwa Kibbumba, ³⁰ iye eyalikaya okusuna ebikiraku obungi ebyo ebiri oku kyalo kunu, omu bwomi bw’oku kyalo era tete asune n’obwomi obutawaawo ng’azwire oku kyalo.”

*OYesu tete atumula oku kufaakwe
(Mat 20:17-19; Mak 10:32-34)*

³¹ Awo oYesu n'airya abeegibe oku mbale, era n'abakoba ati, "Atyanu tuli kwaba e Yerusaalemi, era buli kintu abanaabbi ekibawandiikire oku Mwana wa Muntu kyaba okutuukirira. ³² Baaba okumuwaayo eeri aBatali Bayudaaya. Abo baaba okumusekerera, n'okumuzuma, n'okumwandaku ebitanta, n'okumufaamuulira efaalu egiriku emirobo egisima era n'okumwita ³³ Neye oluzwanyuma lw'enaku ibiri, oku lwokusatu, yalizuukira."

³⁴ Neye abeegibe mpaawo ekibategeirekuumu omu bintu ebyo. Ekyo kyabbaire kityo olwakubba amakulu g'ebibono ebyo gabbaire mainike, kale ni batategeera ekiyabbaire atumulaku.

*OYesu alamyā omwofu omusabiriri
(Mat 20:29-34; Mak 10:46-52)*

³⁵ Kale awo oYesu oweyabbaire ng'ali kumpi okutuuka omu kibuga ky'e Yeriko, n'ayajirya omusaiza omwofu ng'atyaimo oku nzira ng'ali kusabirirya. ³⁶ Omwofu oyo oweyawuliire ekiyindi ky'abantu nga kubitawo, n'abuulya ati, "Niki ekyo?" ³⁷ Ni bamukobera bati oYesu ow'e Naazaleesi niye abita.

³⁸ Awo n'atumula maaminkirira ati, "Iwe Yesu oMwizukulu wa kabaka oDawudi, onkwatire ekisa!"

³⁹ Kale awo ibo ababbaire beekubbembeire ni bamukaawuukira nga bamukoba asirike, neye iye ni yeeyongerabweyongereri kwaminkirira ati, "Iwe oMwizukulu wa kabaka oDawudi, onkwatire ekisa!"

⁴⁰ Awo oYesu n'ayemerera era n'alagira bamutwalire omusaiza oyo. Kale omusaiza oyo owebamwigereirye, oYesu n'amubuulya ati, ⁴¹ "Iwe, otaka nkukolere niki?" N'airamu ati, "Musengwa, ondamyé amaiso."

⁴² OYesu n'amukoba ati, "Aale obone, era olamire olwa kwikiriryakwo."

⁴³ Amangu ago amaisoge ni galama, era ni yeeyabira n'oYesu ng'awuuja oKibbumba. N'abantu bonabona ababbairewo owebaboine ekyo, bona ni bawuuja oKibbumba.

19

OYesu n'oZaakayo

¹ Awo oYesu n'abeyabbaire nabo ni baingira omu kibuga e Yeriko, era nga babita nzira. ² Omu kibuga oomwo mwabbairamu omusaiza eriinalye bati Zaakayo eyabbaire omukulu w'abasolooji ba musolo era nga musuni. ³ Omusaiza oyo yatakire okumanyica oYesu, neye olw'obumpibwe nandi n'ayezya okumubona olw'ekiyindi ky'abantu. ⁴ Kale n'airuka n'asaliza omu maiso oYesu egiyabbaire alungama, kaisi era n'aniina oku musaale omusikamooli, ayezye okubona oYesu.

⁵ OYesu oweyatuukirewo, n'alola e ngulu oku kisaale, kaisi n'amukoba ati, "Zaakayo, oniinuke mangu olwakubba olwatyano nteekwa okubba mugeniwo." ⁶ Kale oZaakayo n'aniinukirawo, era n'ayaniriza oYesu e ika n'eisangaalo.

⁷ Awo, abantu owebaboine ng'oYesu ayabireyo, bonabona ni batandiika okwezuluguma nga

bakoba bati, “Ayabire kucaala w’oodi akola ebibbibbi.”

⁸ Neye oluzwanyuma oku lunaku oolwo oZaakayo n’ayemerera, n’akoba oMusengwa ati, “Musengwa, aale atyanu ndi kugabulamu akati ebintu byange, kaisi ekitundu ekimo nkigabire abadoobi. Era obanga waliwo ogunalyakire, n’amwiriryawo emirundi eena.”

⁹ Awo oYesu n’akoba ati, “Olwatyanu obulokole bwingiire omu nyumba munu olwakubba onu onyere aanu yena mwizukulu wa Ibulaimu.

¹⁰ Kaisi era n’oMwana wa Muntu yaizire kunoonia n’okulokola baabo ababbaire bagotere.”

Olugero lw’abagalama ikumi

(Mat 25:14-30)

¹¹ Awo nga bali kuwulira ebyo, oYesu ni yeeyongerera na bagerera olugero olwakubba yabbaire kumpi n’e Yerusaalemi, era egibabbaire baseega bati obwakabaka bwa Kibbumba bwabbaire bwa kubbaawo nga yankatuukayo.

¹² Kagira yabagereire ati, “Wabbairewo omuntu ow’ekitiisya eyaabire omu kyalokye eky’e yala okumusuuca okabaka, kaisi aire. ¹³ Kale n’ayetaku abagalamabe ikumi, kaisi n’awa buli muntu empiiya egibeeta bati mina.* moiza moiza, n’abakoba ati, ‘Musuubuulenge omu mpiiya ginu paka owenaliira.’

¹⁴ “Neye ab’omu kyalokye babbaire tibamutaka era ni batuma abakwenda okumusenjaaku

19:10 19:10 Mat 18:11 * **19:13** 19:13 Mina emoiza yenkanankananga empeera y’omupakasi ey’emyeri misatu.

baabe eedi egiyabbaire ayaba, bakobe bati, ‘Titutaka oyo okubba kabaka waiswe.’

15 “Neye iye era oweyatuukire eedi, bamusuucirye kabaka era n’aira. Kale awo oweyairire n’alagira okumwetera abagalama badi abeyabbaire awaire empiiya, abone amagoba agebabbaire basuniremu.

16 “Eyasookere yaizire n’akoba ati, ‘Musengwa, empiiyagyo, gireetere amagoba g’emina ikumi.’

17 “Kale n’amukoba ati, ‘Weebale ino iwe omugalama omusa. Ng’owewabbaire omwesigwa omu kintu ekityai kinu, nkuwaire obwezye okufuga ebibuga ikumi.’

18 “Awo owokubiri n’aiza, n’akoba ati, ‘Musengwa, empiiyagyo gireetere amagoba g’emina itaanu.’

19 “Kale oMusengwawe n’amukoba ati, ‘Iwe nkuwaire okufuga ebibuga bitaanu.’

20 “Awo omugalama ogondi n’aiza, iye n’akoba ati, ‘Musengwa, empiiyagyo ngingu, era n’agibisire kusani nga mbiringe omu kiwero.

21 Nakolere ntyo olwakubba nakutiire engeri egyoli omuntu omugosi. Iwe otwala n’ekinandi notaganira, era oli ooti mulimi akesa ekinandi n’asiga.’

22 “Kale omusengwawe n’amukoba ati, ‘Iwe omugalama akola ebibbibbi, njaba kusinzirira ku byotumwire okukusalira omusango. Mbona ng’omaite, aale tiwamaite oti ndi muntu mugosi, atwala n’ekinandi ni ntaganira, era akungula n’ekinandi ni nsiga?’ 23 Aale kale lwaki empiiya gyange tiwagikoopere abasuubuuzi, kaisi

nze nga njirire ni ngisyomayo nga kuliku n'amagoba?'

²⁴ "Kale n'akoba ababbaire beemereire aawo ati, 'Mumutooleku emina eyo egyali nayo, mugiwe oodi aali n'emina gidi eikumi.' ²⁵ Neye ibo ni bamukoba bati, 'Musengwa, oodi iye aali nago gindi ikumi mbeereri!'

²⁶ "Awo omusengwa waabwe n'airamu ati, 'Mbakohera nti buli aali nabyo balimwongeraku n'ebindi, kaisi oyo abula, balimutoolaku n'akatyayi kadi akebalibba bamuwaire. ²⁷ Kale atyanu abalabe bange ibo etibantakiirye okusuuka kabaka waabwe, mubaleete aanu, era mubaite nga mbona.' "

*OYesu bamwaniriza omu kitiisya eky'amaani
(Mat 21:1-11; Mak 11:1-11; Yok 12:12-19)*

²⁸ Awo oYesu oweyamalire okutumula ebyo, ni yeeyongerayo n'ayaba paka e Yerusaalemi. ²⁹ Awo, oweyabbaire ng'ali kumpi okutuuka e Bbesufaage n'e Bbesaniya, ebiri oku lusozi olubeeta oLusozi olw'eMisaale eMizaituni, n'atuma babiri oku beegibe ng'abakoba ati ³⁰ "Mwabe omu kitundu ekyo ekiri omu maiso aawo era owemwabba mwankaingira muti, mwabona ompunda omutomuto ogubatatyamangaku ogubasibire awo. Mumuteere era mumuleete aanu. ³¹ Owewabbaawo ababulya ati, 'Lwaki mumuteera?' Mwamwiramumu muti, 'OMusengwa niiye amwetaaga.' "

³² Awo abebatumire ni baaba, era ni bamwajirya ng'oweyabbaire ababakobere. ³³ Kale owebabbairre nga bateera ompunda, abananyere ni bababuulya bati, "Inywe, lwaki muteera ompunda oyo?"

³⁴ Ibo ni bairamu bati, "OMusengwa niiye amutaka." ³⁵ Awo ni bamuleetera oMusengwa oYesu, era owebamutuucirye ni bamwalaku ebizibaawo byabwe, kaisi ni baniinisyaku oYesu ayabireku. ³⁶ Abantu baabanga baala omu nzira ebizwalo byabwe oYesu ng'abitaku ng'ali oku mpunda.

³⁷ Awo oweyabbaire ng'ayatira okuserengeta okuzwa oku lusozi olw'emisaale emizaituuni, ekiyindi kyonakyaona eky'abeegibe ni kitandiika okuwuujja oKibbumba n'eigono ery'amaani n'eisangaalo olw'ebyewunyo byonabyona ebibabbairre baboine.

³⁸ Bembanga bati, "W'enkabi okabaka oyo aiza omu liina lya Musengwa oKibbumba! Eidembe libbe omwigulu,

n'ekitiisya kibbe eeri oKibbumba aali omwigulu."

³⁹ Neye abamo oku Bafalisaayo ababbairre omu kiyindi ni bakoba oYesu bati, "Musomesya, okaawukire abeegibo basirike." ⁴⁰ OYesu n'airamu ati, "Mbakobera nti singa banu basirika, amabbaale igo gaceera."

OYesu akunga olwa Yerusaalemi

⁴¹ Awo oYesu oweyabbaire ng'ali kumpi n'ekibuga ky'e Yerusaalemi era ng'akirengera,

n'akunga olw'abantu baayo, ⁴² ng'akoba ati, "Aale inywe nywena abantu b'e Yerusaalemi singa kadi luceire nga mumanyicirye ekyo ekyezya okubaleetera eidembe! Neye paka atyanu kibebisireku. ⁴³ Ekiseera kyalituuka abalabe baanywe ni babasitaku olukita, kaisi ni babeeruguulirirya era ni babaziga okuzwera buli wantu. ⁴⁴ Balibamalirawo nakimo era paka n'abaana baanywe. Era mpaawo eibbaale kadi limo eryalisigala nga lyombeke oku liinaye, olwakubba timwamanyicirye ekiseera oKibbumba ekiyaiziireemu okubalokola."

*OYesu abbinga abatundira omu Yeekaalu
(Mat 21:12-17; Mak 11:15-19; Yok 2:13-22)*

⁴⁵ Kale oYesu oweyatuukire, n'aingira omu luga lw'eYeekaalu era n'atandiika okubbingamu ababbaire batundiramu ebintu. ⁴⁶ Yabakobere ati, "Bakiwandiikire bati, 'Enyumba yange yaab-banga nyumba ya kusabiramu, neye inywe mugisuucirye mpuku y'abanyagi omu beebisa.'"

⁴⁷ Oluzwanyuma lw'ebyo, buli lunaku oYesu yayegesyanga omu Yeekaalu. Neye abak-abona abakulu n'abakugu omu by'aMateeka ga Musa, n'abantu abakulu abandi omwigwanga, nga bagezyaku okusala amalabuki g'okumwita. ⁴⁸ Cooka tibasunirewo engeri yonayona, olwakubba abantu badi abandi bonabona bab-baire bamweruguulirirye nga bamuwulisya ino n'eiganyi.

20

*OYesu bamubuulya oku bwezyebwe
(Mat 21:23-27; Mak 11:27-33)*

¹ Lwabbairu lumu, oYesu oweyabbairu ng'ayegesya omu Yeekaalu, era ng'abakobera aMawuliro aMasa, abakabona abakulu n'abakugu omu by'aMateeka ga Musa, aamo n'abantu abakulu omwigwanga, ni baaba egyali. ² Kale awo ni bamubuulya bati, "Otukobere, oli na bwezyeki okukola ebintu ebyo ebyokola? Era naani eyakuwaire obwezye obwo?" ³ OYesu n'abairamu ati, "Zena oleke mbabuulye ekibuulyo. Munkobere, ⁴ naani eyatumire oYokaana okubatiza, Kibbumba ooba bantu?"

⁵ Awo ni beegeyamu bati, "Singa tumwiramutu tuti Kibbumba niye eyamutumire, ayaba okutubuulya ati, 'Kaisi lwaki oYokaana iye timwamwikiririiryemu?' ⁶ Neye singa tumwiramutu tuti abantu niibo abamutumire, abantu bonabona batukubba amabbaale olwakubba baikirirya nakimo bati oYokaana yabbairu naabbi." ⁷ Kale ni bairamu bati, "Titumaite eyamutumire." ⁸ Awo oYesu yena n'abakoba ati, "Aale zena tinabakobere obwezye obundinabwo okukola ebintu binu."

*Olugero lw'abapangisya b'omusiri
(Mat 21:33-46; Mak 12:1-12)*

⁹ Awo oYesu ni yeeyongera era n'agerera abantu ababbairuwo olugero lunu ati, "Wabbairuwo omuntu eyakomere omusiri gw'emizabbibbu, n'aguteekamu abapangisya,

n'ayaba awantu n'alwayo. ¹⁰ Ekiseera eky'amakungula owekyatuukire, n'atuma omugalama eeri abapangisya, bamuweeku ebineneka by'omusiri gw'emizabbibbu. Neye ibo bamukubbire-bukubbi, era ni bamubbinga nga tibamuwaireku akantu konakona. ¹¹ Kale n'abasindikira tete omugalama ogondi. Neye oyo yena ni bamukubba, ni bamwemulayemula, era ni bamubbinga nga tibamuwaireku akantu konakona. ¹² Era tete n'atuma owokusatu. N'oyo yena ni bamutemulatemula, era ni bamutoola omu musiri ni bamumuma eedi.

¹³ "Awo onyere omusiri gw'emizabbibbu ni yeebuulya ati, 'Nakola ntya? Njaba okutuma omwana wange omutake, amo bamuwa iye ekitiisya.' ¹⁴ Neye abapangisya owebamuboine, ni beegeyamu bati, 'Onu niye omusika; oleke tumwite, obusika bwalibba bwaiswe.' ¹⁵ Kale ni bamutoola omu musiri gw'emizabbibbu ogwo, ni bamutwala ni bamwita.

"Kale onyere omusiri ogwo niki ekiyal-ibakola? ¹⁶ Yalyaba n'aita abapangisya abo, kaisi n'agukwatisya abandi."

Awo abantu ababbairewo owebawuliire ebyo ni bakoba bati, "Kadi singa ekyo tikibbaawo!"

¹⁷ Neye oYesu n'abalingirira nakusani, kaisi n'ababuulya ati, "Aale eKiwandiike kinu kibba kitegeeza niki? Ekikoba kiti:

'Eibbaale abombeki eribagine,

lisuukire niiryo erikulu erisiba ensonda.' "

¹⁸ "Buli muntu agaana enjegesya yange ali ooti muntu agwa okwibbaale eeryo,

n'avunikavunika, era ali ooti yooyo oguligwaku ni limususungula.”

¹⁹ Awo abakugu omu by'aMateeka ga Musa n'abakabona abakulu, olwakubba babbaire bamaite bati olugero oolwo oYesu olwagerere, lubbaire lukwata ku niibo, ni banoonia engeri y'okumukwata omu kaseera akananyere ako neye ni batya abantu.

*Ebikwata oku kuwa omusolo
(Mat 22:15-22; Mak 12:13-17)*

²⁰ Kale awo abakugu omu by'aMateeka ga Musa na bakabona abakulu owebabbaire bakaali bakiiya oYesu okumukwata, ni batuma abakeeti beesuce ooti bantu abasa, bamukwatisye omu bibono ebyatumula, kaisi bayezye okumuwaayo omu mbuga y'oweitwale ly'e Buyudaaya. ²¹ Batyo abakeeti abo ni bamukoba bati, “Musomesya, tumaite tuti ebyotumula n'ebyoyegesya by'amazima, era tomomola omu bantu, neye obeegesya mu mazima ebyo oKibbumba ebyataka bakole. ²² Atyanu Musengwa, otukobere: Kibba kituuce okuwa oKaisaali omusolo, ooba bbe?”

²³ Neye oYesu n'amanyica omutego gwabwe ogubabbaireku, kaisi n'abakoba ati, ²⁴ “Kaade muleete edinaali. Ekifaananyi n'amaliina ebiriku byani?” Ni bamwiramu bati, “Bya Kaisaali.” ²⁵ Awo oYesu n'abakoba ati, “Kale ebya Kaisaali mubiwe oKaisaali, n'ebya Kibbumba mubiwe oKibbumba.”

²⁶ Batyo abakeeti ni bateezya kumukwatikisya omu kintu kadi kimo okubiyatumwire aawo

omu maiso g'abantu. Kale ni beewunya ino olw'ekiyabairiremu, era ni basirika.

Ebikwata oku kuzuukira
(*Mat 22:23-33; Mak 12:18-27*)

²⁷ Awo aBasedukaayo olwakubba bakoba bati mpaawo kuzuukira, abamo ni baaba egiri oYesu ni bamubuulya bati, ²⁸ “Musomesya, oMusa yatuwandikiire ekiragiyo kiti omuntu owaafa, n'aleka onamwandu, neye nga tabyaireku omwana, omuganda w'omufu ali n'okufumbirwa onamwandu oyo, kaisi abyalire omugandawe abaana. ²⁹ Kale wabbairewo abaganda musanvu. Asooka n'aleeta omukali, neye n'afa nga tabyaireku omwana. ³⁰ N'owokubiri n'amusika era yena n'afa nga tamubyairemu omwana. ³¹ Era n'owokusatu yena atyo. N'omu ngeri enanyere eyo bonabona omusanvu ni basikaku omukali oyo, era ni bafa nga tibamubyairemu omwana. ³² Oluzwanyuma, omukali yena n'afa. ³³ Atyanu oolwo oku lunaku olw'okuzuukira, omukali oyo yalibba mukaani, ngoyo bonabona omusanvu bamufumbiirweku?”

³⁴ Awo oYesu n'abairamu ati, “Abantu ab'oku kyalo kunu ibo basuna obufumbo. ³⁵ Neye abantu abo oKibbumba abaasaniza okubba omwigulu oluzwanyuma lw'okuzuukira, ibo tibalibba n'obufumbo. ³⁶ Era ibo balibba tibeezya okufa tete olwakubba balibba ooti bamalaika. Era balibba baana ba Kibbumba olwakubba balibba bazuukiire. ³⁷ Era n'oMusa alaga ati abafu bazuukira olwakubba omu

kitundu ekitumula oku kisaka, atumula oku Musengwa oKibbumba ati, Kibbumba wa Ib-bulaimu, era wa Isaka, era wa Yaakobbo.

³⁸ OKibbumba wa bantu ababba aboomi newankubbaire nga bamalire okufa neye tiwa bantu abasigala omu kufa, olwakubba aboomi n’abafu eeri oKibbumba babba boomi.”

³⁹ Abamo oku bakugu omu by’aMateeka ga Musa ni bairamu bati, “Musomesya, oiriremu kusani.” ⁴⁰ Bakobere batyo olwakubba wabbaire mpaawo eyaguma ni yeeyongera okumubuulya ebibuulyo ebindi.

*OKurisito n’oDawudi
(Mat 22:41-46; Mak 12:35-37)*

⁴¹ Awo oYesu n’abakoba ati, “Beezya batya okukoba bati oKurisito ogubasukireku amafuta, Mwizukulu wa kabaka oDawudi? ⁴² Ng’oDawudi onyere, omu kitabo kya Zabbuli yakobere ati:

‘OMusengwa oKibbumba yakobere oMusengwa wange ati:

Otyame ng’ondiraine oku lubba lwange olw’engalo endiiro,

⁴³ paka owenaligondya abalabebo ni mbasuuca mukonkolo gwa kuwu-umuliryaku ebigerebyo.’

⁴⁴ “Ooba ng’oDawudi onyere amweta ‘Musengwawe’ kaisi tete oKurisito ayezya atya okubba mwizukuluwe?”

*Okwekuuma abakugu omu by’aMateeka
(Mat 23:1-36; Mak 12:38-40)*

⁴⁵ Kale awo abantu bonabona nga bawulira, oYesu n'akoba abeegibe ati, ⁴⁶ "Mwekuume abakugu omu by'aMateeka ga Musa, abataka okutambula nga bazwaire ebizwalo ebyanvuwiriri ebyekuusira ansi, okulaga bati bantu beeru. Era bataka okubasugiryasugirya omu butale n'okutyama omu bifo eby'omu maiso omu makumbaaniro, n'omu bifo eby'abantu ab'ekitiisya oku mambaga. ⁴⁷ Era banyaga ebintu byonabyona omu manyumba ga banamwandu, n'okusaba oKibbumba omu bibono ebingi olw'okweraga. Abo balisuna ekibonerezo ekikiraku obunene."

21

Ekirabo kya namwandu (Mak 12:41-44)

¹ Awo oYesu ng'akaali ali omu Yeekaalu n'abona abasuni nga bateeka empiiya gyabwe omu kintu ky'ebirabo omu Yeekaalu. ² Awo era n'abona n'onamwandu omudoobi yena ng'ateekamu obumpiiya* bubiri, obusembayo okubba obw'ebbeeyi entono nakimo. ³ Kale n'akoba abeegibe ati, "Mbakohera amazima nti onamwandu omudoobi onu iye atekeremu kinene ino okukiraku abandi badi bonabona. ⁴ Ekyo kityo olwakubba ibo ebirabo byabwe batoire ku busuni obubali nabwo, neye onu iye omu budoobibwe atekeremu kyonakyoona ekyabbaire nakyo ekibbaire ky'okujejera obwomibwe."

* **21:2** 21:2 Obumpiiya, omu Luyonaani bati, Leputooni.

*OYesu atumula oku kujigirika kw'eYeekaalu
(Mat 24:1-2; Mak 13:1-2)*

⁵ Awo abamo oku beegi ba Yesu owebabbairere batumula oku Yeekaalu ng'owebagyombekere n'amabbaale amasa, era ng'owebagitimbire n'ebyokujolija ebigibonekesya nakusani, oYesu n'akoba ati, ⁶ "Ebyo ebimubona, ekiseera kyalituuka, owewatalibbeerawo eibbaale kadi limo eryalisigala nga lyombeke oku liinaye. Gonagona baaba kugawumpulyagawo."

*Ebigosi n'okubayiigaania
(Mat 24:3-14; Mak 13:3-13)*

⁷ Awo abeegi ba Yesu ni bamubuulya bati, "Musomesya, ebyo byalibbaawo di? Era kamanyiciryoki akaliraga kati byatira okubbaawo?" ⁸ Iye oYesu n'abairamu ati, "Mwekuume, tiwaabbaawo abagotesyagotesya; olwakubba bangi baliiza nga beeyeta ninze, era nga bakoba bati, 'Ekiseera kya Kurisito okwira kiri kumpi okutuuka.' Timubasengereryanga. ⁹ Owemuwuliranga entalo n'obwediimo, timutyanga. Ebyo biteekwa okusooka okubbaawo, neye era enkomerero tiyalituukirawo."

¹⁰ Era awo ni yeeyongera okubakobera ati, "Eigwanga lyalirumba eigwanga erindi, n'obwakabaka bwalirumba obwakabaka obundi. ¹¹ Walibbaawo omusisi ow'amaani, n'amanzala n'okawumpuli† omu bitundu bingi. Era walibbaawo n'ebitiisirirya n'obumanyiciryo obw'amaani okuzwa omwigulu.

† **21:11** 21:11Okawumpuli, niibwo obulwaire obwita ino abantu.

12 “Neye ebyo byonabyona nga bikaali okubbaawo, balibakwata era ni babayi-igaania. Balibawaayo okubawozesya omu makumbaaniro, n’okubasiba omu mabbuusuu. Era balibatwala omu maiso ga bakabaka n’ag’abafugi olw’eriina lyange. 13 Ekyo kyalibazweramu inywe abeegi bange okubatuucaaku aMawuliro aMasa. 14 Neye muli n’okumanya muti timuli n’okusooka okweraliikirira ekya kuwozya. 15 Ekyo kityo olwakubba nze nalibawa ebibono n’amalabuki, abalabe baanywe ebibateezya kwakanisya waire okugaana. 16 Paka n’ababyaire baanywe n’abaganda baanywe, n’abekika kyanywe, n’emikago gyanywe bona balibalyamu olukwe era abamo kwinywe balibaita. 17 Abantu bonabona balibacaawa olw’eriina lyange. 18 Neye mpaawo kwinywe eyalijigirika obwomibwe obwa mwoyo.‡ 19 Olw’okugumira ebigosi kwanywe mwalirokoka.”

OYesu atumula oku kujigirika okw’e Yerusaalemi

(Mat 24:15-21; Mak 13:14-19)

20 Awo oYesu ni yeeyongera ati, “Owemwalibona ng’amaje geeruguuliriirye ekibuga ky’e Yerusaalemi, oolwo nga mumanya muti bali kumpi okukijigirica. 21 Olwo abo abalibba omu Buyudaaya, bairukiranga mu nsozi, ibo abalibba omu kibuga ky’e Yerusaalemi bakizwangamu, era abo abalibba omu byalo tibakingirangamu.

21:15 21:14-15 Luk 12:11-12 ‡ 21:18 21:18 EBiwandiike ebimo bikoba biti, Newankubbaire akaziiri oku mitwe gyanywe tikalijigirika.

²² Ekyo kityo olwakubba ekiseera ekyo kyalibba kya Kibbumba kunyaan̄a eeri abantu b'omu kibuga ekyo, era ekyo kyalibba kutuukirirya Biwandiike. ²³ Abalibba ebida n'abalibba bay-onkesya omu naku egyo, nga baligada ino! Walibbaawo okugada okw'amaani oku kyalo kinu, n'obulwa bwa Kibbumba oku bantu baamu. ²⁴ Abandi balibaita n'empiima, kaisi abandi balibatwala omu byalo ebitali bimo omu busibe, era aBatali Bayudaaya baliwamba era ni bafuga kubbikubbi ino ekibuga ky'e Yerusaalemi paka ebiseera oKibbumba ebiyategekeire aBatali Bayudaaya okufuga, owebyaliwaaku."

*Okwira kw'oMwana wa Muntu
(Mat 24:29-31; Mak 13:24-31)*

²⁵ Awo oYesu ni yeeyongera ati, "Walibbaawo ebyewunyo okwisana n'oku mweri n'oku nkota. N'oku kyalo abantu balyeraliikirira nga batya olw'okuwolomboga kw'enyanza n'okubbaapa kw'amayengo. ²⁶ Abantu balibbalikaku olw'entiisya n'olw'okweraliikirira ebyalibbaawo oku kyalo, olwakubba obufugi n'ebibbumbe eby'e ngulu omwibbanga balibitengeetya. ²⁷ Olwo kaisi ni babona oMwana wa Muntu ng'aizira oku bireri, era ng'ali n'obwezye bungi n'ekitiisya eky'amaani. ²⁸ Kale ebyo owebyalitandiika okubbaawo, musetukanga era ni mugangamula emitwe gyanywe olwakubba okubanunula inywe, kwalibba kuli kwigereranga."

²⁹ Awo oYesu n’abagerera olugero ati, “Aale mubonere oku musaale omutiini, era n’egindi gyonagyona. ³⁰ Owemubona nga gikunkumuka nga mumanya muti ebiseera eby’ensaaca bigereire. ³¹ N’omu ngeri enanyere eyo, owe-mubonanga ebyo ebimbakobeire nga biri kub-bangawo, mumanyanga muti obwakabaka bwa Kibbumba bwigereire.”

³² Awo oYesu ni yeeyongerera ati, “Mbakobera amazima nti ebintu ebyo byonabyona byaba okubbaawo ng’abantu ab’omulembe gunu bakaali okufa okuwaawo. ³³ Eigulu n’ekyalo byaliwaawo, neye ebibono byange tibyaliswaawo kadi naire.”

Okwekuuma kwetaagisya

³⁴ Awo oYesu n’alabula abantu ati, “Mwekuume okwetalawusa, n’obuteemeere, n’okweraliikirira ebyobwomi bw’oku kyalo kunu okutazitowereranga emyoyo gyanywe, amo ni mubba ooti muli awo ng’olunaku lwa Kibbumba olw’okusaliraku emisango lubagwireku nga timwetegekere ooti muntu azwa omu mutego. ³⁵ Ekyo kityo olwakubba ekyo kyalikwata oku bantu bonabona abali oku kyalo. ³⁶ Kale mubbenge beetegeki, era musabenge oKibbumba, kaisi mwezye okubunuka ebyo byonabyona ebyaba okubbaawo, n’okwezya okwemerera omu maiso g’omwana wa Muntu.”

³⁷ Buli lunaku omusana oYesu yaabbanga mu Yeekaalu ng’ayegesya, kaisi owekwairu-galanga n’awuluka okwaba oku Lusozi olubeeta

olw'eMisaale eMizaituuni okugona. ³⁸ Abantu bangi ino bawuunanga makeezi ni baaba egyali omu Yeekaalu okumuwulisisya.

22

Olukwe olw'okwita oYesu

(Mat 26:1-5; Mak 14:1-2; Yok 11:45-53)

¹ Kale awo oMukolo ogw'eMigaati eGibulamu eKizumbulukuca, ogubeeta oMukolo ogw'oKutambukirya, gwabbaire gwatira okutuuka. ² Era abakabona abakulu n'abakugu omu by'aMateeka ga Musa babbaire banoonia engeri y'okwita oYesu mu mbiso olwakubba babbaire batya abantu.

OYuda aikirirya okulyamu oYesu olukwe

(Mat 26:14-16; Mak 14:10-11)

³ Awo oSitaani n'aingira omu mwoyo gwa Yuda oIsikalyoti, eyabbaire omoiza oku beegi ba Yesu eikumi na babiri. ⁴ Kaisi oYuda n'ayaba n'ateesa n'abakabona abakulu, n'abakuumi b'eYeekaalu abakulu engeri egyayinza okulyamu oYesu olukwe, amuweeyo egibali. ⁵ Olw'ekyo badi ni basangaala ino, era ni bategeragana okumuwa empiiya. ⁶ Kale awo n'aikirirya, era n'anoonia akaseera akasa ak'okubabbeera bakwate oYesu, ng'ekiziima ky'abantu kibulawo.

OYesu alya n'abeegibe oku Mukolo

(Mat 26:17-25; Mak 14:12-16; Yok 13:21-30)

⁷ Awo olunaku ni lutuuka olwa Mukolo ogw'eMigaati eGibulamu eKizumbulukuca, olubasaliraku ontaama omutomuto ogubasadaaka oku Mukolo ogw'oKutambukirya.

⁸ Kale oYesu n'atuma oPeetero n'oYokaana, n'abakoba ati, "Mwabe mututegekere oMukolo ogw'oKutambukirya, tugulye."

⁹ Ibo ni bamubuulya bati, "Otaka tugutegekere yaina?" ¹⁰ Iye n'abakoba ati, "Aale owemwabba nga mwingira omu kibuga, mwajirya omusaiza eyetiikire ensaka y'amaizi, mumusengererye paka omu nyumba omuyaingira. ¹¹ Era mukobe onyere enyumba omuntu oyo omuyaingira muti, 'OMusomesya akobere ati; nambu ekisenge kiri yaina, iye n'abeegibe omu baliira oMukolo ogw'oKutambukirya? ¹² Iye yabalagisya ekisenge ekinene ekiri e ngulu omu kalina, ekibamalire okwalirira, kaisi mututegekere oomwo ebyokulya.' "

¹³ Awo ni baaba, era ni baaja nga byonabyona biri ng'oYesu oweyabakobere, era ni bategeka oMukolo ogw'oKutambukirya.

Ekiinulo kya Musengwa ekisembayo

(Mat 26:26-30; Mak 14:22-26; 1Ko 11:23-25)

¹⁴ Awo esaawa ey'okulya oweyatuukire, oYesu n'atyama okuliira aamo n'abatumebe. ¹⁵ Kaisi n'abakoba ati, "Ntakire ino okuliira aamo na inywe oku Mukolo gunu ogw'oKutambukirya, nga nkaali okugada. ¹⁶ Era mbakobera nti tinaliiramu okugirya, paka amakulu gaayo owegalituukirira omu bwakabaka bwa Kibbumba."

¹⁷ Kale oYesu n'akwata ekikopo ky'enviinyo, ni yeebalya oKibbumba, era n'abakoba ati, "Mukwate kinu mugabane nywenanywena, ¹⁸ olwakubba mbakobera nti okuzwa atyanu tinaliirayo tete okunywa ekyokunywa

ky'emizabbibbu, paka obwakabaka bwa Kibbumba owebwalibbeerawo."

¹⁹ Era n'atoola omugaati, ni yeebalya oKibbumba, kaisi n'aguvunavunamu, n'awa abeegibe ng'abakoba ati, "Gunu niigwo omubiri gwange [ogumpaayo okulwanywe. Mukolenge kinu olwa kunjewukirya." ²⁰ Ekiinulo owekyawoire, n'abawa ekikopo eky'enviinyo omu ngeri enanyere eyo, ng'akoba ati, "Ekikopo kinu ni-iryo eisaaye lyange eryasusuka okulwanywe era erikakasa endagaano ya Kibbumba empyaka.]*

²¹ "Neye obone, oyo ayaba okundyamu olukwe alya na nze ekyokulya oku menza. ²² Dala oMwana wa Muntu ayaba okufa ng'owebakitegekere, neye wobe! Omuntu oyo eyamulyamu olukwe ng'alabire!" ²³ Awo ibo abeegibe ni batandiika okwebuulyangana bati, "Naani kwiswe ayaba okukola ekyo."

Empaka oku ky'okubba ow'ekitiisya

²⁴ Kale awo ni wabbaawo empaka omu beegi ba Yesu, nga beebuulyangana bati naani kwibo ogubatwala okubba akira ekitiisya. ²⁵ OYesu n'abakoba ati, "Abakabaka b'abo aBatali Bayudaaya bataka abantu abebafuga babamanye bati babaliku obwezye, era abo ab'obwezye, beeyeta babbeeri baabwe. ²⁶ Neye inywe timwabba ooti niibo, wazira akira okubba ow'ekitiisya mwinywe, abbe ooti niye omutomuto waamu

* **22:20** 22:19-20 EBiwandiike ebimo ebyeira bibulamu ebibono ebiri omu bukita. **22:20** 22:20 Yer 31:31-34 **22:21** 22:21 Zab 41:9 **22:24** 22:24 Mat 18:1; Mak 9:34; Luk 9:46 **22:25** 22:25 Mat 20:25-27; Mak 10:42-44

era omwekubbemberi abbe ng'omuweererya. ²⁷ Aale akira okubba ow'ekitiisya niye aliina? Oyo atyaime okulya, ooba oyo aweererya? Tiy-ooyo atyaime okulya? Neye nze mwinywe ndi ooti muweererya.

²⁸ "Era inywe abantu abasigaire na nze omu bigosi byange, ²⁹ zena mbawa obwezye okufuga obwakabaka nga zena oBbaabba oweyampaire obwezye okufuga, ³⁰ kaisi muliire oku menza yange omu bwakabaka bwange. Era mwal-ityama oku ntebe egy'obufugi eikumi na ibiri ni musalira ebika eikumi na bibiri ebya Isirairi emisango."

OYesu alanga ati oPeetero yamwegaana

(Mat 26:31-35; Mak 14:27-31; Yok 13:36-38)

³¹ Awo oYesu n'akoba oSimooni Peetero ati, "Simooni, Simooni, oSitaani asabire oKib-bumba amwikirirye abagezesye okwabula abasa omu babbibabbi ng'omuntu awasenyentamu en-gaano. ³² Neye nze nkusabiire, tiwawaamu okwikirirya. Era owewalimala okwenenya, ogumyanga abeegi abainawo."

³³ Neye oPeetero n'amukoba ati, "Musengwa, netegekere okwaba na iwe omu mabbuusuu era n'okufeera aamo na iwe."

³⁴ Awo oYesu n'amwiramumu ati, "Peetero, nkukobera nti olwatyanu, onkoko yaabba akaali n'okukookoola, nga wankanegaanira emirundi misatu ng'okoba oti tommaite."

³⁵ Kale awo oYesu n'ababuulya ati, "Owenaba-tumire ni mutayaba n'omugoba ogw'empiiya,

newankubbaire ebikotiya eby'abasabiriri, waire engaito, wabbairewo ekimwadambire?" Ni bairamu bati, "Mpaawo naire." ³⁶ Kale awo n'abakoba ati, "Neye atyanu oyo aali n'omugoba ogw'empiiya ayabe nagwo, n'oyo aali n'ekisawo yena ayabe nakyo, era owoobba odamba empiima, otunde ekizwalokyo ogigule. ³⁷ Ekyo kityo olwakubba eKiwandiike ekintumulaku kiti: 'Bamubaliire aamo n'abakola ebibbibbi,' kiteekwa okutuukirira. Era eBiwandiike ebyo byonabyona ebinkwataku biteekwa okutuukirira."

³⁸ Neye ibo abeegibe ni bamukoba bati, "Musengwa, obone aanu tulikuuwo n'empiiima ibiri." Iye n'abairamu ati, "Ekyo kimala!"

*OYesu asaba oKibbumba oku lusozi
(Mat 26:36-46; Mak 14:32-42)*

³⁹ Awo oYesu n'awuluka omu kibuga n'ayaba oku Lusozi olw'eMisaale eMizaituuni ng'oweyakolanga, era abeegibe ni bamusengererya. ⁴⁰ Oweyatuukire omu kifo ekyo, n'abakoba ati, "Musabe oKibbumba kaisi timwagwa omu bikemo."

⁴¹ Awo oYesu iye n'abazwaku ni yeeyongerakuyoyu katono omu maiso ebigere ooti 30, n'akoma amazwi n'asaba oKibbumba, ⁴² ati, "Bbaabba, owoobba ng'otaka, ontooleku ekipimo ekyokugada okwo, neye iwe ekyotaka niikyo ekyobba okole tinga nze owentaka." [⁴³ Kaisi awo omalaika n'azwa omwigulu n'amubonekera, era n'amugumya. ⁴⁴ Kale oYesu ng'ali omu bulumi

obungi, ni yeeyongera okwegairira ino oKibbumba, era olwotalwe ni lutoonya nga luli ooti gatondo g'eisaaye agatoonya ansi.]†

⁴⁵ Awo oweyasetukire okuzwa omu kusaba oKibbumba, n'aiza egiri abeegibe, n'abaajirya nga bagonere olw'enima egibabbairaire nayo. ⁴⁶ Kaisi n'ababuulya ati, "Inywe, mugona-bugoni? Muse-tuke musabe oKibbumba, kaisi timwagwa omu bikemo."

Bakwata oYesu

(Mat 26:27-56; Mak 14:43-50; Yok 18:3-11)

⁴⁷ Ala oYesu yabbairaire akaali atumula; kaisi ekiyindi ky'abantu ni kituuka, ng'omusaiza ogubeetanga bati Yuda eyabbairaire omoiza oku beegibe eikumi na babiri akyekudembeire. Kale awo n'aigerera egiri oYesu okumusugirya ng'amugwa omu kifubba. ⁴⁸ Neye oYesu n'amubuulya ati, "Yuda, olyamu oMwana wa Muntu olukwe mu ngeri y'okumusugirya ng'omugwa mu kifubba!"

⁴⁹ Kale awo abeegi ba Yesu owebaboine ekyaba okubbaawo, ni bamubuulya bati, "Musengwa, tubalwanisye n'empima?" ⁵⁰ Era omoiza oku beegi abo n'atemaku omugalama wa kabona akira obukulu ekitwi eky'oku ndiirero n'amutiicaaku.

⁵¹ Neye oYesu n'abakoba ati, "Mulekeraawo!" Kaisi n'akwata oku kinkuyu ky'ekitwi ky'omugalama oyo, era n'akiiryawo.

⁵² Awo oYesu n'akoba abakabona abakulu, n'abakuumi b'eYeekaalu abakulu, era n'abantu

† **22:44** 22:43-44 EBiwandiike ebimo ebyeira bibulamu enyiririginu.

abakulu omwigwanga ababbair baizire okumukwata, ati, “Mwizire nga muli n’amampiima n’emiigo ooti mwaba kukwata muyeekera? ⁵³ Kale buli lunaku naabbanga na inywe omu Yeekaalu, nandi munkwata. Neye kinu niiky ekiseera kyanywe, era niiky ekiseera ky’obwezye bw’endikiirya.”

OPeetero yeegaana oYesu

(Mat 26:57-58,69-75; Mak 14:53-54,66-72; Yok 18:12-18,25-27)

⁵⁴ Awo ni bakwata oYesu, ni bamutwala omu nyumba ya kabona akira obukulu, era oPeetero n’asenjeryaku ng’alekerekuuwo eibbanga. ⁵⁵ Neye owebamalire okukuma ekisiki omu luuga akati, ni batyama aamo, era oPeetero yena n’atyama aamo nabo okwota omusyo. ⁵⁶ Awo omoiza oku baala ababbair abaweererya e wa kabona akira obukulu oweyaboine oPeetero ng’atyaimo omusyo egigumoleka, n’amwekalikica, kaisi n’akoba ababbairwo ati, “N’omusaiza oyo yena abbanga n’oYesu.” ⁵⁷ Neye oPeetero ni yeegaana ati, “Mukali iwe, omusaiza oyo timmumaite.”

⁵⁸ Era nga wabitirewo akaseera katono, omuntu ogondi n’amubona, era n’amukoba ati, “Na iwe wena oli moiza kwibo.” Neye oPeetero n’amwiramumu ati, “Musaiza iwe, tiniye owekiri bbe!”

⁵⁹ Tete nga wabitirewo ekiseera ky’esaawa ooti moiza, omuntu ogondi n’akakasa ng’akoba ati, “Dala onu yena moiza oku basengereri

ba Yesu olwakubba yena Mugaliraaya.”
⁶⁰ Neye era oPeetero n’akaalaamira nakimo ino ng’akoba ati, “Musaiza iwe, timmaite ekyokoba, nze omusaiza oyo timmumaiteku kadi!” Amangu ago, oweyabbaire ng’akaali atumula, onkoko n’akookoola. ⁶¹ OMusengwa waiswe n’agaluka n’alingirira oPeetero. Awo oPeetero n’ayewukirya ekibono kya Musengwa, ng’oweyabbaire amukobere ati, “Olwatyanu onkoko yaabba akaali n’okukookoola, nga wanegaine emirundi misatu ng’okoba oti tommaite.” ⁶² Era awo oPeetero n’awuluka, era n’akunga ino.

*OYesu bamujooga era n’okumukubba
 (Mat 26:67-68; Mak 14:65)*

⁶³ Awo abasaiza abebabbaire bakuumisirye oYesu, ni bamujooga era nga webamukubba. ⁶⁴ Era ni bamubwika amaiso, kaisi ni bamukoba bati, “Aale otuwe obunaabbi, naani akukub-bire?” ⁶⁵ Era ni bamuduula ebintu ebindi bingi ino.

*OYesu omu maiso g’oLukiiko
 (Mat 26:59-66; Mak 14:55-64; Yok 18:19-24)*

⁶⁶ Awo obwire owebwaceire, olukiiko lw’abantu abakulu omwigwanga, n’abakabona abakulu, era n’abakugu omu by’aMateeka ga Musa, ni bakumbaana, kaisi awo ni baleeta oYesu omu maiso gaawe. ⁶⁷ Kale ni bamukoba bati, “Otukobere obanga niiwe oKurisito ogubasukireku amafuta.” Neye oYesu n’abairamu ati, “Nowenabakobera, timwaikirirye, ⁶⁸ era n’owenababuulya,

timwanjiremu. ⁶⁹ Neye okuzwa atyanu, oMwana wa Muntu ayaba okutyama n'oKibbumba omu kifo ky'ekitiisya eino.‡"

⁷⁰ Awo bonabona ni bamubuulya bati, "Ekyoli kutegeeza oti iwe oli Mwana wa Kibbumba?" Iye n'abairamu ati, "Ng'owemukobere era ninze oyo."

⁷¹ Kale awo ni bakoba bati, "Tukaali tutaka obujulizi obundi bwaki? Iswe abananyere ngoyo tuwuliire ng'atumula."

23

OYesu omu maiso ga Piraato

(Mat 27:1-2,11-14; Mak 15:1-5; Yok 18:28-38)

¹ Awo ab'olukiiko bonabona ababbairewo ni basetuka, ni batwala oYesu egiri oPiraato.

² Era owebamutuucirye ni batandiika okumuwaabira nga bakoba bati, "Onu twamwajirye ng'asasamaza abantu b'eigwanga lyaiswe, ng'abaloberya okuwa oKaisaali omusolo, era nga yeeyeta Kurisito ogubasukireku amafuta, okabaka."

³ OPiraato n'amubuulya ati, "Niiwe okabaka w'aBayudaaya?" OYesu n'amwiramumu ati, "Ee, kityo ng'owookobere."

⁴ Awo oPiraato n'akoba abakabona abakulu n'ekiziima ky'abantu ati, "Timbona musango ogumuvunaana omuntu onu."

⁵ Neye ibo ni beekalangula n'amaani okumukakasa bati, "Asasamaza abantu omu njegesyaye. Yatandiikire mwitwale ly'e Galiraaya, n'abita omu Buyudaaya mwonamwona ngoyo atyanu atuukire n'aanu."

‡ **22:69** 22:69 Ekifo ky'ekitiisya eino. Ooba, Oku lubba olw'engalo endiuro eya Kibbumba.

OYesu omu maiso ga Kerode

⁶ Kale oPiraato oweyawuliire ebyo, n'abuulya ooba ng'omuntu oyo Mugaliraaya.

⁷ Oweyamanyiciryeye ati oYesu azwa mwitwale lya Kerode, n'amuweererya egyali, aate ng'oKerode yena omu naku egyo yabbaire mu Yerusaalemi.

⁸ Kale awo oKerode oweyaboine oYesu n'asangaala ino olwakubba yabbaire awuliire ebimufaaku, era okuzwa eira n'eira yatakanga okumubona, era ng'asuubira okumubona ng'akola ebyewunyo.

⁹ Kale n'abuulya oYesu ebibuulyo bingi, neye oYesu nandi n'amwiramumu kadi kimo.

¹⁰ Awo-so abakabona abakulu n'abakugu omu by'aMateeka ga Musa ni beeteekawo, kaisi ni bakaalaama n'amaani oku Yesu.

¹¹ Awo oKerode n'abaisulukalebe ni bamunyaiya nga bamutala era ni bamukiina kaisi oKerode n'amuzwalisya ekizwalo ekimirikiinya, era n'alagira ni bamukanja e

wa Piraato. ¹² OKerode n'oPiraato ababbaire bacaawaganire ng'ensonga gya Yesu gikaali okubbaawo, ni basuuka ba mukago oku lunaku oolwo.

OYesu bamusalira ogw'okufa

(Mat 27:15-26; Mak 15:6-15; Yok 18:39-19:16)

¹³ Awo oPiraato n'ayeta abakabona abakulu n'abamo oku b'akakiiko akafugi n'ekiziima ky'abantu ekyabbaire awo.

¹⁴ Era n'abakoba ati, "Muleetere omuntu oyo egyendi nga mukoba muti asasamaza abantu; aale mubone, mmubuuliirye omu maiso gaanywe, era timboinemu musango mwebyo ebimusinziriraku okumuvunaana. ¹⁵ Era waire oKerode yena atyo tasunire

ekyokumuvunaana, kagira amwirirye egituli. Ng'owemubona omuntu oyo mpaawo musango oguyabbengere ogumusinziriraku okumusalira ogw'okufa. ¹⁶ Aale njaba okumubonereza, kaisi mmuteere." [¹⁷ Kyabbaire kityo olwakubba ku buli Mukolo ogw'oKutambukirya, oPiraato yatekwanga okubateerera omusibe ogubamus-abanga].*

¹⁸ Kale awo ekiziima ky'abantu kyonakyoona ni kiceerera aamo kiti, "Oyo omwite-bwiti, otuteerere Bbalaba!" ¹⁹ OBbalaba oyo yabbaire musibe omu mabbuusu olw'akeediimo ekiyakolere omu kibuga era n'olw'omuntu oguyabbaire aitire.

²⁰ Atyo oPiraato n'agezyaku okubagambirirya tete ng'ataka okuteera oYesu. ²¹ Neye ibo ni beeyongera okukooka bati, "Omukomerere oku musalabba, omukomerere oku musalabba!"

²² Tete era oPiraato n'ababuulya omulundi ogwokusatu ati, "Lwaki? Kibbikibbiki ekyakolere? Timbona nsonga kwiye emusingisya omusango ogw'okufa. Aale owenaabba nga mmalire okumubonereza, n'amuteera." ²³ Neye ibo ni beeyongera okukooka nga bakakasa bati oYesu bamukomerere oku musalabba era ni bamuyinga. ²⁴ Kale oPiraato yena n'asalawo okukola ekibamusabire. ²⁵ Awo n'abateerera omusaiza oyo ogubamusabire, eyabbaire omusibe omu mabbuusu olw'akeediimo akeyakolere n'olw'omuntu oguyabbaire aitire,

* **23:17** 23:17 Ebiwandiike ebimo ebyeira bibulamu olunyiriri lunu. **23:17** 23:17 Mak 15:6

era n'awaayo oYesu eeri abantu ng'owebabbairi bataka.

*OYesu bamukomerera oku musalabba
(Mat 27:32-44; Mak 15:21-32; Yok 19:17-27)*

²⁶ Awo abaisulukale owebabbairi batwala oYesu, ni basangaana omusaiza ogubeeta oSi-mooni ow'e Kuleene, eyabbairi akanga e ika omu kibuga ng'azwa omu kyalo, era ni bamukaka ni bamuteekaku omusalabba okug-wetiika ng'azwaku oYesu e nyuma. ²⁷ Awo ekiyindi ky'abantu kinene ni kisengererya oYesu, oomwo mwabbairimu abakali era ibo ni baaba nga bakunga era nga bakubba enduulu olwa Yesu. ²⁸ Neye oYesu n'aira oku bakali abo kaisi n'abakoba ati, "Inywe abakali ab'e Yerusaalemi, timwakunga okulwange; neye mwekungire niinywe abananyere era n'olwa baana baanywe. ²⁹ Ekyo kityo olwakubba enaku gyalituuka, abantu owebalikobera bati, 'Abakali abagumba b'enkabi, era ebida ebitabyalan-gaku n'amabeere agatayonkesyangaku byona nga by'enkabi!' ³⁰ Olwo balikoba ensozi bati, 'Mutugweku,' n'obusozi bati, 'Mutubbuuneku.' ³¹ Obanga abantu bakolere batyo ku musaale omubisi kaisi leero kyalibba kitya oku mukalu?" ³² Awo wabbairi abasaiza abandi babiri ababbairi oku gw'okuvuna amateeka, abebatwairi okwitira aamo n'oYesu. ³³ Kale owebatuukire omu kifo ekibeeta eky'eKiyanga, ni bakomerera awo oYesu oku musalabba n'abavuni nago abamateeka, omoiza oku lubba lwa Yesu olw'engalo endiiri, ogondi

oku lw'engooda. [³⁴ Awo oYesu n'akoba ati, "Bbaabba, obasoniye olwakubba tibamaite ekibakola."† Kale awo abaisulukale ni bagabula ebizwalo bya Yesu nga babikubbiraku kalulu.

³⁵ Era abantu ni beemerera awo okubona ebintu ebyo ebyabbairewo, ng'abafugi ibo bali kumusekerera nga bakoba bati, "Yalamyanga abandi, aale oleke yeeramyeye owaabba nga niye oKurisito oMulonde wa Kibbumba!"

³⁶ Cooka abaisulukale bona ni baigerera awo egibabbairere bamukomereire, ni bamukiina nga bamuwa enviinyo ensasaami okufunfuuna, ³⁷ era nga bamukoba bati, "Owoobba nga niwe okabaka w'aBayudaaya, weeramyeye!"

³⁸ Era bateekereyo ekiwandiiko e ngulu oku musalabba ekibawandiikire bati, "ONU NIIYE OKABAKA W'ABAYUDAAYA."

³⁹ Kale awo omoiza oku bavuni bama-teeka abebabbairere bakomereire oku musal-abba, n'aduula oYesu ng'amukoba ati, "Tiniwe oKurisito ogubasukireku amafuta? Weeramyeye, na iswe swena otulamyeye."

⁴⁰ Neye omuvuni wa mateeka oodi ogondi n'akaawuukira omwinaye ati, "Iwe, totyaku oK-ibbumba olwakubba tuli oku kibonerezo kimo naye? ⁴¹ Cooka iswe era mazima tuwoomera ekibonerezo kinu olw'ebitwakolere, neye omu-saiza onu iye mpaawo ensobi egyakolere." ⁴² Era awo n'ayongeraku ati, "Yesu, wenewukiryanga owewaliirira omu kitiisya ky'obwakabakabwo."

† **23:34** 23:34 EBiwandiike ebimo ebyeira bibulamu ekikobe ekiri omu bukita. **23:34** 23:34 Zab 22:18 **23:35** 23:35 Zab 22:7 **23:36** 23:36 Zab 69:21

⁴³ Neye iye oYesu n'amwiramumu ati, "Nkukobera amazima nti, olwatyanu waabba na nze omu kifo ekyokwesiima."

Okufa kwa Yesu

(Mat 27:45-56; Mak 15:33-41; Yok 19:28-30)

⁴⁴⁻⁴⁵ Awo esaawa gyabbaire ooti mukaaga egy'omusana, eisana ni lirikira era endikiirya n'ekwata oku kyalo kyonakyona paka oku saawa omwenda egy'eigolo. Era omu kaseera ako olu-timbe olw'omu Yeekaalu ni lunyirikamu akati ni bibba ebitundu bibiri. ⁴⁶ Awo oYesu n'akunga maaminkirira ati, "Bbaabba, nkukwatisya omwoyo gwange!" Oweyamalire okukunga atyo, n'afa.

⁴⁷ Kale omukulu w'ekibinja ky'abaisulukale 100 oweyaboine ebibbairewo, n'awuuja oKib-bumba era n'akoba ati, "Dala onu abbaire mu-saiza atuukiriire!"

⁴⁸ Awo abantu bonabona ababbaire bakumbaine okweboneraku owebaboine ebibbairewo, ni bakanga e waabwe nga baizwire enima. ⁴⁹ Neye abakaagwa ba Yesu bonabona n'abakali abamusengereirye okuzwa e Galiraaya, beemereire yalakuuku okulengeranga ebyabbairewo.

Okuliika oYesu

(Mat 27:57-61; Mak 15:42-47; Yok 19:38-42)

⁵⁰⁻⁵¹ Awo, wabbairewo omusaiza eriinalye bati Yusufu, omusaiza oyo yabbaire mutyami

w'omu kibuga ky'omu Buyudaaya ekibeeta Alimasaaya. Era yabbaire mukwenda oku lukiiko lw'aBayudaaya olukulu, wazira tiyaikirizaganyire nalwo omu kiteeso kyokwita oYesu era n'omu ngeri y'okukikolamu. Yabbaire musaiza musa era ng'atuukiriire, era ng'akumiriire okubbaawo kw'obwakabaka bwa Kibbumba. ⁵² Kale oYusufu oyo n'ayaba egiri oPiraato, n'amusaba omulambo gwa Yesu. ⁵³ Kale awo n'agwanula oku musalabba, n'agulingira omu lugoye olusa olw'ebbeeyi eino. N'aguteeka omu magombe ag'empuku egibabbaire nga batemere mwibaale, igo agebabbaire nga tibagateekangakuumu mulambo. ⁵⁴ Olunaku lw'okumuliika oolwo, lwabbaire lwa kwetegekeraku Saabbaato era eyabbaire yatira okutandiika.

⁵⁵ Batyo abakali ababbaire bazwereire n'oYesu e Galiraaya, ni basengererya oYusufu, era ni babona amagombe, ni babona n'engeri egibateekeremu omulambo gwa Yesu. ⁵⁶ Kale awo ni bakanga e waabwe, ni bategeka ebyakaloosa, n'okalifuwa. Neye oku Saabbaato ni bawuumula ng'eiteeka ly'aBayudaaya oweriragira.

24

Okuzuukira kwa Yesu

(Mat 28:1-10; Mak 16:1-8; Yok 20:1-10)

¹ Awo oku lunaku olwesaabbiiti, abakali abo bawiine makeezi pwi ni bakwata ebyakaloosa ebibabbaire bategekere ni baaba oku magombe ga Yesu. ² Kale owebatuukire eeyo baa-jiirye nga bayiringitirye eibbaale balitoirewo

omu mulyango gw'amagombe ag'empuku omu babbaire bamuliikire. ³ Neye owebaingiremu, tibaajiiryemu omulambo gwa Musengwa oYesu. ⁴ Awo owebabbaire nga bakaali bawugulaire olw'ekyo, okwaba okwewukirya ng'abasaiza babiri ababbaire bazwaire ebizwalo ebimirikiinya ooti kumesya kwa ikendi nga babeemereireku awo. ⁵ Kale awo abakali abo omu kutya ni bakoma amazwi okukotama, n'empumi ni giguunya ansi okwitakali, neye abasaiza nago ni babakoba bati, "Lwaki munoonerya omwomi omu bafu? ⁶ Aanu abulawo; azuukiire! Mwewukirye oweyabbaire ng'akaali ali na inywe omu Galiraaya nga yabakobeire ati, ⁷ 'OMwana wa Muntu bateekwa okumuwaayo omu ngalo gy'abantu abakola ebibbibbi bamukomerere oku musalabba, era oluzwanyuma lw'enaku ibiri, oku lwokusatu azuukire.' "⁸ Owebawuliire ebyo oolwo awo ni beewukirya ebibonoby.

⁹ Awo owebazwire oku magombe ni bakanga, baabire ni bakobera abatume ba Yesu eikumi na moiza, n'abandi bonabona ebintu ebyo byonabyona. ¹⁰ OMalyamu oMangadaleena, n'oYowani, n'oMalyamu omaaye wa Yaakobbo, n'abandi abebabbaire nabo niibo abaabire okukobera abatume ebintu ebyo. ¹¹ Cooka abatume tibabaikiririiryemu olwakubba ebibono byabwe byafaananiire abatume ooti mpaamu makulu. ¹² Neye tete oPeetero iye n'asetuka, n'airuka n'ayaba oku magombe.

24:7 24:6-7 Mat 16:21; 17:22-23; 20:18-19; Mak 8:31; 9:31; 10:33-34; Luk 9:22; 18:31-33

Oweyatuukire eeyo, ala okwaba okukotama okulolenkereryamu, yaboinemu ngoye egitukula egy'ebbeeyi njereere, era n'azwayo nga yena onyere yeewunya-kwewunya ebibbairewo.

Omu nzira y'Emaawo

(Mak 16:12-13)

¹³ Awo, oku lunaku olunyere oolwo, ababiri oku beegi ba Yesu babbaire baaba omu kabuga ak'Emaawo, ekiromita ooti ikumi na moiza okuzwa e Yerusaalemi. ¹⁴ Abeegi abo babbaire balonsya ku biiby byonabyona ebyabbaire bimalire okubbaawo. ¹⁵ Awo owebabbaire nga babironsyaku era nga webeebuulyanganaku, oYesu yena onyere n'abbutuka, era n'ayabirana nabo; ¹⁶ neye nandi ni bamumanyica.

¹⁷ Kale awo n'ababuulya ati, "Muli kutambula nga mulonsya kuuki?" Cooka ibo ni beemerera nga baicirye amaiso. ¹⁸ Awo omoiza kwibo, eriinalye bati Kulewopa n'amwiramumu ati, "Oli mugeni omu Yerusaalemi iwe atamaite ebibbairewo omu naku ginu?"

¹⁹ Iye n'ababuulya ati, "Bintuki?" Ni bamwiramumu bati, "Ebikwata oku Yesu ow'e Naazaleesi, ng'oweyabbaire omusaiza onaabbi ow'amaani omu biyakolanga n'omu biyatumulanga omu maiso ga Kibbumba n'omu maiso g'abantu bonabona. ²⁰ Era ng'abakabona abakulu n'abafugi baiswe owebamuwairayo okumusalira ogw'okufa, era ni bamukomerera oku musalabba. ²¹ Neye iswe-so twabbaire tusuubira tuti niye eyabbaire ow'okununula

oIsirairi. Neye ebyo byonabyona nga biri awo, lunu atyanu lunaku lwokusatu kasookeede ebyo bibbaawo. ²² Kaisu n'ekindi kiri kiti abamo oku bakali ab'e waiswe olwatyano batwewunyisiryeye ino. Cooka amakeezi bawiine oku magombe eeyo, ²³ neye tibaajiryemu omulam-bogwe. Era baizire ni batukobera bati nambu abamalaika bababonekeire ni babakobera bati oYesu mwomi. ²⁴ Kale awo abamo oku bannaiswe baabire oku magombe era ni baajirya nga biri ng'abakali owebatukobeire, neye iye onyere tibamuboineku."

²⁵ Awo oYesu n'abakoba ati, "Nga muli basirusiru era ng'emyoyo gyanywe midoto omu kwikirirya byonabyona abanaabbi ebibalangire eira! ²⁶ OKurisito ogubasukireku amafuta yabaire tateekwa kugada n'ebyo byonabyona kaisi aingire omu kitiisyakye?" ²⁷ Era ng'azwera oku Musa n'abanaabbi abandii, oYesu n'abasonzolera byonabyona ebimufaaku ng'owebiri omu Biwandiike.

²⁸ Kale owebabbaire bali kumpi okutuuka egibabbaire baaba, iye oYesu n'aboneka ooti akaali yeeyongerayo omu maiso. ²⁹ Neye ni bamwegairira ino bati, "Osigale aanu na iswe olwakubba eisana ligwa era obwire bwirugala." Kale n'ayawuka ayabe agone awo nabo.

³⁰ Awo owebabbaire batyaimo okulya, yatoire omugaati, ni yeebalya oKibbumba, n'aguvunavunamu kaisi n'agubawa. ³¹ Awo ni bairamu amalabuki era ni bamumanyica, kaisi ni yabeegoteraku. ³² Awo ni beebuulyangana bati, "Emyoyo tigitucemukire owaabbaire

ng'atumula na iswe omu nzira, era ng'atusonzolera eBiwandiike?"

³³ Kale ni basetukiramu mangu ni bakan-gayo e Yerusaalemi. Eeyo baajiryeyo abatume eikumi na moiza aamo n'abantu abandi nga bakumbaine. ³⁴ Awo abatume ni babakobera bati, "Kya mazima nti oMusengwa azuukiire era n'oSimooni amuboinuku." ³⁵ Era abasaiza ababiri abo bona ni babalonserya ebyab-bairewo omu nzira era ng'owebamanyiciryeyo Yesu oweyabavunavuniiremu omugaati.

OYesu abonekera abeegibe

(Mat 28:16-20; Mak 16:14-18; Yok 20:19-23; Bik 1:6-8)

³⁶ Awo owebabbaire nga bakaali balonsya kwebyo, oYesu yena onyere n'ababbutukamu era n'abakoba ati, "Eidembe libbe na inywe."

³⁷ Ekyo kyabeerindukisirye era ni batya nga baseega bati bali kubonanga mwigu. ³⁸ Awo n'abakoba ati, "Lwaki mweraliikirira? Era lwaki mubususabuusa omu myoyo gyanywe?" ³⁹ Aale mubone amangalo n'ebigere byange. Ninze nakimo onu onyere! Aale munkwateku mubone. Omwigu igwo tigubba n'omubiri n'amagumba ng'owemumbona nze."

⁴⁰ Oweyamalire okutumula atyo, n'abalagisya engalogyeyo n'ebigerebye. ⁴¹ Era n'owebakayire okwikirirya olw'eisangaalo n'olw'okuwuninkirira, n'ababuulya ati, "Mulikuuwo aanu n'ekyokulya?" ⁴² Kale ibo ni bamuwa ekitundu kya nyanyi omukalu, ⁴³ Era n'akitoola, n'akirya nga balingiriire.

⁴⁴ Kale awo n’abakoba ati, “Niibyoye ebyo ebin-abakobeire nga nkaali ndi na inywe, nti buli ekibampandiikireku omu Mateeka ga Musa n’omu bitabo by’abanaabbi n’omu Zabbuli, kiteekwa okutuukirira.” ⁴⁵ Era awo n’abategeeresya eBiwandiike, ⁴⁶ ng’abakoba ati, “Kinu ni-ikyoye ekibawandiikire bati: ‘OKurisito ogubasukireku amafuta nago yaligada era n’afa neye oluzwanyuma lw’enaku ibiri, oku lwokusatu yalizuukira, ⁴⁷ era omu liinalye, obukwenda obw’okwenenya n’okubasoniya ebibbibbi bateekwa okubulaabba omu mawanga gonagona nga basookera mu Yerusaalemi.’ ⁴⁸ Inywe muli bajulizi b’ebintu ebyo. ⁴⁹ Era njaba kubaweer-erya ekyo oBbaabba ekiyabasuubizire; neye musigale aanu omu kibuga, paka owemwasuna amaani ga Mwoyo oMweru okuzwa omwigulu.”

OYesu ayaba omwigulu

(Mak 16:19-20; Bik 1:9-11)

⁵⁰ Awo oYesu n’abawuluca omu kibuga, n’abatwala paka awantu okumpi n’ekyalo ky’e Bbesaniya, kaisi n’asiirya engalogye, era n’abawa enkabi. ⁵¹ Era awo oweyabbair akola ekyo, n’abazwaku n’ayaba omwigulu. ⁵² Kale awo ni bamusinza kaisi ni bakanga e Yerusaalemi nga b’asangaala ino. ⁵³ Era buli lunaku basiibanga oku Yeekaalu nga bawuuja oKibbumba.

Endagaano Empyaka Omu Lugwere
Gwere: Endagaano Empyaka Omu Lugwere (Bible)

copyright © 2019 Wycliffe Bible Translators, Inc.

Language: Gwere

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 21 Feb 2024 from source
files dated 29 Jan 2022

03698e2d-9c8d-5b1f-bc49-b0066e860180